


Kuyantika l	Yobi
Kuyantika 2	
Kuyantika 3	
Kuyantika 4	
Kuyantika 5	
Kubasika-Levi	
Kutanga-Kulonga	
Yozue	



A large red arrow points from the word "Yozue" back to the left side of the slide.

MUKANDA ya YOZUE

(Baleso 17 sambu na bana ti bajeune)

Musoniki: *Mama Lorella Rouster. MCE*



MUKANDA YA YOSUE

BALESO KELE NA MUKANDA YAI :

1. Nzambi pesaka Yozue kisalu ya kutwadisa bantu ya Israele kukota nsi na bo. Yozue 1
2. Rahabi sadisaka bantu ya Israele. Yozue 2
3. Bantu ya Israele sabukaka Nzadi ya Yordani. Yozue 3 & 4
4. Bantu ya Israele nungaka Yeriko, kansi bo gulusaka Rahabi ti fami na yandi. Yozue 6
5. Bantu ya Israele rataka Ai sambu na masumu ya Akani ; na nima bo nungaka. Yozue 7--8 :29
6. Lusakumunu to Lusilu ? Yozue 8 :30-35
7. Bantu ya Gabaoni kusaka bantu ya Israele. Yozue 9
8. Nzambi salaka kimpa sambu Israele kununga bamfumu 5. Yozue 10 :1-28
9. Bantu ya Israele bakaka penepene na ntoto ya mvimba, mpila Nzambi songaka bo. Yozue 10 :29-43 ; 11 :1-23; 12 :1-23
10. Bu Yozue me nuna, Nzambi silaka nde Yandi ta kula bantu ya Kanana ya me bikala. Yo yina, bo manisaka kupesa konso tribu ntoto na yo. Yozue 13—19.
11. Bo tulaka babwala ya bantu lenda kudibumba--Yozue 20
12. Bo pesaka babwala na dikanda ya Levi, ebuna Nzambi pesaka bo ntangu ya ngemba. Yozue 21
13. Makambu basikaka na kati ya batribu ya este ti ya weste. Yozue 22
14. Ntangu lungaka nde Yozue fweti kufwa ; yandi bambukisaka bo mambote yonso ti kwikama yonso ya Nzambi. Yozue 23
15. Yozue bendaka bo kusola Nzambi, kukatula banzambi yonso ya nkaka. Yozue 24 :1-28
16. Bantwadisi fwaka, ti Israele sadilaka Nzambi bilumbu na bo yonso. Yozue 24 :29-33
17. REVISIO YA MUKANDA YA YOZUE

Leso 1. Nzambi pesaka Yozue kisalu ya kutwadisa bantu ya Israele kukota nsi na bo.

I. Preparatio ya Moniteur—

Moniteur, leso yai ke monika na Yozue kapu 1.

Moniteur, bakisa kikuma ya leso yai :

Beto tanga ndinga ya Nzambi ti yindula yo konso lumbu.

Moniteur, yilama na verse ya kulonguka :

Yozue 1 :8

*Nge fweti tangaka ti kuyindula yo mpimpa ti
mwini ...nge ta landaka...(yo)...mpidina,
mambu yonso ya nge ta sala, yo ta bonga.*

**Moniteur, yilama na bankunga ya kwenda
nzila mosi ti leso yai :**

Bansiku Kumi ya Kulanda
Tanga Bibila Lumbu na Lumbu

II. Kureviser —

Kulanda devoir ya mposo me luta :

Na leso ya nsuka ya mukanda ya Kutanga ti Kulonga, beto lombaka beno bakristo kutonda Nzambi sambu na ngemba Yandi pesa beto bakristo. Nani me sala yo ? Merci mingi. Yo kele mbote kutula ngolo kusala badevoir ya beto ke pesa beno.

Kureviser :

- ↑ Na nsuka ya mukanda ya Kulonga, nani kufwaka ?
(Moize)
- ↑ Nani Nzambi tulaka kuyinga yandi ?
(Yozue)
- ↑ Bana ya Israele vandaka wapi ?
(Na Iweka ya nzadi ya Yordani)
- ↑ Nki bo zolaka sala ntangu yina ?
(Kukota nsi ya Nzambi silaka kupesa bo.)

III. Kulonga Bana Leso Yai –

Kuyantika Leso :

Kitoko vandaka mwana-nkento ya zolaka kusala mbote na nzo-nkanda. Yandi tulaka ngolo na mambu yonso ya kulonguka. Yandi mpi tulaka ngolo kutanga Bible na yandi konso lumbu.

Ntangu ya ba-examen kwisaka, ti Kitoko vandaka kutanga mingi sambu na kuyilama. Yandi yantikaka kuyindula nde, « Mono ke na ntangu bubu yai ve sambu na kutanga Ndinga ya Nzambi. Mono ta yindula yo na nima. »

Bana, keti beto lenda vila Ndinga ya Nzambi to tula yo na nima kana beto ke na bisalu mingi ya nkaka kusala ? Bubuyai beto ta mona nki Nzambi songaka bantu ya Israele na mambu yina.

**Developpement—Malungi ya nene ya Leso
Yai na Bandambu 4 :**

1.1 Nzambi bingaka Yozue.

Tangila bana :



*Yosue 1 :1 ...Mfumu Nzambi tubaka
na Yozue... muntu ya kisalu ya Moize,*

*2 nde : « Moize, muntu na Mono ya
kisalu, me fwa. Ntangu yai ...beno bantu ke
sabuka nzadi ya Yordani...*

*3 ... Mono me pesa beno ntoto yonso ya beno
ta tula makulu.*

*5 Na luzingu na nge yonso, ata muntu ta kuka
kubedisa nge ve. Mono ta vandaka ti nge
ntangu yonso, mutindu Mono vandaka ti
Moize...*

*6 Vanda ngolo, vanda kikesa, sambu nge ...ta
nata bantu yai ya kukabila bo ntoto ya Mono
tubaka na bankaka na bo nde Mono ta pesa
bo.*

Yula bana --**Niveau Primaire :**

- ?**
- Nki kisalu Yozue salaka na ntangu ya Moize ?
(Nsadisi ya Moize)
 - Nzambi songaka yandi nki sambu na ntoto na ntwala na bo, Kanana ?
(Yandi ta pesa yo na bo.)
 - Nzambi ta pesa ntoto yina na nani ?
(Na bantu ya Israele)

Niveau Secondaire :

- ??**
- Nzambi silaka kupesa bo konso sika ya bo ta sala nki ?
(Ya bo ta tula dikulu na bo. Yai zola tuba nde bo fweti kwenda kubaka ntoto yina, ti Nzambi ta sala ti bo sambu na kubaka yo.)
 - Nzambi pesaka Yozue nki bansilulu ?
(--Yandi ta vanda ti yandi lusingu na yandi yonso
--Muntu ta kuka ve kubedisa yandi)
 - Nzambi lombaka Yozue kuvanda nki mutindu ?
(Ngolo ti kikesa)

Bana sala bageste :

? Tula bana zole-zole. Na kati ya bana zole, mosi ta sala bageste bonso Nzambi ti mosi bonso Yozue. ‘Nzambi’ tula diboko na dipeka ya ‘Yozue,’ ti ‘Yozue’ fukama na ntwala na Yandi. Moniteur songa ‘Nzambi’ nki kusonga Yozue fraze na fraze ti ‘Nzambi’ landa yo.

Bana yimba ti kina :

? Nzambi me sola nge, Yozue
Kutwadisa bantu ya Israele
Moize mene fwaka
Yozue, nge me kuma ntwadisi.

1.2 Nzambi songaka yandi kulanda Bansiku na Yandi sambu bo kununga.**Yozue 1 :7-9****Tangila bana :**

Yosue 1 :7 ...Sala atasio...landa kaka bansiku yonso ya muntu na Mono Moize bikaka kupesa nge...mpidina nge ta nunga na konso kisika ya nge ta kwenda...

8 Kuvila ve Mukanda ya Bansiku...Nge fweti tangaka ti kuyindula yo mpimpa ti mwini ...nge ta landaka...(yo)...mpidina mambu yonso ya nge ta sala, yo ta bonga.

9 Kuvila ve mambu ya Mono me songa nge...

Yula bana --**Niveau Primaire :**

- ?**
- Yozue fweti sala atasio na nki sambu yandi nunga ?
(Na bansiku ya Nzambi)
 - Yandi fweti sala nki ti yo mpimpa ti mwini ?
(Tanga yo ti yindula yo, landa yo)
 - Kana yandi sala atasio na bansiku ya Nzambi, nki ta bonga ?
(Mambu yonso ya yandi ta sala)

Niveau Secondaire :

- Nzambi vandaka kutinda Yozue bonso capita ya basoda na mvita. Sambu na nki Yandi songa Yozue kusadila ntangu na yandi kutanga, ti kuyindula, ti kulanda bansiku ya Nzambi?
[Moniteur, kuwa mabanza ya bana. Bo lenda nunga mvita kaka kana Nzambi sala ti bo, ti Yandi ta sala ti bo kaka kana bo ke lemfuka na Yandi.]

Bana sala bageste :

Bana sala bageste bonso bo ke tanga bansiku ya Nzambi, ke ndima yonso ya yo tuba.

Bana yimba ti kina :

Yosue, kulanda
Bansiku ya Nzambi
Ebuna nge ta nunga
Mambu yonso ta bonga.

Bana tuba verse ya kulonguka :

Bo tuba Yozue 1 :8 mbala tatu, fraze par fraze na nima ya nge, moniteur. Na nima, bana bankento tuba yo ti bana bakala tuba yo mbala tatu. Bana ya fioti (prescolere) lenda tuba kaka bandinga ya kele sulinye.

Nge fweti tangaka/ ti kuyindula yo/ mpimpa ti mwini/ ...nge ta landaka...(yo)/...mpidina, mambu yonso ya nge ta sala/, yo ta bonga.

1.3 Jozue songaka Israele kuyilama sambu kusabuka Yordani ti kukota Kanana. Yozue 1 :10-15

Tangila bana :

Yozue 1 :10 Yozue songaka bambuta...

11 ... kutambula na kati ya camp ti na kutuba na bantu nde : « ...na nima ya bilumbu tatu, beto ta sabuka nzadi ya Yordani sambu na kwenda kubotula ntoto yina ya Mfumu Nzambi...ke pesa beto.

12 Yozue tubaka mpi na bantu ya dikanda ya Rubeni ...Gadi ti na ndambu ya ...Manase nde :

13 « Beno yindula mambu yai ya Moize...tibilaka beno nde : 'Mfumu Nzambi... me pesa beno ntoto yai ya beno kele, awa na ndambu ya este ya Yordani sambu beno tunga.'

14 Bankento na beno, bana na beno...ta bikala awa; kansi beno babakala...beno kwenda sadisa (bampangi na beno)

15 na kubotula ntoto... na simu na ndambu ya weste ya Yordani. Ebuna ... beno ta zaba kuvutuka na kutunga awa na ntoto yai... »

Yula bana --**Niveau Primaire :**

- Yozue songaka bo nde bo ta sabuka Yordani nki ntangu ?
(Na nima ya bilumbu 3)

Niveau Secondaire :

- Makanda 3 me lomba ntoto na este ya Yordani. Yozue bambukisaka bo nki ?
(Nde Moize ndimaka lukanu yina, kansi bo fweti kwenda ntete ti bampangi sambu na kusimba ntoto ya nkaka na simu ya Yordani.
Bantu yonso ta baka ntoto na bo, ebuna bo zaba kuvutuka.)

Bana sala bageste :

Bana sala bageste bonso bambuta ke songa bantu kuyilama, sambu na nima ya bilumbu tatu bo ta sabuka Yordani.

Bana yimba ti kina :

Yilama ! Yilama !
Beto ta sabuka Yordani
Na nima ya bilumbu tatu.

1.4 Israele ndimaka Yozue kutwadisa bo. Yozue 1 :16-18

Tangila bana :

Yozue 1 :16 Bo tubaka na Yozue nde : « Beto ta sala mambu yonso ya nge me tubila beto, beto ta kwenda mpi na konso kisika ya nge ta tinda beto.

17 ...Mbote Mfumu Nzambi kuvanda na nge mutindu Yandi vandaka na Moize

18 ...vanda kaka kikesa ti ngolo ! »

Yula bana --**Niveau Primaire :**

- Keti bantu ndimaka kulemfuka na Yozue, to bo ndimaka ve?
(Bo ndimaka.)

Niveau Secondaire :

- ??** ○ Bo songa Yozue kuvanda kikesa ti ngolo. Nki mutindu kulemfuka na bo ta sadisa yandi kuvanda kikesa ?
[Moniteur, kuwa mabanza ya bana.]
(Yandi fweti nwana ve ti bo, bo yonso lenda nwanisa mbeni na ntima mosi.)

Bana sala bageste :

 Bana songa geste bonso bo ke ndima kulanda Yozue.

Bana yimba ti kina :

 Yozue me kuma ntwadisi
Beto yonso mene ndima yo.

>|< Kumanisa lesò :

Bantu ya Israele vandaka na kisalu ya nene na ntwala na bo—kusimba babwala yonso ya nsi ya Kanana. Bo vandaka kuyilama kukota na mvita ! Kansi na ntwala bo kwenda, Nzambi kebisaka Yozue nde, ata na ntangu ya mvita, yandi baka ntangu kutanga ti kuyindula Ndinga ya Nzambi konso lumbu. Yandi landa yo mbote. Kana yandi landa yo, Nzambi ta vanda ti yandi ti Nzambi ta nwana ti bo.

Devoir sambu na bakristo :

-  Keti nge zola Nzambi kunwana ti nge ?
Keti nge ke tanga ti nge ke yindula
Ndinga na Yandi konso lumbu ? Keti
nge ke tanga yo, nge ke yindula yo
SAMBU nge landa yo? Devoir mono ke
pesa beno bakristo, yo yai :

Na mposo yai ke kwisa, tanga ti
yindula ndambu ya Ndinga ya Nzambi
konso lumbu. Ebuna tula ngolo
kulemfuka na yina ya nge me tanga.

Bana yimba nkunga:

Tanga, Bibila! Lumbu na lumbu ! Tanga tii na nsuka, ye, Tanga yo diaka!

Kubinga bavidi :

 Keti nge lenda tuba na ntima na nge yonso nde, «Mono zaba mono kele mukristo. Mono bambuka ntangu ya mono yambaka Yesu Kristo, mono tulaka ntima na Yandi” ?

Kana nge lenda tuba yo ve, kana nge ke na keti-keti na ntima na mambu yina, nge lenda yamba Yesu bubuyai. Kaka songa Yandi nde nge kele nkwasumu, kele na mfunu na Yandi. Binga Yandi na ntima na nge yonso kukota na lizingu na nge, kukitula nge mulanda na Yandi.

Kana ntangu lunga :

Longa mikanda ya Bible. Tala bangindu na nsuka ya mukanda yai.

==NSUKA YA LESO 1

Leso 2. Rahabi sadisaka bantu ya Israele.

I. Preparatio ya moniteur

Moniteur, lesy yai ke monika na Yozue kapu 2.

Moniteur, bakisa kikuma ya lesy yai :

Beto songa nsangu ya Yesu na bantu yonso na konso kisika, sambu beto zaba ve nani ta kwikila.

Moniteur, yilama na verse ya kulonguka :

Baebreo 11 :21

Rahabi, nkento yina ya ndumba...sambu na lukwikilu na yandi, yandi fwaka ve nzila mosi ti bantu yina vandaka kulemfuka ve na Nzambi, sambu yandi yambaka na kiese bantu ya Israele yina kwisaka kutala ntoto.

Moniteur, yilama na bankunga ya kwenda nzila mosi ti lesy yai :

Kwenda Norde, Kwenda Sude

Mono Kele na Nzo Kitoko (Benda Bampangi ya Nkaka, Beno Kwisa)

II. Kureviser —

Kulanda devoir ya mposo me luta :

Na mposo me luta, beto pesaka beno bakristo devoir kutanga ndambu ya Bible konso lumbu, kuyindula yo, ebuna kutula ngolo kulemfuka na yo. Nani ta songa beto nki yandi tangaka na mposo me luta ?

Reviser :

- ↑ Nani yingaka Moize bonso ntwadisi ya Israele ?
(Yozue)
- ↑ Bo ke yilama kusala nki ?
(Kusabuka nzadi ya Yordani, kukota ntoto ya Nzambi silaka bambuta na bo.)
- ↑ Bo fweti bambuka kulanda nki ?
(Bansiku ya Nzambi)

III. Kulonga Bana Lesy Yai –

Kuyantika Leso :

Nzambi me zenga nde bwala ya nene Yeriko ti bwala ya nkaka ya Kanana fweti kufwa sambu mbi me fuluka mingi na kati na yo. Ntamaaa, na ntangu ya nkaka na bo Abrami, Nzambi me mona mbi na bo. Yandi bakisaka nde mbi ya mutindu yina, yo ta kaka yela, yo kuma mingi, yo fulusa ntoto. Kansi, Nzambi ndimaka ve nde Abrami kula bo ti baka ntoto na bo ntangu yina. Yandi songaka Abrami nde yandi kinga tii ntangu mbi na bo me fuluka.

Ntangu yai, na nima ya bamvula mingi, ntangu me lunga. Nzambi me zenga ndola na bo. Kansi, keti yai songaka nde ata muntu mosi ve ya kisika yina lenda guluka ? Beto ta mona mvutu na lesy na beto bubuyai.

Developpement—Malongi ya nene ya Lesy Yai na Bandambu 4 :

2.1 Rahabi yambaka bantu zole ya Israele ya kwisaka na yandi nakinsweki. 2 :1-7

Tangila bana :

*Yozue 2 :1 Ntangu yai Yozue...
tindaka bantu zole na kinsweki
sambu na kutala ...bwala Yeriko.
Ntangu bo kwisaka kukuma..., bo
kwendaka kulala na nzo ya nkento
mosi ya ndumba, zina na yandi
Rahabi.*

2 Mfumu ya bwala waka nde bantu ya Israele me kwisa na mpimpa sambu na kutala ntoto.

3 Yandi tindaka bantu na kusonga Rahabi nde : « ...Basisa bo, nge pesa bo na maboko na beto.”

4 Kansi Rahabi ...tubaka na bantu ya mfumu nde : « Ya kieleka, bantu yango kwisaka na nzo na mono...

5 Bo kwendaka ka bo na kamwa-mpimpa,...kana beno landa bo nswalu, beno ta kanga bo na nzila.”

6 Kisi ve nkento yango vandaka me bumba bantu yina na zulu ya ludi ya nzo na yandi, na nsi ya matiti ya lino ya yandi tulaka kuna.

7 Bantu ya mfumu basikaka... Bo landaka kusosa bantu ya Israele...

Yula bana –

Niveau Primaire :

- Ntangu bantu ya Israele kumaka na bwala Yeriko, bo kwendaka kulala wapi ?
(Na nzo ya nkento zina ya Rahabi)
- Yandi vandaka nkento ya mbote to ya mbi ?
(Ya mbi, nkento ya ndumba)
- Ntangu mfumu waka yo, yandi tindilaka Rahabi nki ndinga ?
(Katula bo, tula bo na maboko na yandi.)
- Rahabi kusaka bantu ya mfumu nki mutindu ?
(Kusonga nde bo me kwenda dezia, bo kwenda nswalu kukanga bo na nzila)
- Kieleka yandi me sala nki ti bo ?
(Me bumba bo na ludi ya nzo na nsi ya matiti ya lino)

Niveau Secondaire :

- Rahabi tubaka luvunu. Yandi kusaka bantu ya mfumu ya Yeriko. Nzambi ke songa nde mambu yai salamaka. Kana Nzambi songa nde mambu salamaka, keti yai zola tuba nde Yandi me ndima yo ?
(Ikele ve. Na bantu yonso ya Nzambi, Nzambi songa mambu ya mbote ti mambu ya mbi.)
- Mambu ya mbote ya Rahabi vandaka nki ?
(Yandi kwikilaka Nzambi, yo yina yandi bumbaka bantu ya Israele ya kwisaka na yandi.)

Bana sala bageste :

 Bana sala bageste bonso bo ke bumba bantu ya Israele ya kwisaka na Rahabi.

Bana yimba ti kina :

 Rahabi bumbaka bantu ya Israele sambu yandi kwikilaka Nzambi.

2.2 Rahabi songaka bo lukwikilu na yandi na Nzambi ti lombaka bo nkenda. 2 :8-14

Tangila bana :

 *Yozue 2 :8 ...bantu yina zole ya Israele...Rahabi kwendaka*

9 kutuba na bo nde : « Mono zaba nde Mfumu Nzambi me pesaka ntoto yai na maboko na beno...

10 Beto waka mutindu Mfumu Nzambi yumisaka nzadi ya Mbwaki sambu beno luta, ntangu beno basikaka na nsi ya Ezipre. ..

11 Ntima na beto pasukaka ntangu beto waka nsangu yai... Ya kieleka, Mfumu Nzambi na beno kele Nzambi ya zulu ti ya ntoto.

12 ...beno... sadisa fami na mono mpi mutindu mono me sadisa beno...

13 beno ta fwa ve tata na mono, mama na mono, bampangi yonso ya fami na beto. ..

14 Bantu yango tubaka na yandi nde : "Kana nge songa bantu ve mambu ya beto kwisilaka, ya kieleka ...ntangu Mfunu Nzambi me pesa beto ntoto yai, beto ta sala nge mbi ve, beto ta sala nge mbote."

Yula bana --

Niveau Primaire :

- Rahabi songaka bantu yai zole ya Israele nde yandi zabaka nki ?
(Nzambi ke pesa bantu ya yandi na maboko na bo.)
- Yandi me waka nki mambu ya Nzambi salaka sambu na bo ?
(Mpila Yandi yumisaka Masa ya Mbwaki sambu bo lenda luta)

- Yandi kwikilaka nki sambu na Nzambi ?
(Yandi kele Nzambi na zulu ti na ntoto)
- Yandi lombaka bo nki ?
(Kusadisa yandi, kufwa yandi ti fami na yandi ve.)
- Bo silaka yandi nki ?
(Kana yandi kusonga ve mambu ya bo me kwisa kusala, fami na yandi ta fwa ve ntangu bo baka bwala yina.)

Niveau Secondaire :



- Nki mutindu Rahabi ke songa lukwikilu ti bisalu ya mbote ?
(Yandi kwikilaka Nzambi, yo yina yandi salaka sambu na kusadisa bantu na Yandi.)

Bana sala bageste :



Bana sala bageste bonso bo kele Rahabi ke bondila bantu ya Israele kuwila yandi mawa ti fami na yandi.

Bana yimba ti kina :



Rahabi waka mambu ya Nzambi me sala.

Yandi ndimaka nde Yandi Nzambi Mpungu mpenza.

2.3 Rahabi sadisaka bo kubasika. 2 :15-22

Tangila bana :



Yozue 2 :15 Nzo ya Rahabi vandaka penepene mpenza na kibaka ya lupangu ya bwala. Yo yina, yandi kangisaka nsinga na fenetre na mpila nde bantu yina zole kusimba yo sambu na kukulumuka, bo tina.

16 Rahabi songaka bo nde : « Beno kwenda kuna na ntoto ya bangumba sambu na kutina bantu yina ke sosa beno.

17 Bantu ya Israele tubilaka yandi nde : « Beto ta sadisa nge kaka mutindu beto me zenga.

18 Ntangu beto ke kwisa kubotula ntoto, nge ta sala mutindu yai : Nge ta kangisa nsinga yai ya mbwaki na fenetre yai ya beto me basikila. Ebuna nge ta binga tata na nge ti mama na nge, bampangi na nge ya babakala ti fami ya mvimba ya tata na nge, bo kwisa kuvanda awa na nzo na nge.

19 Kana muntu kubasika na nzo, ebuna bo fwa yandi...

...21 Rahabi nde : « E, mono me ndima. » ...Na nima, yandi kangisaka nsinga ya mbwaki na fenetre.

22 Bantu yango zole kwendaka kubumbana na ndambu ya bangumba bilumbu tatu, tii kuna bantu ya mfumu ya Yeriko kwisaka kuvutuka; bo sosaka bo na bisika yonso, kansi bo monaka bo ve.

Yula bana --

Niveau Primaire :



- Bantu ya Israele basikaka na bwala Yeriko nki mutindu ?
(Rahabi kangaka nsinga na fenetre na bikaka, yandi kitisaka bo.)
- Rahabi songaka bo kukwenda wapi sambu na kudibumba ?
(Na bangumba)
- Bo songaka Rahabi kutula nki kidimbu na fenetre ntangu bo vutuka sambu na kubwisa bwala ?
(Nsinga ya mbwaki)
- Kana bo mona yo, bo ta sala nki ?
(Bo ta gulusa bantu yonso na nzo na yandi.)

Niveau Secondaire :



- Histoire yai kele ndambu bonso yina ya Noa ti bo ya kotaka na maswa. Nki mutindu ?
(Na ntangu ya masa ya fulusaka ntoto, bantu ti bambisi fweti kota maswa, ebuna bo guluka. Na ntangu ya Rahabi, fami ti bampangi yonso na yandi fweti

vanda na kati ya nzo na yandi,
ebuna bo guluka.)

Bana sala bageste :

 Bana sala bageste bonso bo ke tina na bangumba sambu na kusosa sika ya kudibumba.

Bana yimba ti kina :

 O, Rahabi, kutula nsinga
Nsinga mosi ya mbwaki
Nge ta guluka.

Bana tuba verse ya kulonguka :

Bana tuba Baebreo 11 :21 fraze na fraze na nima ya nge, mbala tatu. Na nima, bo meka kutuba yo konso fraze na ndinga ya nkaka.
Bana ya fioti (preskolere) lenda tuba kaka bandinga ya kele sulinye.

Rahabi, nkento yina ya ndumba/...sambu na lukwikilu na yandi,/ yandi fwaka ve/ nzila mosi ti bantu yina vandaka kulemfuka ve na Nzambi,/ sambu yandi yambaka na kiese/ bantu ya Israele/ yina kwisaka kutala ntoto.

2.4 Bantu zole ya Israele pesaka rapport na Yozue. 2 :23-24

Tangila bana :

 Yozue 2 :23 Ebuna bantu ya Israele basikaka na kisika na bo kwendaka kubumbana, bo kulumukaka na bangumba, bo sabukaka masa, bo kwisaka kukuma na kisika Yozue vandaka. Bo telaka yandi mambu yonso yina bwilaka bo.

24 Bo tubaka nde : "Ya kieleka, Mfumu Nzambi me pesa ntoto yai yonso na maboko na beto. Bantu ya ntoto yango mpi ke na kikesa ve ya kunwana na beto. »

Yula bana --

Niveau Primaire :

-  • Bo pesaka rapport na nani ?
(Na Yozue)

- Bo ndimaka nde Nzambi me pesa bo ntoto, to Yandi me pesa ve ?
(Yandi me pesa bo.)

Bana sala bageste :

 Bana sala geste bonso bo ke pesa rapport na mfumu na bo Yozue.

Bana yimba ti kina :

 Ya kieleka, Nzambi me pesa beto ntoto yai !

>\< Kumanisa leso :

Bana, ntangu bantu zole yai ya Israele kwendaka na kutala bwala Yozue na kinsweki, keti bo zabaka nde bo ta kuta muntu ya kwikilaka Nzambi ? Iklele ve. Kana bo yindulaka nde, 'Nani na kati ya bwala yai ta kwikila Nzambi ?' keti bo ta yindula nde nkento ya ndumba ta vanda muntu yina ? Mono banza ve. Kansi Nzambi twadisaka bo na muntu ya kwikilaka Yandi sambu na mambu yonso ya yandi me wa, muntu ya lenda sadisa mpi bo. Kiteso mosi, Nzambi me songa beto kusonga nsangu ya mbote ya Yesu na bantu yonso. Beto zaba ve nani ta kwikila. Beto songa yo na bantu yonso, ebuna Nzambi, Yandi mosi Muntu ta kangula ntima ya bantu ya Yandi me sola.

Bana yimba nkunga :

Kwenda Nord, Kwenda Sud

Devoir sambu na bakristo :

 Mposo yai, tula ngolo kusonga muntu mosi konso lumbu mpila ya nge mosi kwisaka na Yesu.

Bana yimba nkunga :

Mono Kele na Nzo Kitoko (Benda Bampangi ya Nkaka, Beno Kwisa!)

Kubinga bavidi :

 Kana nge me kwisa na Yandi ntete ve, bubuyai ntangu ya mbote kukwisa na Yandi. Na nima, nge ta vanda na mpila kusonga bantu ya nkaka mpila nge ndimaka Yandi. Kana nge ke na mfunu

ya muntu kusamba ti nge na mambu
yina, mono ta vanda na kiese kusadisa
nge na nima ya kalasi bubu.

Kana ntangu lunga :

Longa mikanda ya Bible. Tala bangindu na
nsuka ya mukanda yai.

==NSUKA YA LESO 2

Leso 3. Bantu ya Israele sabukaka Nzadi ya Yordani.

I. Preparatio ya moniteur

Moniteur, leso yai ke monika na Yosue kapu 3 ti 4.

Moniteur, bakisa kikuma ya leso yai :

Beto ta landa mpila Nzambi songa beto kusala, sambu beto zaba nde kaka Yandi lenda songa beto nzila ya kieleka.

Moniteur, yilama na verse ya kulonguka :

Bankunga 119 :4-5

4 Nge Mfumu Nzambi me pesaka beto bansiku na Nge, Nge songaka beto na kulanda yo mbote-mbote.

5 Mbote mabanza na mono kuvanda na nzila, Mpidina mono zaba kulanda mbote-mbote bansiku na Nge !

Moniteur, yilama na bankunga ya kwenda nzila mosi ti leso yai :

Kuwa Bible
Landa, Mo' Ta Landa Nge, Mfumu
Mfumu Zaba Nzila na Mono

II. Kureviser –

Kulanda devoir ya mposo me luta :

Na mposo me luta, beto lombaka beno kusonga muntu mosi konso lumbu mpila nge kwisaka na Yesu. Nani songaka ata bantu zole ? Beno songaka nani ?

Reviser :

- ▶ Na ntwala kusabuka Yordani ti kota nsi ya Kanana, Yozue salaka nki ?
(Tindaka bantu zole kutala nsi yina ti bwala ya Yeriko nakinsweki)
- ▶ Kuna na Yeriko, bo kutaka nani ?
(Rahabi, nkento mosi ya ndumba ya kwikilaka Nzambi sambu na nsangu yandi me wa sambu na Yandi)

- ▶ Rahabi sadisaka bo nki mutindu ?
(Yandi bumbaka bo sambu bantu ya mfumu ya Yeriko kumona bo ve.)
- ▶ Bo silaka kusala nki sambu na yandi ?
(Kugulusa yandi ti fami na yandi yonso ya ta kota na nzo na yandi, na ntangu ya bo ta fwa bwala Yeriko)

III. Kulonga Bana Leso Yai –

Kuyantika Leso :

Ntangu yai, bo zola kusimba bwala Yeriko. Kansi na ntwala kusala yo, bo fweti sala mambu mosi—bo fweti sabuka nzadi ya Yordani. Bo me kuma na ntangu nde masa me fuluka mingi na nzadi. Yo ta vanda mpasi kusabuka yo. Nki mutindu bo ta sala yo ?

Developpement—Malungi ya nene ya Leso Yai na Bandambu 4 :

3.1 Yozue songaka bantu kuyilama sambu na kulanda banganga-Nzambi. Yozue 3 :1-6

Tangila bana :

Yozue 3 :1 ...Yozue ti bantu yonso ya Israele ...kwendaka kutunga camp na bo penepene na masa ya Yordani sambu na kuingila ntangu ya kusabuka masa.

2-4 ...bambuta ...kusonga bantu yonso nde : « Ntangu beno ke mona banganga-Nzambi... me nata Sanduku ya Kuwakana ya Mfumu Nzambi... beno panza camp, beno landa bo.

4 Bo bantu ta songa beno nzila, sambu beno me kumaka ntete kuna ve...

5 ...Yozue tubaka na bantu nde : « Beno yilama...sambu mbasi Mfumu Nzambi ta sala mambu ya kuyituka na kati na beno.”

6 Ebuna yandi tubaka na banganga-Nzambi nde : « Beno baka Sanduku ya Kuwakana, beno luta na ntwala ya bantu yonso.” Bo salaka mutindu Yozue tubaka.

Yula bana --**Niveau Primaire :**

- ?**
- Nki ta vanda kidimbu ya ta songa bo kupanza camp, kusabuka Yordani ?
(Bo ta mona banganga-Nzambi ke nata Sanduku ya Kuwakana ya Nzambi.)
 - Nani ta sala mambu ya yituka na kati na bo ?
(Nzambi)
 - Nani fweti luta na ntwala ya bantu yonso ?
(Banganga-Nzambi)

Niveau Secondaire :

- ??**
- Nki vandaka Sanduku ya Kuwakana ya Nzambi ?
(Sanduku vandaka na kati ya nzo ya bisambu ya ntenta, na sika kuluta longo)
 - Sambu na nki nge banza yo lutaka na ntwala na bo ?
(Sambu yo songaka nde Nzambi vandaka na kati na bo.)

Bana sala bageste :

Bana sala bageste bonso bo ke songa bantu kuyilama kusabuka Yordani.

Bana yimba ti kina :

Beno yilama
Beto ke sabuka
Nzambi ta songa beto nzila.

3.2 Nzambi songaka Yozue nki kusonga banganga-Nzambi, ebuna yandi songaka bo yonso. Yozue 3:7-13.

Tangila bana :

7 Mfumu Nzambi tubaka na Yozue nde...

8 Songa banganga-Nzambi ...nde ntangu bo ke kuma na lweka ya nzadi, bo kota, ebuna bo telama na kati ya nzadi. »

9 Ntangu yai, Yozue tubaka na bantu nde :
« Beno kwisa penepene, beno wa mambu ya Mfumu Nzambi ...me tuba.

10 Ntangu yai, beno ta zaba mbote-mbote nde Nzambi ya moyo ke vandaka na kati na beno... Yandi ke kula bantu ya Kanana,

11 Sanduku ya Kuwakana ya Mfumu Nzambi, Mfumu ya nsi-ntoto ya mvimba, yo ta sabuka Nzadi ya Yordani na ntwala na beno...

13 Ntangu banganga-Nzambi yina ke nataka Sanduku ya Kuwakana me tula makulu na bo na kati ya nzadi, masa ta zengana na ndambu zole...

Yula bana --**Niveau Primaire :**

- ?**
- Nki kima fweti sabuka ntete na ntwala ya bantu ?
(Sanduku ya Kuwakana ya Nzambi)
 - Nki ntangu masa ta zengana ?
(Ntangu banganga-Nzambi tula makulu na bo na masa)

Niveau Secondaire :

- ??**
- Yozue sadila bazina zole sambu na Nzambi na baverse yai. Nki ?
(Nzambi ya moyo, ti Mfumu ya nsi-ntoto ya mvimba)

Bana sala bageste :

Bana nangula musapi mosi, bo tuba na kimvuka nde, "Sanduku ya Nzambi luta ntete."

Bana yimba ti kina :

Masa ta zengana
Nzambi me tuba yo.
Beto ta sabuka
Nzambi me tuba yo.

3.3 Bo salaka mpidina, ata yo vandaka ntangu nde masa me fuluka mingi na Yordani, ti Nzambi kangulaka masa sambu na bo. Yozue 3:14-17

Tangila bana :

 14-15 Yo vandaka ntangu ...ya
Yordani vandaka me fuluka
mingi...banganga-Nzambi yitaka bo
...me nata Sanduku ya Kuwakana.
Ntangu bo tulaka makulu na bo na
kati ya masa,

16 masa kabanaka na ndambu zole...Ebuna
bantu sabukaka na makulu nzadi ya Yordani...

17 Banganga-Nzambi yina vandaka kunata
Sanduku ya Kuwakana, bo bikalaka na kati ya
masa, tii kuna bantu yonso manaka na
kusabuka masa na makulu, bo kuma na simu.

Yula bana --**Niveau Primaire :**

-  Ntangu bo zolaka kusabuka, masa
vandaka fioti to mingi ?
(Mingi ya kufuluka)
-  Ntangu banganga-Nzambi tulaka
makulu na masa, nki salamaka ?
(Masa kabanaka na bandambu
zole)

Niveau Secondaire :

-  Banganga-Nzambi salaka nki
sambu masa kukabana ?
(Bo kaka lemrukaka na Nzambi ti
tulaka makulu na kati ya masa.)

Bana sala bageste :

 Bana sala bageste bonso bo kele
banganga-Nzambi, ke nata Sanduku ya
Nzambi na mapeka, ke tula dikulu na
kati ya masa. Bo songa kuyituka
sambu yo kangula.

Bana yimba ti kina :

 Makulu ya banganga
Kotaka masa ya Yordani

Masa kangulaka
Ye bantu sabukaka!

**3.4 Bo tulaka matadi sambu na kubambuka
mambu yina, bonso Nzambi songaka bo.**
Yozue 4:1-8

Tangila bana :

Yozue 4 :1 Ntangu bantu yonso ya Israele me
sabuka nzadi ya Yordani imene, Mfumu
Nzambi tubaka na Yozue

2 nde : « Sola bantu kumi na zole, muntu mosi
na konso dikanda,

3 songa bo na kwenda kubaka matadi kumi na
zole na kisika ya banganga-Nzambi tulaka
makulu na bo...

4 Yozue bingaka bantu yai kumi na zole ya bo
solaka, 5 yandi tubaka na bo nde ...

6 Matadi yai ta songaka beno nki Mfumu
Nzambi me sala awa. Ebuna... kana bana na
beno kuyula beno nki disongidila ya matadi
yai,

7 beno ta songa bo ...Mpidina matadi yai ta
vandaka kidimbu yina ta songa bantu ya
Israele mambu ya kuyituka kubwaka awa ; bo
lenda vila ve. »

8 Bantu ya bo solaka, bo salaka mutindu
Yozue tubaka...

Yula bana --**Niveau Primaire :**

-  Bo bakaka nki kusala kidimbu ya
mambu Nzambi me sala kuna ?
(Matadi 12, mosi sambu na konso
dikanda)

Niveau Secondaire :

-  Nki mfunu ya matadi yina ?
(Kusadisa bo kubambuka nki
Nzambi me sala kuna, kupesa bo
nzila mpi kulonga bana na bo)

Bana sala bageste :

 Bana sala bageste bonso bo ke baka
matadi, ke tula yo na simu ya nzadi.

Bana yimba ti kina :

 Sambu na nki, mama,
Matadi yai kele awa ?
Sambu na kubambuka
Mambu ya nene Nzambi mene sala !

>|< Kumanisa leso :

Bantu ya Israele vandaka na mpasi. Bo fweti sabuka Yordani, kansi mpila vandaka ve kusala yo. Bo vandaka na mfunu ya Nzambi kusonga bo nki kusala. Nzambi songaka bo, ti bo tulaka ntembe ve. Bo lemukaka. Bo landaka nzila ya Nzambi songaka bo. Ntangu bo salaka yo, masa zenganaka, ti bo vandaka na mpila kusabuka. Yo lombaka kaka KULANDA NZAMBI.

Bana Yimba Nkunga :

Landa, Mo' Ta Landa Nge, Mfumu, to
Mfumu Zaba Nzila na Mono

Devoir sambu na bakristo :



Bana, na luzingu na beno, keti beno kele kusosa kulanda Nzambi ? Nzila ya ntete-ntete ya Nzambi songa beto nzila kele na Ndinga na Yandi—na Bible na beto. Keti nge ke tanga yo, to nge ke wa yo konso lumbu? Keti nge ke sosa kulanda to kusala yina ya nge tanga ?

Bana Yimba Nkunga :

Kuwa Bible

Beno bakristo, devoir mono ke pesa beno, yo yai : Na mposo yai, tanga ndambu ya Bible konso lumbu, to kuwa muntu kutangila nge. Na nima, sonika nki Nzambi zola nge kusala sambu na yina ya nge me tanga.

Bana tuba verse ya Bible :

Bo tuba na nima ya nge moniteur, fraze na fraze, Bankunga 119 :4-5. Bo tuba yo mbala tatu. Na nima, bo yika bageste ya lenda kwenda nzila mosi ti yo, bo tuba yo mbala tatu diaka. Bana ya fioti lenda tuba kaka bandinga ya kele sulinye.

4 Nge Mfumu Nzambi/ me pesaka beto
bansiku na Nge,/ Nge songaka beto/ na
kulanda yo mbote-mbote./

5 Mbote mabanza na mono/ kuvanda na
nzila,/ Mpindina mono zaba/ kulanda mbote-
mbote bansiku na Nge !

Kubinga bavidi :



Mambu ya ntete Nzambi zola nge kusala kele kubalula ntima, kundima Yesu, Mwana ya Nzambi, bonso Mvulusi na nge.

Kana nge me ndima Yandi ntete ve, ntangu ya mbote, yo yai bubu yai. Na ntima na nge yonso, lomba Yandi kugulusa nge. Kana nge ke na mfunu ya lusadisu na mambu yai, mono ta vanda na kiese kusadisa nge na nima ya ecodim.

Kana ntangu lunga :

Longa mikanda ya Bible. Tala bangindu na nsuka ya mukanda yai.

==NSUKA YA LESO 3

Leso 4. Bantu ya Israele nungaka Yeriko, kansi bo gulusaka Rahabi ti fami na yandi.

I. Preparatio ya moniteur--

Moniteur, leso yai ke monika na Yozue 6.

Moniteur, bakisa kikuma ya leso yai :

Bana ta kudiyindula kana lukwikilu na bo kele ya kieleka, sambu bo ta bakisa nde lukwikilu ya kieleka fweti monika na bisalu ya mbote.

Moniteur, yilama na verse ya kulonguka :

Baebreo 11 :31

...Rahabi, sambu na lukwikilu na yandi, yandi fwaka ve nzila mosi ti bantu yina vandaka kulemfuka ve na Nzambi, sambu yandi yambaka na kiese bantu ya Israele yina kwisaka kutala ntoto.

Moniteur, yilama na bankunga ya kwenda nzila mosi ti leso yai :

Kana Beno Ke Zolaka Mono

Kana Nge Zaba Nge Me Vuluswa

Yozue Nwanaka na Yeriko

II. Kureviser —

Kulanda devoir ya mposo me luta :

Na mposo me luta beto pesaka beno bakristo devoir na kutanga ndambu ya Bible konso lumbu, ebuna kusonika nki nge mona nde Nzambi zola nge kusala sambu na mambu ya nge me tanga. Nani tulaka ngolo kusala yo ? Nani ta songa beto mambu mosi bo monaka Nzambi zola bo kusala ?

Reviser :

- ↑ Nani vandaka kutwadisa bana ya Israele kukota nsi ya Nzambi silaka bankaka na bo ?
(Yozue)
- ↑ Nzambi salaka nki kidimbu ya nene na leso me luta ?
(Yandi kangulaka masa ya nzadi Jordani, ata masa vandaka mingi, bo sabuka na ntoto.)

- ↑ Bo me sila nde muntu mosi ta fwa ve ntangu bo baka Yeriko. Yandi nani ? (Rahabi ti fami na yandi ya ta kota na nzo na yandi.)

III. Kulonga Bana Leso Yai –

Kuyantika Leso :

Jean-Luc tubaka nde yandi me ndima Yesu. Konso ntangu ya muntu yulaka yandi, yandi tubaka nde, « E, mono me ndima Yesu. » Lumbu mosi, nduku yulaka yandi, « Nki ke songa nde nge me ndima Yesu ? Nge ke zinga kaka bonso bantu ya nkaka ya bwala. Nge ke sosa bankisi bonso bo sambu nge nunga na examen. Nge ke fingaka bonso bo. Nge ke zola ve kusamba. Nki mutindu nge kele mukristo ?”

Jean-Luc yantikaka kuyindula. Keti kieleka yandi vandaka mukristo ? Leso na beto bubuyai ke songa nkento mosi ya kwikilaka Nzambi, ti yo monikaka na mambu ya yandi salaka. Beto me kuma na Yozue kapu 6.

Developpement—Malongi ya nene ya Leso Yai na Bandambu 5 :

4.1 Nzambi songaka Yozue nki mutindu kununga bwala Yeriko. Yozue 6 :2-5

Tangila bana :

 2 Mfumu Nzambi tubaka na Yozue nde : “Tala, bwala Yeriko ti mfumu na yo ti basoda na yandi, mono me pesa bo na maboko na nge.

3 Nge ti basoda na nge, beno ta ziunga bwala... bilumbu sambanu, konso kilumbu mbala mosi.

4 Banganga-Nzambi nsambwadi ta kwenda na ntawala ya Sanduku ya Kuwakana, konso nganga-Nambi fweti nata mpungi. Na kilumbu ya nsambwadi, nge ti basoda na nge, beno fweti ziunga bwala mbala nsambwadi ; banganga-Nzambi fweti bulaka bampungi ntangu beno ke ziunga bwala.

5 Na nima, bo fweti bula kubula mosi ya nda ; kana bo wa yo, bantu yonso fweti tula milolo

ya ngolo ya bitumba, ebuna bibaka ya lupangu ya bwala ta bwa-bwa. Ntangu yai, ...kota ntinu na bwala."

Yula bana --

Niveau Primaire :

- Nani songaka Yozue nki mutindu bo fweti sala na bwala Yeriko ?
? (Nzambi Yandi mosi.)
- Keti yai kele mpila nge yindula basoda ke bakaka bwala ?
(Ikele ve. Basoda ta yindula nki mutindu kunwana, kansi yonso Nzambi songaka bo, yo vandaka ya kunwana ve.)

Niveau Secondaire :

- Kana nge vandaka soda ya Yeriko, nge ke tala mpila bantu ya Israele vandaka kusala, nge ta yindula nki ?
[Moniteur, kuwa mabanza ya bana.]
(Mbalà ya nkaka nge ta vanda mabanza kisakasaka.)
??

Bana sala bageste :

-  Bana sala geste bonso bo kele Yozue, ke wa ndinga ya Nzambi ke songa bo nki kusala.

Bana yimba ti kina :

-  Nzambi mosi songaka bo
Nki bo fweti sala.

4.2 Yozue songaka bantwadisi ya nkaka nki kusala. Yozue 6 :6-7

Tangila bana :

-  6 Yozue bingaka banganga-Nzambi, yandi tubaka na bo nde : "Beno baka Sanduku ya Kuwakana, ebuna ... kuyita na ntwala na bampungi."

7 Ntangu yai, yandi songaka basoda na yandi na kwenda kuziunga bwala ...

Yula bana --

Niveau Primaire :

- Na nima Nzambi songaka Yozue nki kusala, Yozue songaka banani ?
? (Banganda-Nzambi ti basoda)

Niveau Secondaire :

- Sambu na nki nge banza Sanduku ya Kuwakana fweti kwenda na ntwala na bo ?
(Sambu yo songaka nde Nzambi vandaka kutwadisa bo, mpi nde bo vandaka kukwisa na zina ya Nzambi.)
??

Bana sala bageste :

-  Bana sala bageste bonso bo kele Yozue ke songa banganga-Nzambi ti basoda nki kusala.

Bana yimba ti kina :

-  Sanduku ya Kuwakana, yo fweti yita na ntwala.
Kusonga nde Nzambi mosi Kele kutwadisa bo.

4.3 Bo salaka mutindu Yozue songaka bo, ebuna bibaka ya Yeriko bwaka .

Yozue 6 :8-20

Tangila bana :

-  8 Mambu yonso kubwaka mutindu Yozue tubaka. Banganga-Nzambi nsambwadi vandaka kwenda na ntwala ya Sanduku, ke bula-bula bampungi.....

10 Kansi Yozue songaka bantu ya Israele na kuvanda pima, bo tula makele ve, tii kuna yandi mosi kupesa bo nzila.

11 Banganga-Nzambi yina vandaka kunata Sanduku ya Kuwakana, bo ziungaka bwala mbala mosi, ebuna bo kwisaka kuvutuka na camp sambu na kulala.

12 Na kilumbu landaka, ...banganga-Nzambi bakaka diaka Sanduku ya Kuwakana na zulu ya mapeka na bo.....

14 ...bo ziungaka diaka bwala mbala mosi, na nima bo vutukaka na camp. Bo salaka mpidina bilumbu sambanu.

15 Na kilumbu ya nsambwadi, ...bo ziungaka bwala mbala nsambwadi.

16 ...ntangu banganga-Nzambi zolaka kubula bampungi, Yozue songaka bantu nde : "Beno tula milolo. Mfumu Nzambi me pesa beno bwala !"

17 Bwala yai ti bima yonso kule muna, beno fwa-fwa yo kimakulu, sambu yo kele ya Mfumu Nzambi. Kansi nkento yai ...Rahabi ti bantu yonso yina kele na nzo na yandi, beno fwa bo ve....

18 Beno keba, beno baka ata kima mosi ve...

19 Bima yonso ya wolo, ya arza, ya bronze ti ya bibende ya nkaka, yo kele ya Mfumu Nzambi, bo fweti tula yo na kesi ya bo ke tulaka kimvwama na Yandi. »

20 Banganga-Nzambi bulaka bampungi ; bantu tulaka milolo ya ngolo, bibaka ya lupangu kubwaka. Na mbala mosi, bantu ya Israele kotaka na bwala, bo botulaka yo.

Yula bana --

Niveau Primaire :

- Bo ziungaka bwala mbala mosi konso lumbu. Bo salaka mpidina bilumbu ikwa ?
Bilumbu sambanu.
- Na kilumbu ya nsambwadi, bo salaka nki mutindu ?
(Bo ziungaka bwala mbala nsambwadi.)
- Bantu vandaka pima bilumbu sambanu, kansi na kilumbu ya nsambwadi, na nima banganga bulaka mpungi, bo salaka nki ?
(Bo tulaka milolo.)
- Bo gulusaka nani na bwala Yeriko ?
(Rahabi, nkento ya sadisa bo, ti fami na yandi vandaka na nzo na yandi.)

- Nki salamaka ntangu bo tulaka milolo ?
(Bibaka ya bwala kubwaka.)

Niveau Secondaire :



- Milolo ya bantu tulaka na kilumbu ya nsambwadi, yo songaka nki ?
(Nde Nzambi me pesa bo bwala yina.)
- Bo fweti gulusa fami mosi na kati ya bwala. Sambu na nki ?
(Bo fweti gulusa Rahabi ti fami kele na nzo na yandi sambu yandi bumbaka bantu na bo ntangu bo kwendaka kutala bwala yina.)
- Verse na beto kulonguka bubuyai ke tuba nde, ...Rahabi, sambu na lukwikilu na yandi, yandi fwaka ve nzila mosi ti bantu yina vandaka kulemfuka ve na Nzambi, sambu yandi yambaka na kiese bantu ya Israele yina kwisaka kutala ntoto.
Sambu na nki verse yai ke tuba yandi bumbaka bantu ya Israele ?
('Sambu na lukwikilu na yandi.')

Bana sala bageste :



Bana yonso tula milolo. Bo nangula maboko, ebuna kulumusa yo nswalu, bo tuba "Whoom!" kusonga nde bibaka ya bwala kubwaka.

Bana yimba ti kina :



Bana yimba nkunga, "Yozue Nwanaka na Yeriko".

4.4 Bo gulusaka moyo ya Rahabi ti bampangi na yandi. Yozue 6 :22-23, 25

Tangila bana :



22 ...Yozue tubaka na bantu zole yina kwendaka kutala ...bwala Yeriko nde : « Beno kwenda na nzo ya ndumba yina, beno basisa yandi ti

*fami na yandi, mutindu beno
zengaka. »*

*23 Bo kwendaka, bo basisaka Rahabi, bo
kwisaka kunata yandi ...ti bampangi na
yandi... Bo tulaka bo na kisika mosi penepene
na camp ya bantu ya Israele.*

*25 Yozue kufwaka ve... Rahabi ti bantu yonso
ya fami na yandi... Rahabi zingaka na kati ya
bantu ya Israele ; bana na yandi mpi ke
vandaka kuna tii bubu yai.*

Yula bana --

Niveau Primaire :

- **?** Na ntwala na kufwa bwala, bo
basisaka nani ?
(Rahabi ti fami vandaka na nzo na
yandi.)
- Rahabi ti fami na yandi kwisaka
kuzinga wapi ?
(Na kati ya bantu ya Israele)

Niveau Secondaire :

- **??** Rahabi vandaka ntete nkento ya
ndumba, kansi na nima yandi
kwikilaka Nzambi, yandi kumaka
nki ? Tala Matayo 1 :5.
(Yandi kumaka nkaka ya Yesu
Mesia.)

Bana sala bageste :

● Bana sala bageste bonso bo ke basisa
Rahabi ti fami na yandi na bwala, ke
nata bo na camp ya Israele.

Bana yimba ti kina :

→ Kiese na Rahabi !
Ya' kwikilaka Nzambi !

**4.5 Bo manisaka bwala Yeriko ti tulaka yo
lusilu.**

Tangila bana :

*24 Na nima, bo tulaka bwala Yeriko
tiya, ti bima yonso vandaka muna,
kansi bima yonso ya wolo, ya arza, ya
bronze ti ya bibende ya nkaka, bo*

*nataka yo, bo tulaka yo na kesi ya
...nzo-Nzambi.*

*26 Na ntangu yina, Yozue zengaka na meso ya
bantu yonso nde : "Konso muntu yina ta meka
kutunga diaka bwala yai Yeriko, Mfumu
Nzambi ta pesa yandi ndola. .."*

Yula bana --

Niveau Primaire :



- Wolo ti arza ya bwala yina, bo
tulaka yo wapi ?
(Na kesi ya nzo Nzambi.)

Niveau Secondaire :



- Nki mutindu beto zaba nde
Nzambi zolaka ve bwala Yeriko
kutelama diaka ?
(Sambu Yozue tulaka yo lusilu
nde muntu ya zola kutunga yo
diaka, Nzambi ta pesa yandi
ndola.)

Bana sala bageste :



Bana sala bonso bo ke baka wolo ya
bwala, bo ke kwisa kutula yo na kesi
ya nzo-Nzambi.

Bana yimba ti kina :

→ O, Yeriko !
Kutunga yo diaka ve !

Bana yimba nkunga, « Yozue
nwanaka na Yeriko ».

>|< Kumanisa lesò :

Nzambi me pesa bana ya Israele bwala ya
ntete na nsi ya Yandi silaka bo. O yea ! Na
kati na yo, bantu yonso fwaka, kansi fami mosi
gulukaka. Rahabi ti fami na yandi, bo
gulukaka sambu na nki ? Ee, sambu yandi
sadisaka bantu ya Israele ya kwisaka kutala
bwala yina, bwala ya Yeriko.



Sambu na nki Rahabi sadisaka bo ?
Verse na beto bubuyai ke tuba:
*Baebre 11 :31...Rahabi, sambu na
lukwikilu na yandi, yandi fwaka ve nzila mosi ti*

*bantu yina vandaka kulemfuka ve na Nzambi,
sambu yandi yambaka na kiese bantu ya
Israele yina kwisaka kutala ntoto.*

[*Moniteur, bana lenda tuba verse yina bo yonso. Na nima, bakala ti bankento. Bo lenda tuba yo na maboko na zulu, na maboko na nsi ya bo ya kuvanda.]*

Kana kieleka muntu me kwikila Nzambi,
luzingu na yandi ta songa yo.

Bana yimba : Kana Nge Zaba Nge Me Vuluswa

Devoir sambu na bakristo :

 Beno bana bakristo, keti luzingu na nge ke songa nde nge me yamba Yesu Kristo ? Devoir mono ke pesa beno, yo yai : Na mposo ke kwisa, konso lumbu, sala mambu mosi kaka sambu nge zola Yesu. Na mposo ke kwisa, beno lenda songa beto nki beno me sala.

Kubinga bavidi :

 Kana luzingu na nge me soba ve, kana yo ke songa ve nde nge zola Yesu, mbote kudiyindula : Keti ya kieleka mono balulaka ntima na Yesu ? Kana keti-keti ikele, beto ta vanda na kiese na kusadisa nge. Kaka kwisa na beto na nima ya ecodime.

Kana ntangu lunga :

Longa mikanda ya Bible. Tala bangindu na nsuka ya mukanda yai.

==NSUKA YA LESO 4

Leso 5. Bantu ya Israele rataka Ai sambu na masumu ya Akani ; na nima bo nungaka.

I. Preparatio ya moniteur

Moniteur, leso yai ke monika na Yozue kapu 7 yonso tii na 8 :29.

Moniteur, bakisa kikuma ya leso yai :

Beto sadila Nzambi na masonga, sambu Yandi zaba mambu yonso. Mpila kubumba baluvunu na beto kele ve.

Moniteur, yilama na verse ya kulonguka :

Bankunga 120 :3-4

*Beno bantu ya luvunu, nki beno ta baka ?
Luvunu na beno, nki yo ta yika beno ?
Kaka batolotolo ya bitumba ti makala ya tiya.*

Moniteur, yilama na bankunga ya kwenda nzila mosi ti leso yai :

O Keba Munoko Nki Nge Tuba (Luvunu ve !)
O Luvunu Yambula

II. Kureviser —

Kulanda devoir ya mposo me luta :

Na mposo me luta, beto pesaka beno bakristo devoir kusala mambu mosi konso lumbu kusonga nde nge zola Yesu. Nani ta songa beto nki bo me sala na mposo yai kusonga nde bo zola Yesu ?

Reviser :

- ↑ Na nima bantu ya Israele sabukaka nzadi ya Yordani, bo bedisaka ntete nki bwala ?
(Yeriko)
- ↑ Nzambi sadisaka bo nki mutindu ?
(Yandi mosi bwiska bibaka ya bwala na mpila nde yo bwaka.)
- ↑ Bo gulusaka nani na bwala yina sambu lukwikilu na yandi bendaka yandi kusadisa bo ?
(Rahabi ti fami na yandi)

III. Kulonga Bana Leso Yai –

Kuyantika Leso :

Bantu ya Israele me nunga bwala mosi na ngolo ya Nzambi, sambu bo wilaka Yandi ntangu Yandi songaka bo nki kusala. Kansi nsi vandaka nene, ti babwala mingi. Bo fweti landa kaka kunwanisa babbala mosi-mosi. Na nima ya Yeriko, bwala ya zole bo zolaka kubedisa vandaka bwala ya fioti Ai. Ata yo vandaka fioti, yo vandaka na sika ya mfunu mingi.

Developpement—Malongi ya nene ya Leso Yai na Bandambu 6 :

5.1 Bantu ya Israele zwaka probleme ti Nzambi sambu na masumu ya Akani.

Tangila bana :

*Yozue 7 :1 Bantu ya Israele
Iemfukaka ve na Mfumu Nzambi ; bo
bakaka bima ya Yandi tulaka nsiku
nde bo fweti baka ve... Muntu mosi
...Akani...yandi bakaka ndambu ya
bima. Yo yina, Mfumu Nzambi
wilaka bantu ya Israele makasi.*

Yula bana –

- ?
- Sambu na nki Nzambi wilaka bo makasi ?
(Sambu muntu mosi na bo, Akani, me lemfuka ve, me baka bima ya Nzambi tulaka nsiku.)

Bana sala bageste :

 Bana songa musapi mosi kusonga masumu ya bantu ikwa bendaka makambo.

Bana yimba ti kina :

 Akani salaka masumu na meso ya Nzambi. Mawa !

5.2 Bo yindulaka nde bo lenda nunga bwala Ai na basoda mingi ve.

Tangila bana :

 2 ...Yozue tindaka bantu na kwenda kutala bwala Ai...

 3 ebuna bo kwisaka kuvutuka ti kutuba na Yozue nde : "Mfunu ve basoda yonso kwenda kunwanisa Ai... Bwala yango ke na bantu mingi ve, kutinda ve basoda na beto yonso."

4a Yo yina, bo tindaka basoda kiteso ya mile tatu (3,000),

Yula bana --**Niveau Primaire :**

-  • Bantu ya kwendaka kutala Ai, bo tubaka nde bwala vandaka nene to fioti ?
(Fioti. Bantu mingi ve.)
- Bo tubaka nde bo tinda basoda ikwa ?
(3,000.)

Niveau Secondaire :

-  • Basoda vandaka 30,000, kansi bo tindaka kaka 3,000. Nki pourcentage ya basoda kwendaka kunwana ?
(10% to kaka mosi na kumi)

Bana sala bageste :

 Bana sala bageste kusonga "fioti ».

Bana yimba ti kina :

 Kunwana bwala Ai ?
Yo yindulaka nde,
Mpasi mingi ve.
Basoda fioti kwenda.

5.3 Bantu ya Ai bedisaka bo ngolo.**Tangila bana :**

4b kansi bantu ya Ai kulaka bo.

 5 Bo fwaka basoda ya Israele kiteso ya makumi tatu na sambanu (36);
bayina ya nkaka, bo landaka bo ...bo

bedisaka bo kimakulu. Bantu ya Israele, ngolo na bo yonso kumanaka, boma simbaka bo.

Yula bana --**Niveau Primaire :**

-  • Ntangu bantu ya Israele nwanaka na bwala Ai, keti bo nungaka ?
(Ikele ve. Bantu ya Ai kulaka bo.)
- Bantu ikwa ya Israele fwaka ?
(Bantu 36)

Niveau Secondaire :

-  ○ Sambu na nki nge banza nde boma simbaka bo ?
[Moniteur, kuwa mabanza ya bana.]

Bana sala bageste :

 Bana songa bageste ya ke songa boma sambu mbeni me kula bo.

Bana yimba ti kina :

 Bantu ya Ai kulaka bo
O, nsoni mingi !

5.4 Yozue bakisaka ve, yo yina yandi sosaka Nzambi na mambu yina. Yo yina, Nzambi songaka yandi probleme na bo.**Tangila bana :**

7 Yozue sambaka Nzambi ...

 10 Mfumu Nzambi tubaka na Yozue nde : ...

11 Bantu ya Israele me sala masumu. Bo me bebisa bansiku ya Mono... Bo me baka bima ya Mono tubaka nde bo lenda baka ve...Bo yibaka yo, bo bumbaka yo na kati ya bima na bo.

12 Kisina yo yai bantu ya Israele ke kuka ve na kunwana na bambeni na bo. ...

14 Songa bo nde, mbasi na suka, dikanda na dikanda ta kwisa kutelama na meso na Mono, ebuna Mono ta songa ...

15...nani muntu na kati na bo me baka bima ya nsiku. ...

Yula bana --

Niveau Primaire :

- Yozue salaka nki na nima bantu ya Ai me kula bo ?
(Yandi sambaka Nzambi.)
- Nzambi tubaka nde bo me bwa sambu na nki ?
(Sambu muntu na kati na bo me sala masumu.)
- Nki masumu yandi me sala ?
(Yandi me baka bima ya Nzambi songaka bo kubaka ve, yandi me bumba yo.)
- Nzambi tubaka nde nani ta songa muntu yina ?
(Nzambi Yandi mosi ta songa yo mbasi.)

Niveau Secondaire :

- Yai ke songa nki sambu na mpila Nzambi na beto ikele ?
(Yo ke songa nde Nzambi mona to zaba mambu yonso, ata mambu ya bantu me bumba. Muntu lenda kusa Yandi ve.)

Bana sala bageste :



Mwana mosi sala bageste bonso yandi ke baka nakinsweki bima ya Nzambi songaka bo kubaka ve. Yandi ke kwenda kutima dibulu, kuzika yo na ntoto na kati ya ntenta na yandi.

Na nima, bana yonso ya nkaka sala bageste bonso Nzambi. Bo songa musapi na bima yina. Bo tuba nde, "Muntu me yiba. Muntu me meka kukusa Mono. Kansi Mono me mona yo."

Bana yimba ti kina :



Muntu me sala masumu
Yo yina, bo me bwa. Mawa !

5.5 Nzambi songaka masumu ya Akani, ti bo pesaka yandi ndola.

Tangila bana :

- 16 Kilumbu landaka, ...Mfumu Nzambi songaka Akani...
...20 Akani tubaka na Yozue nde : "Ya kieleka, mono muntu me sala masumu..."
- 21 ...mono monaka kazaki mosi ya kitoko mpenza ...mono monaka mpi ...arza, ti ...wolo Mono vandaka na nzala na yo mingi, yo yina mono bakaka yo. Mono me zika yo na kati ya nzo na mono ya ntenta..."
- 22 Yozue tindaka bantu na kwenda na nzo ya Akani...bo monaka bima yango ya kuzika na ntoto...
- 25 Ebuna Yozue tubaka na Akani nde : "Nge muntu natilaka beto bampasi yai..." Ebuna bantu yonso ya Israele losa-losaka yandi matadi, bo fwaka yandi...bo yokaka mpi bima na yandi yonso tiya.

26 ...Na nima, makasi ya Mfumu Nzambi manaka.

Yula bana --

Niveau Primaire :

- Nzambi songaka nde nani me sala masumu ?
(Akani)
- Keti Akani ndimaka masumu na yandi to yandi buyaka ?
(Yandi ndimaka)
- Na nima Akani bakaka ndola na yandi, nki salamaka na Nzambi ?
(Makasi na Yandi kumanaka.)

Niveau Secondaire :

- Na nima Akani ndimaka masumu na yandi, bo salaka nki ya nkaka sambu na kuzikisa yo mbote-mbote ?
(Bo tindaka bantu kusosa bima ya yandi me zika.)

- Masumu ya Akani me nata lufwa ya bantu 36. Ebuna, nki vandaka ndola na yandi ?
(Lufwa. Bo losaka yandi matadi tii yandi fwaka.)

Bana sala bageste :

 Bana sala bageste bonso bo ke tima na ntoto na ntenta ya Akani. Bo mona bima yandi me bumba kuna.

Bana yimba ti kina :

 O, Akani !
Sambu na nki nge me sala mbi yai ?

5.6 Bo kwendaka diaka na Ai, ebuna mbala yai, bo bedisaka yo.

Tangila bana :

 Yozue 8 :1 Mfumu Nzambi tubaka na
Yozue nde : "Kumona boma ve,
vanda ngolo. Baka basoda na nge
yonso, beno kwenda kunwanisa
bwala Ai..."

2 ...kansi na mbala yai, beno lenda baka bima
ti bambisi ya beno ta kuta kuna ...

3 Yo yina, Yozue ti basoda na yandi yonso
yilamaka

...14 ...ntangu mfumu ya Ai monaka basoda ya
Israele, yandi ti bantu na yandi yonso ...kwenda
kunwanisa bo bitumba ...

22 ...Ata muntu mosi...bikalaka na moyo ve,

23 kaka mfumu ya Ai, bo kangaka yandi, bo
nataka yandi na Yozue.

28 Yozue yokaka Ai, yandi kumisaka yo
mayumbu mpamba...

Yula bana --

Niveau Primaire :

- Ntangu bo kwendaka kunwanisa Ai diaka, Nzambi songaka bo kubaka basoda na bo ikwa ?
(Basoda yonso)
- Ntangu bo nwani saka bwala ya ntete, Yeriko, Nzambi songaka bo bima ya

nkaka ya bo lenda baka ve. Nki Yandi tubaka mbala yai na mambu yina ?
(Mbala yai bo lenda baka yo.)

- Mbala yai, keti bo nungaka to bo bebaka ?
(Bo nungaka mbote.)

Niveau Secondaire :

 ○ Na nsuka ya bitumba, bo bikisaka Ai nki mutindu, ti yai songaka nki ?
(Mayumbu mpamba. Yo songaka nde Nzambi zolaka kumanisa babwala yai yonso sambu na masumu na bo.)

Bana sala bageste :

 ● Bana songa bageste ya victoire kusonga nde bo me nunga.

Bana yimba ti kina :

 Mbala yai, Nzambi sadisaka
Ye bo nungaka mvita !

>|< Kumanisa lesos :

Akani banzaka nde yandi me bumba masumu na yandi. Ntangu yandi zikaka bima ya yandi me yiba na ntoto, yai vandaka bonso kukusa bantu ya Israele, kukusa Yozue, ti kukusa Nzambi. Kansi Nzambi monaka kuyiba na yandi. Nzambi zabaka luvunu na yandi. Yandi pesaka ve bantu ya Israele nzila kununga na mvita diaka tii na ntangu ya bo me songa luvunu na yandi, ti bo me pesa yandi ndola.

Bana, beto lenda kusa Nzambi ve. Bika beto zinga ti sadila Yandi na masonga.

Bana yimba bankunga :

O Keba Maboko Nki Ke Sala (O Keba Munoko Nki Nge Tuba—Luvunu Ve! To O Luvunu Yambula

Bana tuba verse ya kulonguka :

Bana tuba Bankunga 120 :3-4 fraze na fraze, na nima ya nge, moniteur. Bo tuba mbala tatu. Na nima, nge kabisa bana na bandambu, ti pesa konso ndambu fraze mosi ya kutelama

ti kutuba. Bana yonso tuba address ya verse (sika yo kele na Bible). Bo sala yo mbala tatu diaka.

Konso mposo, bandinga ya bana ya fioti (prescolere) lenda tuba kele sulinye.

*Beno bantu ya luvunu,/ nki beno ta baka ?/
Luvunu na beno,/ nki yo ta yika beno ?/
Kaka batolotolo ya bitumba/ ti makala ya tiya.*

Devoir sambu na bakristo :



Devoir mono ke pesa beno bana bakristo, yo yai : Na mposo yai, konso lumbu yindula kana nge ke tuba ti sala na mpila ya masonga yonso.

Kubinga bavidi :



Bana ya nkaka ke kudikusa na mambu ya mfunu mingi. Bo me yamba Yesu na kieleka ve, kansi bo ke kudikusa nde bo kele bakristo. Kana muntu me yamba Yesu, yo ke change luzingu na yandi. Kana nge kele ve sure 100% nde nge kele mukristo, mulandi ya Yesu, beto ta vanda na kiese kusolula ti nge ti kusadisa nge sambu nge vanda sure. Kaka kwisa solula ti beto na nima ya ecodim.

Kana ntangu lunga :

Longa mikanda ya Bible. Tala bangindu na nsuka ya mukanda yai.

==NSUKA YA LESO 5

Leso 6. Lusakumunu to Lusilu

Bo tangaka balusakumunu Nzambi ta pesa kana bo lemfuka, ti bansilu ya fweti landa kana bo lemfuka ve.

I. Preparatio ya moniteur--

Moniteur, lesy yai ke monika na Yozue 8 :30-35. Yo kele kubambuka mpi Kulonga kapu 27-28.

Moniteur, yidika na ntwala :

Sala bakarte zole mutindu yai :

[*Moniteur, kana nge me baka colis ya materiels ti baleso yai, tala kana bakarte yai kele na kati. Kana ve, nge mosi lenda sala yo.*]

Karte ya ntete :

Fase ya zulu sonika mutindu yai—

Tali tangaka ngolo na nzo-nkanda. Yandi lombaka Nzambi mpi kusadisa yandi.

Fase ya nsi sonika mutindu yai—

Yandi nungaka na bakalasi yonso.

Karte ya zole :

Fase ya zulu sonika mutindu yai—

Tali vandaka kusakana mingi na kalasi.

Yandi tangaka ve ngolo.

Fase ya nsi sonika mutindu yai—

Tali nungaka ve na kalasi.

Moniteur, yilama sambu na lesy yai :

NB : Leso yai kele na passage mosi ya nda kansi ya mfunu kutanga. Sosa muntu ya ke tangaka mbote-mbote, ebuna pesa yandi copi ya baverse ya yandi ta tanga, yandi sala pratike na ntwala. Beto me sola kaka ndambu ya baverse sambu passage kele nda mingi. Copi ya baverse ya yandi kutanga kele na kati ya colis na nge.

Na 6.1, beto me vukisa ‘Tangila Bana’ ti ‘Bana Sala Bageste.’ Tala mbote mpila beto me sala yo.

Moniteur, bakisa kikuma ya lesy yai :

Beto lemfuka na Nzambi na kiese, sambu beto zaba nde balusakumunu mingi ke landa kulemfuka.

Moniteur, yilama na verse ya kulonguka :

Kulonga 28 :2,6

2 *Beno lemfuka na Mfumu Nzambi...ebuna beno ta monaka mambote yai yonso.*

6 *Mfumu Nzambi ta sakumunaka beno na luzingu na beno yonso.*

Moniteur, yilama na bankunga ya kwenda nzila mosi ti lesy yai :

Bibila verse ya 3 : « Bii-bi-la !

Beto ta tanga yo !

Lomba, ebuna lemfuka na

Bii-ii-bi-la ! »

Kana Beno Ke Zolaka Mono

Nani Kele Ngolo ? (Nani Ta Lemfuka ?)

II. Kureviser —

Kulanda devoir ya mposo me luta :

Devoir beto pesaka beno bakristo na mposo me luta vandaka kuyindula konso lumbu kana mambu nge vandaka kutuba vandaka masonga. Nani yindulaka mambu yina na kati ya mposo yai ? Nani ta songa beto nki mutindu yo sadisaka nge ? Felisitasio na beno ya ke tula ngolo kusala devoir konso mposo.

Reviser :

- ↑ Na nima bantu ya Israele me sabuka masa ya Yordani, bo be sala nki bimvita zole ?
(Yeriko ti Ai)
- ↑ Sambu na nki bo nungaka Yeriko ?
(Sambu bo salaka mutindu Nzambi songaka bo kusala)
- ↑ Sambu na nki bo rataka Ai na mbala ya ntete bo nwanisaka yo ?
(Sambu masumu vandaka na kati na bo. Akani me baka kima ya Nzambi songaka yandi kutula na kesi ya

- Nzambi, yandi me bumba yo.)
- ↑ Sambu na nki bo nungaka mbala ya zole ya bo nwanisaka Ai ?
(Bo katulaka masumu ya Akani na kati na bo.)

III. Kulonga Bana Leso Yai –

Kuyantika Leso :

[Moniteur, ntete longa verse ya kulonguka. Bana tuba yo na nima na nge mbala zole, ndambu na ndambu.]

Kulonga 28 :2 ti 6/

2 Beno lemfuka na Mfumu Nzambi.../ebuna beno ta monaka/ mambote yai yonso./

6 Mfumu Nzambi ta sakumunaka beno/ na luzingu na beno yonso./

Yimba : Mosi ya bankunga ya kwenda nzila mosi ti leso yai.

Kusala na ntwala :

[Moniteur, sadila bakarte zole ya nge me yidika na ntwala. Tula yonso zole na mpila nde bana mona fase ya zulu, kansi fase ya nsi ve. Lomba mwana mosi kutanga bafase ya zulu, ti kusola mosi. Yandi balula yo ti tanga na nsi mambu ya fweti landa. Nge tanga karte ya nkaka ti fase na nsi, mambu ya fweti landa.]

Konso mambu ya beto sala kele na mambu ya fweti landa yo—ya nkaka ya mbote ti ya kiese, ti ya nkaka ya mbi ti ya mawa. Bubuyai beto ta mona mpila Nzambi songaka bantu ya Israele nki mambu ya kiese ta landa kana bo lemfuka na Yandi, ti nki mambu ya mawa ta landa kana bo lemfuka ve.

Developpement—Malongi ya nene ya Leso Yai na Bandambu 2 :

[Moniteur, NB nde leso yai kele na kaka bandambu 2, kansi ndambu ya zole kele ya nda. Beto sala yo ti bakestio mingi ve, kansi bageste mingi.]

6.1 Yozue tungaka mesa-kimenga na ngumba ya Ebale, mutindu Moize songaka

yandi kusala.

[Moniteur, NB : Beto ta mona na Kulonga 27 :1-4 mutindu Moize songaka bo kusala yo.]

Tangila bana : Yozue 8 :30-32

-  30 Yozue tungaka mesa-kimenga sambu na Mfumu Nzambi...kuna na zulu ya ngumba ya Ebale.

31 Yandi tungaka yo mutindu Moize...songaka ...na mukanda ya Bansiku ya Moize nde bo fweti tunga mesa-kimenga na matadi ya bo me pasula ve na bibende. ...

32 Po pana na meso ya bantu ya Israele, Yozue sonikaka diaka Bansiku ya Moize na zulu ya matadi.

Bana sala bageste :

-  Bo sala bonso bo ke :
--baka matadi
--tula yo lupemba
--sonika bansiku na zulu na yo
--tedimisa yo na zulu ya ngumba ya Ebale.

Bana yimba ti kina :

-  Bo tungaka sika
Na kusambilia Nzambi
Bo salaka yo kaka mpila
Moize songaka bo.

6.2 Moize songaka nde, bu Nzambi pesa bo nsi na bo, bo telama na bangumba zole. Bo tanga balusakumunu ya ta landa na bo kana bo lemfuka na Nzambi, ti bansilu ya ta kwisa na bo kana bo lemfuka ve.

Tangila bana :

-  9 Ebuna Moize tubaka na bantu yonso... nde : « Bantu ya Israele, beno wa Mono mbote-mbote. Ntangu yai, beno me kuma bantu ya Mfumu Nzambi ;

10 yo yina beno lemfuka na Yandi, beno landa bansiku na Yandi yonso ...

Bageste : Mwana mosi sala bageste bonso yandi kele Moize ke songa bantu yonso kulemfuka na Nzambi.

Tanga :

12 « *Kana beno me sabuka nzadi ya Yordani imene, bantu ya makanda yai, Simeoni, Levi, Yuda, Isakare, Yozefi ti Benyamini, bo ta kwenda kutelama na zulu ya ngumba ya Garizimi ntangu banganga-Nzambi ta lomba Mfumu Nzambi na kusakumuna bantu.*

Bageste :

[*Moniteur, kabisa bana na bandambu tatu.*] Ndambu ya ntete (batribu ya Simeoni, Levi, Yuda, Isakare, Yozefi ti Benyamini) kwenda na droite. Bo sala bageste bonso bo ke mata ngumba Garizime. Bo telama po pana.

Tanga :

13 *Ebuna bantu ya makanda yai Rubeni, Gadi, Asere, Zabuloni, Dani ti Neftali, bo ta kwenda kutelama na zulu ya ngumba ya Ebale ntangu banganga-Nambi ta samba Mfumu Nzambi na kusinga bantu.*

Bageste : Ndambu ya zole ya bana (batribu ya Rubeni, Gadi, Asere, Zabuloni, Dani ti Neftali) kwenda na goshe. Bo sala bageste bonso bo ke mata ngumba Ebale. Bo telama po pana. Bandamu zole ya bana, bo tala bo na bo.

Tanga :

14 « *Ntangu yai, bantu ya dikanda ya Levi fweti tuba na ndinga ya ngolo na bantu yonso ya Israele nde :*

Bageste :

Ndambu ya tatu ya bana ta sala bonso banganga-Nzambi, dikanda ya Levi. Bo telama na kati-kati ya bana ya nkaka.

Tangila bana diaka ti bana sala bageste:

[*Moniteur, bandinga yai kele bandinga ya banganga-Nzambi ke songa bantu. Mutangi ta tanga ndambu ndambu ti na kidimbu /, ebuna banganga-Nzambi ta repeter, kusonga bana ya nkaka na musapi.*]

Tanga :

15 « *Muntu yina ke sala biteki .../ke sambila yo mpi nakinsweki/ Nzambi fweti pesa yandi ndola./ Mfumu Nzambi ke zolaka banzambi ya biteki ve.’/*

Bageste : Bana yonso ya nkaka nikisa ntu ti ndima, « Amen ! »

Tanga:

16 « *Muntu yina ke zitisa tata ti mama na yandi ve, /Nzambi fweti pesa yandi ndola.’/*

Bageste : Bana yonso ya nkaka nikisa ntu ti ndima, « Amen ! »

Tanga :

....19 « *Muntu yina ke zenga na nku makambu ya banzenza, /bana-nsona ti bamifwidi ya bankento, /Nzambi fweti pesa yandi ndola.’/*

Bageste : Bana yonso ya nkaka nikisa ntu ti ndima, « Amen ! »

Tanga :

24 « *Muntu yina ke fwa muntu ya nkaka nakinsweki,/ Nzambi fweti pesa yandi ndola.’/*

Bageste : Bana yonso ya nkaka nikisa ntu ti ndima, « Amen ! »

Tanga :

....26 « *Muntu yina ke landa ve bansiku/ ti malongi ya Nzambi,/ Nzambi fweti pesa yandi ndola.’/*

Bageste : Bana yonso ya nkaka nikisa ntu ti ndima, « Amen ! »

Tanga :

Kulonga 28 :1

...« *Kana beno lemfuka na Mfumu Nzambi /ti kulanda mbote-mbote bansiku na Yandi, Yandi ta kumisa beno bantu ya nene/*

Bageste : Bana ya Garizime ta nikisa ntu ti ndima, « Amen ! »

Tanga :

...3 « *Mfumu Nzambi ta salaka na mpila nde,/ babwala na beno kukuma nene,/ bilanga na*

beno mpi kubuta mingi./

Bageste : Bana ya Garizime ta nikisa ntu ti ndima, « Amen ! »

Tanga :

4 Yandi ta pesaka beno bana mingi ;/ Yandi ta pesaka beno bima mingi na bilanga,/ ti bangombe, ti mameme,/ ti bankombo mpi mingi./

Bageste : Bana ya Garizime ta nikisa ntu ti ndima, « Amen ! »

Tanga :

5 Bitunga ya beno ta fuluka/ na bambuma ya kudia, /malonga ta fulukaka na fufu ya kitoko ya ble./

Bageste : Bana ya Garizime ta nikisa ntu ti ndima, « Amen ! »

Kutanga :

6 Mfumu Nzambi ta sakumunaka beno /na luzingu na beno yonso./

Bageste : Bana ya Garizime ta nikisa ntu ti ndima, « Amen ! »

Kutanga :

7 "Mfumu Nzambi ta bedisaka bambeni na beno/ ...

Bageste : Bana ya Garizime ta nikisa ntu ti ndima, « Amen ! »

Kutanga :

8 Mfumu Nzambi...ta kebaka banzo...ya beno...

Bageste : Bana ya Garizime ta nikisa ntu ti ndima, « Amen ! »

Kutanga :

9 " Kana beno lemfuka na Mfumu Nzambi,... kana beno sala mambu yonso ya Yandi ke songa beno,/ Yandi ta kumisa beno bantu na Yandi mpenza/.....

Bageste : Bana ya Garizime ta nikisa ntu ti ndima, « Amen ! »

Kutanga :

11 Mfumu Nzambi ta pesaka beno bana mingi, /bangombe mingi/ ti bima mingi na bilanga/....

Bageste : Bana ya Garizime ta nikisa ntu ti ndima, « Amen ! »

Kutanga :

12 beno ta defaka bantu ya nkaka bima,/ kansi beno,/ beno ta vanda na mfunu ya kudefa kima ve./

Bageste : Bana ya Garizime ta nikisa ntu ti ndima, « Amen ! »

Kutanga :

13 Mfumu Nzambi... ta tula beno na ntwala ya bantu yonso/ tii kuna,/ kana beno landa mbote-mbote bansiku na Yandi/

Bageste : Bana ya Garizime ta nikisa ntu ti ndima, « Amen ! »

Kutanga :

15 « Kansi, kana beno lemfuka ve na Mfumu Nzambi, /...bampasi yai ta bwila beno :

16 « 'Mfumu Nzambi ta salaka na mpila nde /babwala na beno kubikala ya fioti/, bilanga na beno mpi/ kubuta kima ve.

Bageste : Bana ya Ebale ta nikisa ntu ti ndima, « Amen ! »

Kutanga :

17 Bitunga ti malonga na beno/ ta vandaka ya mpamba.

Bageste : Bana ya Ebale ta nikisa ntu ti ndima, « Amen ! »

Kutanga :

18 Mfumu Nzambi ta pesaka beno bana mingi ve, /bima mingi ve na bilanga, /bangombe ti mameme ti bankombo mingi ve, /kaka fioti./

Bageste : Bana ya Ebale ta nikisa ntu ti ndima, « Amen ! »

Kutanga :

19 Yandi ta singa beno /na luzingu na beno yonso./

Bageste : Bana ya Ebale ta nikisa ntu ti ndima,
« Amen ! »

Kutanga :

20 ...*Yandi ta kumisa beno kisakasaka/ Yandi ta tindila beno bampasi/ na mambu yonso ya beno ta sala/ tii kuna beno yonso kufwa/ kimakulu.*

Bageste : Bana ya Ebale ta nikisa ntu ti ndima,
« Amen ! »

Kutanga :

21-22 *Yandi ta tindila beno bamaladi/ ya mutindu na mutindu/ ...Yandi ta sala mpi na mpila nde /bima ya bilanga na beno /kuyuma-yuma, yo fwa-fwa..../*

Bageste : Bana ya Ebale ta nikisa ntu ti ndima,
« Amen ! »

Kutanga :

25 « *Mfumu Nzambi ta sala na mpila nde/ bambeni kubedisa beno.*

Bageste : Bana ya Ebale ta nikisa ntu ti ndima,
« Amen ! »

Kutanga :

26 *Ntangu beno ta fwa,/ bandeke ti bambisi ya mfinda ta kwisa/ kudia bamvumbi na beno,/ ata muntu ta kula bo ve./*

Bageste : Bana ya Ebale ta nikisa ntu ti ndima,
« Amen ! »

Kutanga :

27 *Mfumu Nzambi ta tindila beno bivimbu/,...Nitu na beno ta fuluka na bamputa/ ti makwanza/*

Bageste : Bana ya Ebale ta nikisa ntu ti ndima,
« Amen ! »

Kutanga :

29 *Ata na kati ya mwini, /beno ta kwendaka kisakasaka /bonso bantu ya kufwa-meso,/ beno ta kuka ve kumona nzila./ Mambu yonso ya beno ta sala,/ yo ta bongaka ve. ..*

Bageste : Bana ya Ebale ta nikisa ntu ti ndima,
« Amen ! »

Kutanga :

31 *Bangombe na nge,/ bantu ta fwa yo na meso na nge, /kansi nge ta dia ata mosi ve. .../*

Bageste : Bana ya Ebale ta nikisa ntu ti ndima,
« Amen ! »

Kutanga :

32 *Bana na nge..., /banzenza ta kwisa.../kunata bo na kimpika/*

34 *Bampasi yango ta pesa nge/ maladi ya kilau. /*

Bageste : Bana ya Ebale ta nikisa ntu ti ndima,
« Amen ! »

Kutanga :

35 *Makulu na nge ta basika-basika bamputa/ yina ke balukaka ve,/ nitu na nge yonso katuka ntu tii na makulu,/ yo ta fuluka na bivimbu...../*

Bageste : Bana ya Ebale ta nikisa ntu ti ndima,
« Amen ! »

Kutanga :

45 “*Bampasi yai yonso ta kwisa kubwila beno/ tii kuna beno ta fwa,/ sambu beno lemfukaka ve na Mfumu Nzambi, /...beno landaka ve/ bansiku ya Yandi pesaka beno..../*

Bageste : Bana ya Ebale ta nikisa ntu ti ndima,
« Amen ! »

Kutanga :

....58 “*Yo yina, beno landa mbote-mbote /malongi ya Nzambi /ya bo me sonika na mukanda yai, /beno zitisa zina ya Mfumu Nzambi, /... sambu zina na Yandi /kele ya nene ti ya boma./*

Bageste : Bana YONSO ta nikisa ntu ti ndima,
« Amen ! »

Yimba : Mosi ya bankunga ya kwenda nzila mosi ti lesy yai.

Yula bana --

Niveau Primaire :



- Bana, na mambu yai yonso, kana bo lemfuka na Nzambi, nki mambu ta landa ?
(Lusakumunu mingi mutindu na mutindu, mambu ya kiese)
- Kana bo vila Nzambi, bo lemfuka na Yandi ve, nki mambu ta landa ?
(Lusilu, mambu ya mbi ti ya mawa)

Niveau Secondaire :



- Nki lusakumunu kele mfunu ya bwala na beto ? Na fami na beto ? Na luzingu ya nge mosi ?
[Moniteur, kuwa mabanza ya bana.]

Bana yimba ti kina :



Lemfuka na Nzambi ! Kiese mingi
Kuvila Nzambi ! Mawa na mawa

>|< Kumanisa lesy :

Bantu ya Israele vandaka kukota kapu ya mpa na luzingu na bo—luzingu na kati ya nsi ya Nzambi silaka bo. Mambu ya mfunu vandaka nde bo sosa Nzambi, bo kuwa Yandi, bo lemfuka na Yandi na luzingu yina. Kiteso mosi na beto bubuyai. Beto bantu ya Nzambi fweti wila Nzambi, ebuna Yandi lenda sakumuna beto.

Bana tuba verse ya kulonguka :

Kulonga 28 :2 ti 6/

2 Beno lemfuka na Mfumu Nzambi.../ebuna beno ta monaka/ mambote yai yonso./

6 Mfumu Nzambi ta sakumunaka beno/ na luzingu na beno yonso./

Devoir sambu na bakristo :



Beno ya me yamba Yesu dezia na luzingu na beno, mono ke pesa beno

bakristo devoir yai : Na mposo ke kwisa, tula ngolo kuwila ndinga ya Nzambi, kulemfuka na yonso ya nge zaba ya ndinga na Yandi.

Yimba: Mosi ya bankunga ya kwenda nzila mosi ti lesy yai.

Kubinga bavidi :



Kansi kana nge me tula ntima na Yesu ntete ve, zaba nde bisalu ya mbote ta kitula nge mukristo ve. Yo ta kotisa nge na fami ya Nzambi ve. Kaka kana nge ndima nde nge kele nkwasamu, kansi Yesu fwilaka nge, nge binga zina na Yandi kugulusa nge, ebuna nge mpi lenda kituka mukristo. Kana nge zola beto kutendula mambu yai kuluta, to kusamba ti nge sambu na kuyamba Yesu, bikala awa na bakiti yai na nima ya ecodim, ebuna beto ta sadisa nge.

Kana ntangu lunga :

Longa mikanda ya Bible. Tala bangindu na nsuka ya mukanda yai.

==NSUKA YA LESO 6

Leso 7. Bantu ya Gabaoni kusaka bantu ya Israele.

I. Preparatio ya moniteur--

Moniteur, leso yai ke monika na Yozue kapu 9.

Moniteur, bakisa kikuma ya leso yai :

Beto kwikila mambu yonso ve ya bantu ke tuba, kansi beto tesa yonso na ndinga ya Nzambi, ti beto lomba mayele ya Nzambi na mambu yonso, sambu beto bakisa nde Satana kele mukusi ya ngolo.

Moniteur, yilama na verse ya kulonguka :

2 Yoane 1 :7

Bantu mingi ya luvunu me panzanaka na nsi-ntoto. Bo ke ndimaka ve nde Yesu Kristo kwisaka awa na nsi-ntoto, Yandi kitukaka muntu. Muntu ya mutindu yina, yandi kele muntu ya luvunu, yandi kele mbeni ya Kristo.

Moniteur, yilama na bankunga ya kwenda nzila mosi ti leso yai :

Kuwa Bible

Satana Kwisaka Kumeka Yesu

II. Kureviser —

Kulanda devoir ya mposo me luta :

Na mposo me luta, beto pesaka beno bakristo devoir mosi ya nene—kuwila ndinga ya Nzambi, ti kulemfuka na yonso ya beno bakisa na kati na yo.

Nani lenda songa beto nki yandi salaka na mposo yai sambu na kulemfuka na ndinga ya Nzambi ? Matondo na beno yonso ya ke tula ngolo kusala badevoir. Yai ta sadisa beno na kuyela na kikristo.

Reviser :

Na mposo me luta, beto monaka nde bantu ya batribu ya nkaka mataka na bibaka ya bangumba zole.

↑ Nki bangumba yina ?
(Ebale ti Garizime)

- ↑ Banganga-Nzambi kwendaka wapi ?
(Na vale na kati ya bangumba yina)
- ↑ Banganga-Nzambi tangilaka bo nki ?
(Mpila Nzambi ta sakumuna bo kana bo lemfuka na Yandi, ti mambu ya mbi (bansilu) ya ta landa kana bo lemfuka ve.)
- ↑ Bo yonso tubaka nki na yonso ya bo tangaka ?
(Amen. Bo ndimaka yo yonso.)

III. Kulonga Bana Leso Yai –

Kuyantika Leso :

Bana, keti muntu ya nkaka me kusa nge, me songaka nge mambu ya vandaka kieleka ve ? Keti nge kwikilaka luvunu na yandi ? Mpasi mingi.

Beto lenda ve kwikila konso mambu ya bantu ke tubaka.

[*Moniteur, songa bana verse ya kulonguka. Tangila bo, ebuna bo landa nge ndambu-ndambu, kaka mbala zole.*]

2 Yoane 1 :7

Bantu mingi ya luvunu/ me panzanaka na nsi-ntoto./ Bo ke ndimaka ve/ nde Yesu Kristo kwisaka awa na nsi-ntoto,/ Yandi kitukaka muntu./ Muntu ya mutindu yina,/ yandi kele muntu ya luvunu,/ yandi kele mbeni ya Kristo.

Bubuyai beto ta mona mpila nde ndambu bantu ya Kanana kusaka bantu ya Israele. Yozue kapu 9.

Developpement—Malungi ya nene ya Leso Yai na Bandambu 5 :

7.1 Bantu ya nsi yina ya bwala Gabaoni, bo waka boma, yo yina, bo salaka lukanu kukusa Yozue ti bantu ya Israele.

Tangila bana : Yozue 9 :3-5



3 Kansi Ba-Hivi ya bwala Gabaoni,
ntangu bo mpi waka mutindu Yozue
salaka Yeriko ti Ai,

4 bo zengaka nde bo fweti kusa yandi. Bo
yidikaka bima ya kudia, bo bakaka basaki ya

kupasuka... ti mabungu ya kutobuka... ebuna bo tulaka yo na zulu ya bampunda.

5 Bo Iwataka bilele ya kupasuka... ti basandale ya kufwa... Bo bakaka mpi mampa ya kuyuma me baka lubungi.

Yula bana --

Niveau Primaire :

- Bantu ya Gabaoni salaka lukanu kusala nki ?
(Kukusa Yozue ti bantu ya Israele)

Niveau Secondaire :

- Bima yonso ya bo bakaka monikaka bonso yo vandaka nki mutindu ?
(Ya ntama)

Bana sala bageste :



Bana tubana bo na bo bonso bo ke sala lukanu nakinsweki sambu na kukusa muntu.

Bana yimba ti kina :



O, Yozue, keba !
Mbeni zola kusa nge.

7.2 Bo kusaka Yozue nde bo vandaka ve bantu ya nsi ya Kanana, kansi bo me katuka ntama.

Tangila bana : Yozue 9 :6-13



6 ...Bo tubaka na Yozue ti na bantu na yandi nde : « Beto me katuka ntama, beto me kwisa kuwakana ti beno. »

9 ... "Mfumu, beto me katuka ntama mpenza. Beto me kwisa sambu beto me wa mambu ya kuyituka ya Mfumu Nzambi...na nge, salaka na nsi ya Ezipte....

11 ...kana beno zola, beto wakana.

12 Tala mampa na beto yai. Ntangu beto bakaka yo na banzo na beto na kwisa, yo vandaka ya tiya, kansi ntangu yai, yo me yuma, yo me baka lubungi.

13 ...Bilele ti basandale na beto mpi, yo me fwa-fwa sambu na vwayaze ya nda ya beto me sala."

Yula bana --

Niveau Primaire :

- Nki luvunu ya nene bo tubaka na
? Yozue ?
(Bo me katuka ntama.)

Niveau Secondaire :

- Sambu na nki Yozue kwikilaka luvunu na bo ?
?? (Sambu na bilele ya ntama na bo ti mampa ya kuyuma na bo. Yo monikaka bonso bo me sala bilumbu mingi na vwayaze. Kansi yonso vandaka luvunu.)

Bana sala bageste :



Bana sala bageste bonso bo ke songa bilele na bo ya me nuna na vwayaze ya nda.

Bana yimba ti kina :



Bo kusaka Yozue
Luvunu na bo kaka !

7.3 Yozue lombaka conseye ya Nzambi ve, ebuna yandi salaka erere na kuwakana ti bo.

Tangila bana : Yozue 9 :14-15

- 14 Bantu ya Israele ndimaka ndambu ya madia ya bantu ya Gabaoni pesaka bo, kansi bo vilaka na kwenda kuyula Mfumu Nzambi.

15 Yozue wakanaka na bo nde yandi ta nwanisa bo bitumba ve, yandi ta fwa bo mpi ve...

Yula bana --

Niveau Primaire :

- Sambu na kubenda diaka mabanza ya bantu ya Israele, bantu ya Gabaoni pesaka bo nki, ti bantu ya Israele bakaka yo ?
? (Ndambu ya madia)

- Bo vilaka kima mosi ya nene, ya mfunu. Bo vilaka kusala nki ?
(Kuyula Mfumu Nzambi)

Niveau Secondaire :



- Na kuwakana ya Yozue ti bambeni yai, yandi silaka bo nki mambu zole ?
(Yandi ta nwanisa bo ve, ti yandi ta fwa bo ve.)
- Keti nge bambuka nki Nzambi songaka yandi kusala na bantu yonso ya nsi yai ?
(Kufwa bo yonso.)

Bana sala bageste :

Zole-zole, bana sala bonso yai : Mosi sala luse ya makasi kusonga nde yandi kele mbeni. Mwana ya zole simba yandi na mapeka bonso nduku kusonga kuwakana.

Bana yimba ti kina :



Bo wakana na bambeni
Sambu bo yulaka Nzambi ve. Mawa !

7.4 Na ntangu fioti, bo monaka nde bantu yina zingaka penepene, bo monaka nde bo me kusa bo.

Tangila bana : Yozue 9 :16-27

16 Bilumbu tatu lutaka ntangu bo wakanaka na bantu ya Gabaoni, bantu ya Israele kwisaka kuzaba nde, ya kieleka, bantu yai ke vandaka penepene na bo.

17 Bantu ya Israele simbaka nzila ...na nima ya bilumbu tatu, bo kumaka na babwala ya bantu yina vandaka kuzinga....

Yula bana --

Niveau Primaire :



- Na ntangu fioti, bantu ya Israele kwisaka kuzaba nki ?
(Bantu yina ya Gabaoni zingaka penepene. Bo me kusa bo kutuba nde bo zingaka ntama na nsi ya nkaka.)

Niveau Secondaire :



- Bo kwisaka kukuta babwala na bo na kaka bilumbu ikwa ?
(Bilumbu tatu)

Bana sala bageste :



Bana tambula kaka fioti, bo tanga "Kilumbu mosi, kilumbu ya zole, kilumbu ya tatu." Bo kanga, ebuna bo tuba nde: "Beno ! Beno zinga penepene ! Beno me kusa beto !"

Bana yimba ti kina :



Nswalu bo me bakisa nde
Bambeni me kusa bo. Mawa !

7.5 Yo yina, Israele fwaka ve bantu ya Gabaoni, kansi bo kumisaka bo basielo.

Tangila bana : Yozue 9 :18-27



18 Kansi bo fwaka bo ve, sambu
bambuta ya Israele zengaka na zina
ya Mfumu Nzambi...

24 Bantu ya Gabaoni tubaka nde : « Mfumu, beto salaka mutindu yai mpamba ve sambu beto waka nde Mfumu Nzambi...na nge, songaka Moize...nde Yandi pesa beno ntoto yai yonso... Beto monaka beno boma mingi...»

25 Ntangu yai, beto kele na maboko na nge, sala beto mutindu nge me yindula.”

27 ebuna (Yozue) pesaka bo kisalu ...

Yula bana --

Niveau Primaire :



- Sambu na nki bantu ya Israele monaka ve mpila ya kufwa bantu ya Gabaoni ?
(Bo me zenga zina ya Mfumu Nzambi nde bo ta fwa bo ve.)

Niveau Secondaire :



- Sambu na nki bantu ya Gabaoni vandaka na boma sambu na bantu ya Israele ?
(Sambu bo waka nde Nzambi na bo

- me sila Moize nde Yandi ta pesa bo ntoto yina yonso.)
- Na nima luvunu na bo me zabana, bantu ya Gaboni salaka nki ? (Bo ndimaka nde bo vandaka na maboko ya bantu ya Israele.)
 - Na nsuka, bantu ya Israele salaka nki ti bo bantu ya Gabaoni ? (Bo kumisaka bo bampika ti pesaka bo kisalu.)

Bana sala bageste :



Bana sala bageste bonso bantu ya Gabaoni ke sala kisalu ya kunata nkuni mpi kunata masa.

Bana yimba ti kina :



Bantu ya Gabaoni kumaka bampika.

>|< Kumanisa lesò :

Nzambi me songa bo nde kana bo bika bantu ya ntoto yina na moyo, bantu yina ta benda bo kusala mbi ti kusamba banzambi na bo. Yo yina, Nzambi songaka nde bo kufwa bo yonso. Kansi ntangu yai, ndambu ya bantu me bikala nde bo lenda manisa ve. Bo silaka bantu yina na zina ya Nzambi nde bo ta fwa bo ve, bo ta nwanisa bo ve. Bo me bwa na mutambu ya mbeni, yonso sambu bo yulaka Nzambi ve.

Bana tuba verse ya kulonguka diaka :

Bo tuba 2 Yoane 1:7 fraze par fraze na nima ya nge, mbala zole.

Bantu mingi ya luvunu/ me panzanaka na nsi-ntoto./ Bo ke nadimaka ve/ nde Yesu Kristo kwisaka awa na nsi-ntoto,/ Yandi kitukaka muntu. / Muntu ya mutindu yina/, yandi kele muntu ya luvunu,/ yandi kele mbeni ya Kristo./

Bana yimba nkunga :

Kuwa Bible

Devoir sambu na bakristo :



Bantu ya luvunu mpi kele mingi na beto bubuyai. Malongi ya luvunu kele mingi, kansi bantu fika yo na

bandinga ya ke monika kitoko. Beto fweti tula ngolo kuyindula kana yina ya bantu ke tuba ke kwenda nzila mosi ti Ndinga ya Nzambi, to ve. Beto fweti yula Nzambi, lomba Yandi kusonga beto mambu ya kieleka.

Devoir ya mono ke pesa beno bakwikidi na mposo yai kele kutesa konso malongi ya nge ke wa na Ndinga ya Nzambi, Bible na beto. Yandi ta sadisa nge kuzaba mambu ya kieleka ti mambu ya luvunu.

Kubinga bavidi :



Kana nge me kwisa na Yesu ntete ve bonso Ngulusi na nge, nge me bikala na katì ya kimfumu ya luvunu ya Satana. Nge lenda katuka na kimfumu ya mbeni yina bubuyai kana nge ta yamba Yesu Kristo, Mwana ya Nzambi. Yandi fwaka sambu na masumu na nge ti telamaka na lufwa. Yandi ta pesa nge ntima ya mpa, Yandi ta pesa nge nzala ti ngolo kubika nzila ya masumu.

Kana nge me ndima Yesu ntete ve, kansi bubu nge zola kundima Yandi, kwisa vanda awa na kiti yai ti bikala na nima ya ecodim. Mono ta vanda na kiese kusolula ti nge mpi kusamba ti nge sambu nge kuzaba Yesu.

Kana ntangu lunga :

Longa mikanda ya Bible. Tala bangindu na nsuka ya mukanda yai.

==NSUKA YA LESO 7

Leso 8. Nzambi salaka kimpa kupesa bo ntangu sambu Israele kununga bamfumu 5.

I. Preparatio ya moniteur--

Moniteur, lesy yai ke monika na Yozue 10 :1-28

Moniteur, bakisa kikuma ya lesy yai :

Beto landa Nzambi mbote ti tula Yandi ntima, sambu beto zaba nde Nzambi kele na ngolo yonso. Kana Yandi ke nwana sambu na beto, ata mbeni mosi lenda telama ve.

Moniteur, yilama na verse ya kulonguka :

1 Yoane 4 :4

*Bana na mono, beno kele bana ya Nzambi.
Beno me nungaka baprofete yina ya luvunu;
sambu Mpeve yina kele na ntima na beno,
Yandi kele ngolo kuluta bampeve yina kele na
bantu ya nkaka awa na nsi-ntoto.*

[NB: Moniteur, kana nge ke longa bana ya fioti (preskolere), longa kaka parti ya kele sulinye.]

Moniteur, yilama na bankunga ya kwenda nzila mosi ti lesy yai :

Mosi na Tatu Ngemba Ikele, vs. 3, Mpeve Ikele

II. Kureviser —

Kulanda devoir ya mposo me luta :

Devoir beto pesaka beno bakristo na mposo me luta vandaka kutesa konso malongi ya beno waka na ndinga ya Nzambi, kulomba mpi Nzambi kusonga nge kana yo vandaka kieleka to kieleka ve. Nani tesaka malongi ya Yandi waka na Ndinga ya Nzambi ? Nani waka dilongi ya kwendaka nzila mosi ve ti Ndinga ya Nzambi ? [Moniteur, pesa bana mwa-ntangu kutuba kana bo ke na kima kutuba.] Landa kaka kusala yo, ebuna muntu ta kusa beno ve.

Reviser :

↑ Sambu na nki bantu ya Israele wakanaka ti bantu ya Gabaoni ? (Sambu bo yulaka Nzambi ve, ebuna, bantu yina kusaka bo.)

III. Kulonga Bana Lesy Yai –

Kuyantika Leso :

Beto me mona mpila bantu ya Israele wakanaka ti bantu ya Gabaoni. Bubuyai beto ta mona mpila yo kotisaka bo na mpasi. Kansi, ata bo me bebisna mambu ya bantu ya Gabaoni, Nzambi me bika bo ve. Beto ta mona bubuyai mpila mosi extraordinere ya Yandi nwanaka sambu na bo.

Developpement—Malongi ya nene ya Lesy Yai na Bandambu 5 :

8.1 Bamfumu 5 wakanaka, bo kwisaka nzila mosi kunwanisa Gabaoni, ebuna Gabaoni lombaka lusadisu ya Israele.

Tangila bana : Yozue 10 :1-6



1 ...ntotila ya bwala Yeruzalemi waka
nde Yozue me botula bwala Ai, yandi
me fwa-fwa yo kimakulu...

2 Nsangu yai pesaka bantu ya Yeruzalemi
boma mingi...

3 Yo yina, (yandi) tindaka ndinga na bamfumu
...ya bwala (tanu). Yandi lombaka bo nde :

4 « Beno kwisa kusadisa mono na kunwanisa
bwala Gabaoni, sambu bantu na yo me
wakana na Yozue ti ...bantu ya Israele.

5 Ebuna bamfumu yai tanu ya ntoto ya Ba-Amore...na basoda na bo, bo kwisaka
kuziunga bwala Gabaoni sambu na kunwanisa
yo.

6 Bantu ya Gabaoni tindaka ndinga na
Yozue...nde : « Mfumu, kubikisa beto ve.
Kwisa nswalu, nge sadisa beto... Bamfumu
yonso ya ntoto ya Ba-Amore kuna na ndambu
ya bangumba me vukana kisika mosi sambu
na kwisa kunwanisa beto.”

Yula bana --**Niveau Primaire :**

- Nani vandaka kutwadisa bamfumu 5 ya Ba-Amore kunwanisa Israele ? (Mfumu ya Yerusalem)
- Bo kwisaka kuziunga nki bwala ? (Bwala Gabaoni)
- Na lesu me luta, nani wakanaka na bwala Gabaoni ? (Bantu ya Israele, sambu bantu ya Gabaoni kusaka bo.)

Niveau Secondaire :

- Sambu na nki bantu ya Gabaoni monaka nde bo lenda lomba lusadisu ya bantu ya Israele ? (Sambu bo me wakana ti bo. Gaboni me kuma bonso bwala ya kinduku (français allié)

Bana sala bageste :

Tula bana na bandambu zole. Ndambu mosi sala bonso bantu ya Gabaoni. Bo kangama na sika mosi. Ndambu ya zole sala bonso basoda ya babwala tanu ya Ba-Amore. Bo ziunga bantu ya Gabaoni. Bo songa bo bageste bonso bo zola nwana ti bo.

Bana yimba ti kina :

Nki beto ta sala ?
Bambeni me ziunga Gabaoni
Nki beto ta sala ?

8.2 Nzambi songaka Yozue nde Yandi me pesa bo na maboko na yandi.**Tangila bana : Yozue 10 :7-8**

7 Yozue ti basoda na yandi yonso simbaka nzila na kwenda kusadisa bo...

8 Mfumu Nzambi tubilaka Yozue nde : « Kutina bo boma ve. Mono me dezia pesa bamfumu yai na maboko na nge, ata mosi ta kuka ve kunwana na nge. »

Yula bana --**Niveau Primaire :**

- Keti basoda ya Israele kwendaka kusadisa bantu ya Gabaoni, to bo kwendaka ve ? (Bo kwendaka.)
- Nani songaka bo nde Yandi ta pesa basoda ya Gabaoni na maboko na bo ? (Nzambi)

Niveau Secondaire :

- Bandinga ya Nzambi tubaka, nki mutindu nge banza yo sadisaka basoda ya Israele ? (Yo pesaka bo kikesa kunwana, sambu bo zabaka nde Nzambi vandaka kunwana ti bo.)

Bana sala bageste :

Bana yonso sala bageste bonso bo kele bantu ya Israele. Bo tala zulu bonso Nzambi ke tuba, bo tula maboko na Iweka ya makutu sambu bo kuwa mbote. Bo songa luse ya kiese na bandinga ya Nzambi tuba.

Bana yimba ti kina :

Kuwa boma ve.
Nzambi me pesa bo na maboko na beto.
Nzambi Yandi mosi ke nwana sambu na beto.

8.3 Nzambi nwanisaka bamfumu yina. Yandi kumisaka bo kisakasaka sambu bo tina, Yandi losilaka bo mpi matadi ya nene ya mvula (glase).**Tangila bana : Yozue 10 :9-11**

9 Yozue ti basoda na yandi tambulaka mpimpa ya mvimba, ebuna bo kwisaka kunwanisa bantu ya Amore na kintulumukina.

10-11 Mfumu Nzambi kumisaka ba-Amore kisakasaka na meso ya bantu ya Israele. Bo

*fwaka-fwaka bo... bo kulaka bo... bo landaka
bo tii kuna... Ntangu bo vandaka ke tina,
Mfumu Nzambi bwisilaka bo matadi ya nene
ya mvula. Ba-Amore yina kufwaka na matadi
vandaka mingi kuluta bayina kufwaka na
bitumba.*

Yula bana --

Niveau Primaire :

- Nani kumisaka basoda ya Amore
kisakasaka?
?
(Nzambi)
- Nani kulaka nani ?
(Bantu ya Israele kulaka basoda ya
Amore.)
- Nzambi losilaka basoda ya Amore
nki ?
(Matadi ya nene ya mvula)

Niveau Secondaire :

- ??
- Nani lenda songa bampila zole
Nzambi nwanisaka mbeni yina ?
(Yandi kumisaka basoda na bo
kisakasaka, ti Yandi losilaka bo
matadi ya nene ya mvula.)

Bana sala bageste :

Bana sala bageste bonso bo kele
baloda ya Ba-Amore, bo ke mona
mpasi, ti bo ke fwa sambu Nzambi ke
losila bo matadi ya nene ya mvula.

Bana yimba ti kina :

?? Nzambi Yandi mosi
Nwanisaka bambeni na bo. O yea !

8.4 Ntangu ti ngonda telamaka na zulu sambu na lombilu ya Yozue. Yai pesaka bo ntangu kumanisa mvita yina.

Tangila bana : Yozue 10 :12-14

?? 12 Kilumbu ya Mfumu Nzambi
pesaka bantu ya Amore na maboko
ya bantu ya Israele, Yozue sambaka
Mfumu Nzambi. Na meso ya bantu
yonso, yandi tubaka nde :

« *Nge ntangu, telama na zulu ya bwala
Gabaoni ;
Nge ngonda, telama na zulu.... »*

*13 Ebuna ntangu ti ngonda telamaka tii kuna
bantu ya Israele bedisaka bambeni na bo...
Ntangu telamaka na kati-kati ya zulu kilumbu
mosi ya mvimba.*

*14 Kilumbu ya mutindu yai me bwaka ntete
ve, ata na ntangu ya ntama, ata na ntangu
yina ;na kilumbu yango Mfumu Nzambi salaka
mambu yonso ya muntu lombaka Yandi na
kusala. Mfumu Nzambi Yandi mosi nwanaka
bitumba nzila mosi ti na bantu ya Israele.*

Yula bana --

Niveau Primaire :

- ?
- Yozue lombaka Nzambi nki mambu ya
nene ?
(Nde ntangu ti ngonda kutelama na
zulu)
 - Ntangu ikwa yo telamaka na zulu ?
(Kiteso ya kilumbu mosi ya mvimba)
 - Na ntangu yina ya Nzambi pesaka bo,
basoda ya Israele salaka nki ?
(Bo manisaka kubedisa bambeni na
bo.)

Niveau Secondaire :

- ??
- Na histoire ya ntoto, mbala ikwa
yo me salama mutindu yai nde
ntangu ti ngonda kutelama na
zulu sambu muntu me lomba
Nzambi yo ?
(Kaka mbala mosi mpamba)
 - Nani lenda songa bampila 3 ya
Nzambi nwanaka sambu na
Israele ?
(Yandi kumisaka basoda ya mbeni
kisakasaka, Yandi losilaka bo
matadi ya nene ya mvula, ti Yandi
kangaka ntangu ti ngonda, bo
telama na zulu.)

Bana sala bageste :

Bana nangula diboko mosi bonso ntangu ke tambula na zulu. Ntangu nge moniteur tuba "Kutelama," diboko na bo yonso telama na zula, tii ntangu nge tuba « Tambula » diaka, ebuna maboko kukita.

Bana yimba ti kina :

Yozue lombaka Nzambi
Ntangu telama na zulu.
Nzambi waka yandi
Ye Yandi salaka yo. Walala.
Ye Yandi salaka yo !

8.5 Bamfumu yina tinaka ti kudibumbaka, kansi Nzambi sadisaka Yozue kubedisa bo yonso.**Tangila bana somere yai ya Yozue 10 :15-28.**

Bamfumu yina tinaka, bo mekaka kudibumba na dibulu mosi ya matadi. Ntangu bantu songaka Yozue, yandi songaka basoda na yandi kukanga munoko ya dibulu yina na matadi. Na nima, bo fwaka bo yonso mutindu Nzambi songaka bo kusala. Mpidina bo bedisaka babwala yina yonso.

Yula bana –**Niveau Primaire :**

- Bamfumu ya vandaka kunwanisa bantu ya Israele, bo kwendaka kudibumba wapi ?
(Na dibulu ya matadi)
- Yosue salaka nki na dibulu yina ?
(Yandi kangaka munoko na yo tii ntangu bo lenda kwisa kufwa bo.)

Niveau Secondaire :

- Sambu na nki na nsuka Yozue fwaka bamfumu yina ?
(Nzambi songaka bo kusala yo.)

Bana sala bageste :

Bana yonso sala bonso bo kele basoda ya Israele ke tula ditadi na zulu ya munoko ya dibulu sambu na kukanga yo.

Bana yimba ti kina :

Bo bedisaka bambeni yonso
Sambu Nzambi nwanaka ti bo. O yea!
Sambu Nzambi nwanaka ti bo.

>|< Kumanisa lesò :

Nzambi kele kunwana sikamosi ti bantu na Yandi. Nzambi kele kunwana sambu na bo. Beto bakristo vanda na boma ve, kansi beto tula ntima na Nzambi.

Bana tuba verse ya kulonguka :

Bana tuba 1 Yoane 4 :4, fraze na fraze na nima ya nge, mbala tatu.

*Bana na mono, beno kele bana ya Nzambi./
Beno me nungaka baprofete yina ya luvunu ;/
sambu Mpeve yina kele na ntima na beno,/
Yandi kele ngolo/ kuluta bampeve yina kele na
bantu ya nkaka/ awa na nsi-ntoto./*

[NB: Moniteur, kana nge ke longa bana ya fioti (preskolere), longa kaka parti ya kele sulinye.]

Bana Yimba Nkunga :

Ngemba Ikele, vs. 3, Mpeve Ikele

Devoir sambu na bakristo :

Devoir mono ke pesa beno bakristo, yo yai :Na mposo ke kwisa, konso ntangu beno kuwa boma, lomba lusadisau ya Nzambi. Yandi zola kunwana sambu na nge.

Kubinga bavidi :

Kansi zaba nde, kana nge me yamba Yesu ntete ve, Nzambi kele kunwana sambu na nge ve. Beto yonso, beto kele bambeni na Yandi tii ntangu ya beto balula ntima, beto yamba Yesu, Mwana ya Nzambi, bonso Mvulusi ti Mfumu. Kana nge me yilama na

ntima kuyamba Yandi bubu, kwisa na
mono na nima ya ecodim sambu
mono sadisa nge.

Kana ntangu lunga :

Longa mikanda ya Bible. Tala bangindu na
nsuka ya mukanda yai.

==NSUKA YA LESO 8

Leso 9. Bo bakaka penepene na ntoto ya mvimba, mpila Nzambi songaka bo.

I. Preparatio ya moniteur--

Moniteur, lesy yai ke monika na

Yozue 10 :29-43 ; 11 :1-23; 12 :1-23. Histoire kele nda ti badetaiye mingi. Beto ta sola kaka ndambu baverse na kati kutanga ti bana.

[*Moniteur, beto ta longa lesy yai na mutindu ya nkaka. Muntu mosi ta tanga lesy ndambu ndambu. Muntu ya nkaka ta songa bacarte ya foto kaka ntangu ya yandi ke tanga. Na kuyilama, nge ta sola mutangi ya ngolo ti yandi ta sala pratike ya kutanga lesy.*]

Moniteur, bakisa kikuma ya lesy yai :

Beto bika zuzema (français jugement) na maboko ya Nzambi. Beto bakisa nde Israele fwaka bantu ya Kanana sambu Nzambi Yandi mosi me zenga mbi na bo, nde bo fweti kufwa.

[*Atasio bamoniteur ya bana ya fioti (preskolere) !! Lesy yai lenda vanda mpasi sambu na bana ya fioti kubakisa. Tanga yo nge mosi ti zenga sambu na bana na nge. Kana nge mona yo mpasi sambu na bo, kaka luta lesy yai ti landa na lesy 10.*]

Moniteur, yilama na verse ya kulonguka :

Roma 12 :19

Banduku na mono, beno vutula mbi na mbi ve ata fioti. Kansi bika Nzambi kuwila bantu yina ke salaka mbi makasi. Sambu Mfumu Nzambi ke tuba na Mukanda na Yandi nde : « Mono muntu ta vutula bo ndola ti kumisa bo mpasi sambu na mbi ya bo salaka Mono. »

[*Moniteur, NB nde kana nge ke longa bana ya fioti (preskolere), bo ta longuka kaka bandinga ya beto me sulinye.*]

Moniteur, yilama na nkunga ya kwenda Nzila mosi ti lesy yai :

Beto Vutula Mbi--ve, ve, ve

II. Kureviser —

Kulanda devoir ya mposo me luta :

Na mposo me luta, beto lombaka beno bakristo kulomba lusadisu ya Nzambi konso ntangu ya beno vandaka na boma. Nani vandaka na boma na mposo me luta, kansi yandi lombaka Nzambi kusadisa yandi ? Nani zola kusonga beto nki lutaka ?

Reviser :

↑ Nani lenda songa beto bampila ya Nzambi nwanaka sambu na bantu ya Israele na lesy me luta ?
(Yandi kumisaka basoda ya mbeni kisakasaka, Yandi losilaka bo matadi ya nene ya mvula, ti Yandi kangaka ntangu ti ngonda, bo telama na zulu sambu Israele lenda manisa mvita.)

III. Kulonga Bana Lesy Yai –

Kuyantika Leso :

Beto me mona mpila Yozue ti basoda ya Israele fwaka babwala mingi. Sambu na nki bo salaka mpidina ? Keti Nzambi zola beto kusala mpidina ? Beto ta yindula mambu yina na lesy ya bubu.

Developpement—Malongi ya nene ya Leso Yai na Bandambu 7 :

[*Moniteur, ntangu yai, mutangi ta tanga lesy, ti mbala mosi muntu ya nkaka ta songa bacarte ti bafoto ya kwenda na konso nti ya dilongi.*

9.1 (Songa Carte 9.1) Yozue botulaka babwala mingi diaka na ndambu ya sude.

Beto tanga na Yozue kapu 10 tii na 12 mpila nde Yozue landaka kubotula babwala mingi ya nkaka. Ntete yandi twadisaka basoda na yandi na ndambu ya sude yonso (10 :40). « Yozue botulaka ntoto yonso. Yandi bedisaka bamfumu ya bantoto yina ...Yandi bikisaka ata muntu mosi ve, yandi fwaka bo yonso, mutindu Mfumu Nzambi tubaka» (10 :42). Yandi botulaka bantoto yai yonso ...sambu

Mfumu Nzambi, Nzambi ya Israele, vandaka kunwana nzila mosi na bantu ya Israele.

Na nima, bamfumu ya ndambu ya norde, bo waka mpila Yozue vandaka kununga-nunga. Bo waka boma, ebuna bo vukanaka, sambu bo yonso kwisa kunwanisa yandi mbala mosi.

Bo vandaka mingi-mingi-mingi. Mpila kutanga bo ve. Kansi (11 :6) "Mfumu Nzambi tubaka na Yozue nde : "Kuwa boma ve...Mono ke pesa bo yonso na maboko na nge." Yo yina, Israele nungaka, bo bedisaka bo kimakulu.

Na mpila yina, Yozue botulaka ntoto yonso (11 :16). Kaka bantu ya Gabaoni, Yozue fwaka bo ve, sambu bo me wakana ti yandi. Yozue fwaka ata bana na Anakimi ya nene-nene, ti ya nda-nda. Kaka ndambu na bo bikalaka na babwala tatu mpamba. Na nima, ntoto vandaka na ngemba, bitumba vandaka diaka ve.

Yula bana --

Niveau Primaire :

- Ket Yozue botulaka babwala mingi to fioti ?
(Mingi)
- Ket yandi salaka yo na ngolo na yandi mosi ?
(Ikele ve. Na ngolo ya Nzambi.)
- Ket kubotula babwala yai vandaka kaka mabanza na yandi mosi ?
(Ikele ve. Nzambi songaka Yozue kusala yo, ebuna yandi kaka lemufuka na Nzambi.)
- Bantu ya nene-nene zingaka kuna. Ket ngolo na bo lutaka yina ya Yozue ti Israele ?
(Ikele ve, sambu Nzambi nwanaka nzila mosi ti bo.)

Niveau Secondaire :

- Israele vandaka kununga mbote. Ebuna, sambu na nki nge banza bo bikisaka ndambu bantu ya nene-nene na babwala tatu ?

[Moniteur, kuwa mabanza ya bana. Beto zaba ve sambu na nki bo bikisaka bo, kansi yo vandaka kifu ya nene ya pesaka bo mpasi na nima.]

9.2 (Songa Carte 9.2) Yozue fwaka babwala ya ntoto ya Kanana, ti fwaka bo yonso. Yandi salaka yo ve na luzolo to na mabanza na yandi mosi, kansi kaka sambu Nzambi songaka yandi mutindu yina.

Yozue ti bantu ya Israele botulaka babwala ya Kanana ve sambu bo zolaka bantu yina ve, to sambu bantu yina me sala bo mbi. Bo vandaka ve na makasi na bantu yina. Bo yidikaka ve lukanu na bo mosi kusala yo. Bo salaka yo kaka sambu Nzambi Yandi mosi songaka bo kusala yo. Bo salaka yo kaka sambu na kulemfuka na ndinga ya Nzambi.

Nzambi kele zuzi ya makanda yonso ti babwala yonso ti bantu yonso. Yandi me tala mbi ya babwala yina tuka ntama. Mbi na bo me kuma ngolo ya zolaka kubebisa bantoto ya nkaka. Yandi me zenga makambu na bo nde bo fweti kufwa.

Yula bana --

Niveau Primaire :

- Ngindu na kufwa babwala yai vandaka ya nani ?
(Ya Nzambi)
- Sambu na nki Nzambi zengaka nde bo fweti kufwa ?
(Sambu na mbi na bo ya nene)

Niveau Secondaire :

- Beto zaba nde Nzambi ke kangaka ntima mingi sambu na beto. Kana Yandi zengaka ndola ya lufwa sambu na bantu ya Kanana, yai tuba nki sambu na mbi na bo ?
(Yo me luta mingi, yo zola bebisa bantu ya nkaka.)

9.3 (Songa Carte 9.3) Bantu ya Kanana ya Yozue fwaka, bo vandaka bantu ya mbi mingi

na meso ya Nzambi, bantu ya fwaka bana na bo mosi nkailu na biteki na bo.

Mbala ya nkaka beto bakisa ve barezo yonso ya Nzambi songaka bo na kufwa bantu ya Kanana. Kansi beto zaba yai : Bantu ya Kanana vandaka bantu ya zolaka Nzambi ve. Mosi na kati ya mambi ya bo salaka, bo fwaka bana na bo mosi nkailu na biteki na bo ya mbi. Nzambi zolaka kumanisa mambi ya nene bonso yai, yo kota ve na bantu ya nkaka sambu na kubebisa bo mpi.

Yula bana --

Niveau Primaire :

- **?** Nki vandaka mbi mosi ya nene ya bantu ya Kanana salaka ?
(Bo fwaka bana na bo nkailu na biteki na bo ya mbi.)

Niveau Secondaire :

- ?? ○ Nki mutindu mbi ya ndambu ya bantu lenda bevisa bantu ya nkaka ?
(Kana bo landa mbandu na bo)

9.4 (Songa Carte 9.4) Nzambi kangaka ntima sambu na bantu ya Kanana kuluta bamvula 500, kansi bo balulaka ntima ve. Bo kumaka kuluta mbi kaka. Yo yina, Nzambi zengaka ndola ya lufwa sambu na bo.

Tangila bana somere yai :

Na bilumbu ya ntama, ntangu Nzambi ntete bingaka Abrahami kukwisa na ntoto ya Kanana, Yandi silaka kupesa ntoto yina na fami na yandi. Kansi yo lendaka kusalama na ntangu yina ve, sambu, Nzambi tubaka, masumu ya bantu yina me fuluka ntete ve. Yo fweti kuma mingi mpenza, Nzambi tubaka, "ebuna Mono ta zaba kupesa bo ndola, Mono ta kula bo na ntoto yai" (Kuyantika 15 :16).

Bandonga na bandonga ya bantu lutaka—Abrahami, Izaki, Yakobi, Yozefi, kimpika na Ezipte, Moize...bamvula kuluta 500 lutaka. Mbi ya bantu yina kaka kumaka kuluta ti kuluta. O, mawa! Keti mbi na bo ta suka ve ?

Yula bana --

Niveau Primaire :

- **?** Fami ya Abrahami kingaka bamvula ikwa na ntwala Nzambi pesaka bo nsi ya Kanana ?
(Kuluta bamvula 500)
- Na bamvula 500 yina, keti mbi ya bantu ya Kanana kumaka kuluta mbote to kuluta mbi ?
(Kuluta mbi kaka.)

Niveau Secondaire :

- ?? ○ Nki mutindu beto mona nde Nzambi kangaka ntima sambu na bantu ya Kanana ?
(Yandi kingaka kuluta bamvula 500 na ntwala kupesa bo ndola.)

9.5 (Songa Carte 9.5) Nzambi pesaka Yozue ti basoda ya Israele kisalu ya kulungisa ndola ya Yandi me zenga na zulu na bantu ya Kanana. Nzambi songaka Yozue nde yandi kufwa babwala na bo yonso ti botula ntoto na bo.

Na ntangu ya Yozue, mbi ya bantu ya Kanana me fuluka mingi mpenza. Nzambi ya kele Zuzi ya nene ya bantu yonso, Yandi me zenga ndola ya lufwa sambu na bo.

Mbala mingi, Nzambi pesa kisalu na Yandi na maboko ya beto bantu. Yo yina, Nzambi songaka Yozue nde yandi ti basoda ya Israele, bo kufwa bantu yina. Ntangu me lunga nde Nzambi zolaka kubotula ntoto na bo, ti kupesa yo na bantu ya Israele.

Yula bana --

Niveau Primaire :

- **?** Nzambi me zenga kubotula ntoto ya bantu ya Kanana, kupesa yo na nani ?
(Na bantu ya Israele)
- Yandi pesaka kisalu yai na nani ?
(Na Yozue ti basoda ya Israele)

Niveau Secondaire :

- ??**
- Sambu na nki Nzambi vandaka na kiyeka kuzenga nde bantu ya Kanana fweti kufwa ?
(Sambu Yandi kele Zuzi ya bantu yonso)

9.6 (Songa Carte 9.6) Yozue nwanisaka bwala na bwala, ti yandi nungaka, sambu Nzambi vandaka ti yandi.

Nzambi me pesa Yozue ordre to kisalu. Yozue kwendaka ve kubokuta na Nzambi nde, « O, beto zola ve kufwa bantu. Yandi zabaka nde Nzambi me tuba, yo yina Yandi kwendaka kaka na kulemfuka. Nzambi pesaka Yozue kisalu yina, yo yina Yandi mosi kwendaka kunwana nzila mosi ti basoda ya Israele. Bo vandaka kusala kisalu ya Nzambi. Yo yina, Nzambi nungisaka bo.

Yula bana --**Niveau Primaire :**

- ?**
- Yozue vandaka kulemfuka na ordre ya nani ?
(Ya Nzambi, Yandi mosi)
 - Nani nungisaka bo na bamvita yina ?
(Nzambi)

Niveau Secondaire :

- ??**
- Sambu na nki Nzambi nungisaka Yozue ti bantu ya Israele ?
(Sambu bo vandaka kusala mutindu Yandi songaka bo. Bo vandaka kusala kisalu na Yandi.)

9.7 (Songa Carte 9.7) Bubuyai, na nima ya Yesu, mambu mingi me baluka mutindu ya nkaka. Nzambi me songa beto bakristo kusala mutindu ya nkaka. Bubuyai, beto sala bantu yonso kaka mbote, ti beto bika zuzema na maboko ya Nzambi. Mpidina, beto ke lemfuka na Nzambi bonso Yozue lemfukaka na Yandi.

Na ntuala ya Yesu, masumu mbala mingi bendaka ndola ya lufwa. Bubuyai, mambu

mingi me baluka mutindu ya nkaka, sambu Yesu fwaka kufuta mfuka ya lufwa na beto.

Bubuyai, Nzambi ke songa bantu na Yandi nde bo kufwa bambeni diaka ve. Bubuyai, Yandi me songa nde beto fweti zola bo, sadisa bo, ti sambila bo Nzambi. Kana beto sala mpidina, yai kele mpila beto ke lemfuka na Nzambi bubuyai.

Yula bana --**Niveau Primaire :**

- Bubuyai, keti Nzambi kele kusonga bantu bo kufwa bantu ya nkaka diaka ?
(Ikele ve)
- Sambu na nki beto ke sala yo diaka ve ?
(Sambu Yesu me kwisa kufuta mfuka to ndola ya masumu na beto yonso.)
- Bubuyai, Nzambi ke songa beto bakristo kusala nki na bambeni na beto ?
(Beto zola bo, beto sadisa bo, beto sambila bo Nzambi.)

Niveau Secondaire :

- ??**
- Na bilumbu yina, Yozue lemfukaka na Nzambi ntangu yandi fwaka bantu ya Kanana ti botulaka ntoto na bo. Bubuyai, beto lemfuka na Nzambi nki mutindu ?
(Beto zola bantu yonso, ata bambeni na beto, beto sadisa bo, beto sambila bo Nzambi.)

[Moniteur, ntangu yai, bana lenda tanga verse ya kulonguka. Bo solula disongidila na yo, bo tuba yo mbala tatu malembe-malembe na nima ya nge.

Roma 12 :19

Banduku na mono,/ beno vutula mbi na mbi ve/ ata fioti./ Kansi bika Nzambi/ kuwila bantu yina ke salaka mbi/ makasi./ Sambu Mfumu Nzambi ke tuba/ na Mukanda na

Yandi nde/ : « Mono muntu ta vutula bo ndola /ti kumisa bo mpasi /sambu na mbi /ya bo salaka Mono. »

Bana Yimba Nkunga

Beto Vutula Mbi--ve, ve, ve

>|< Kumanisa lesò :

Mawa mingi na bantu ya Kanana. Bo landaka nzila ya mbi, bo balulaka ntima ve. Bo sosaka Nzambi ve. Bo landaka nzila ya Satana tii ntangu ya bo kwendaka kufuta bana na bo nkailu na bampeve ya mbi. Nzambi kangaka ntima mingi sambu na bo, kansi na nsuka, Yandi zengaka bo ndola ya lufwa.

Yandi pesaka Yozue kisalu ya kulungisa zuzema na Yandi na zulu na bo, ebuna yandi lemufukaka na Nzambi.

Bubuyai, Yesu me futa nkailu sambu na masumu yonso ya beto bantu. Yo yina, Nzambi ke songa beto diaka ve kukwenda kufwa bantu. Bubuyai, Yandi ke songa beto kuzola bambeni na beto, kusadisa bo, kusambilia bo Nzambi. Ndola ya bantu ya mbi, beto bika yo na maboko ya Nzambi. Yandi kele zuzi ya mbote.

Devoir sambu na bakristo :



Kisalu mono ke pesa beno bakristo bubuyai, yo yai : Yindula bantu ya ke pesa nge mpasi to ke pesa nge kiese ve. Konso lumbu, sambila bo Nzambi. Nzambi kusadisa beno.

Kubinga bavidi :



Mbala ya nkaka nge kele bonso bantu ya Kanana. Nge ke landa kaka nzila ya masumu, nzila ya nge mosi. Nzambi ke kanga ntima sambu na nge. Yandi ke kinga nge kubalula ntima, kutula ntima na Yandi bonso Mvulusi, kuyantika kulanda Yandi bonso Mfumu na nge. Yandi me bika zulu, me kulumuka na ntoto yai, Yandi me fwa na zulu ya kulunsi bonso nkailu kufuta ndola ya masumu na nge. Yandi me telama na

lufwa, ke zinga bubuyai sambu na kuyamba bo yonso ya kwisa na lukwikilu na Yandi.

Kana nge me yamba Yandi ntete ve na ntima ti na lizingu na nge, ntangu ya mbote, bubuyai. Kwisa na beto na nima ya ecodim, ebuna beto ta sadisa nge kuyamba Yandi.

Kana ntangu lunga :

Longa mikanda ya Bible. Tala bangindu na nsuka ya mukanda yai.

==NSUKA YA LESO 9

**Leso 10. Bu Yozue me nuna,
Nzambi silaka nde bo ta kula
bantu ya Kanana ya me
bikala. Yo yina, bo manisaka
kupesa konso tribu ntoto na yo.**

I. Preparatio ya moniteur--

Moniteur, lesy yai ke monika na Yozue 13—19. Beto ta mona baverse ndambu-ndambu na bakapu yina.

Moniteur, bakisa kikuma ya lesy yai :

Beto vanda kwikama kusala yina ya Nzambi songa beto, sambu beto bakisa nde Yandi ya me yantika ti beto, Yandi ta sadisa beto tii na nsuka.

Moniteur, yilama na verse ya kulonguka :

1 Tesalonika 5 :24

Nzambi yina ke bingaka beno, Yandi ta sala
yo, sambu Yandi ke salaka kaka mutindu
Yandi ke tubaka.

[*Moniteur, parti ya verse ya kele sulinye
kele sambu na bana ya fioti (preskolere).*]

**Moniteur, yilama na bankunga ya kwenda
nzila mosi ti lesy yai :**

Mono Me Sila Kulanda Yesu
Nani Kele Ngolo ? (Nani ke kwikama ?)

II. Kureviser —

Kulanda devoir ya mposo me luta :

Na mposo me luta, devoir beto pesaka beno bakristo vandaka kutula na lombilu bantu ya ke pesaka nge mpasi. Nanimekaka kusala yo ? Keti yo vandaka mpasi kusala ? Yo kele mbote mingi kulemfuka na ndinga ya Nzambi, ata beto mona yo mpasi kusala yo. Felisitasio na beno ya mekaka kusala yo.

Reviser :

Na mposo me luta, beto monaka nde Yozue fwaka bantu yonso ya Kanana sambu Nzambi pesaka yandi ordre kusala yo. Yandi salaka yo ve na reso personel. Kansi na nima ya Yesu,

shanzema ya nene salamaka. Ntangu yai, Nzambi ke pesa beto bantu nzila diaka ve na kufwa bantu ya nkaka, kansi beto bakristo fweti sala nki na bantu ya pesa beto mpasi ? (Zola bo, kusala bo mbote, kusambilaboo Nzambi.)

III. Kulonga Bana Lesy Yai –

Kuyantika Leso :

Keti muntu me pesa beno kisalu ya beno monaka nene ti ngolo ? Mbala ya naka mama to papa, to oncle, to longi na nzo-nkanda. Nge monaka kisalu yina mpasi, sambu, ata nge salaka ti salaka ti salaka, nge waka bonso kisalu yina, yo ta suka ve.

[*Moniteur, kana bana zola tuba nki kisalu
yandi monaka mpasi, pesa mwa-ntangu fioti
ya bo lenda tuba yo.*]

Nzambi mpi pesaka Yozue ti bantu ya Israele kisalu ya nene kukota nsi ya nene ya Kanana, ti kubotula babwala na yo mosi-mosi. Nzambi me songa bo kubotula ntoto yonso, kansi ntoto vandaka nene, babwala mingi. Na lesy ya bubu beto ta mona nki mutindu bo manisaka kisalu yina ya nene ya Nzambi pesaka bo.

**Developpement—Malongi ya nene ya Lesy
Yai na Bandambu 6 :**

**10.1 Yozue vandaka me nuna, kansi ntoto
mingi bikalaka ya bo fweti botula. Yozue
13 :1**

Tangila bana :

13 :1 *Yozue vandaka me nuna, ebuna
Mfumu Nzambi tubaka na yandi
nde : « Nge me kuma mbuta mpenza,
kansi ntoto ya nkaka me bika na
kubotula. »*

Yula bana –

Niveau Primaire :

- Na ntangu ya mambu ya lesy yai salamaka, Yozue me kuma na nki age ?

(Yandi me kuma mbuta mingi, me nuna.)

- Ata Yozue me sala ngolo, keti yandi me manisa kisalu ya kubotula babwala ya ntoto ya Kanana ?
(Ikele ve. Kisalu mingi me bikala.)

Niveau Secondaire :



- Nzambi tubaka na Yozue ntangu yandi vandaka jeune homme, Yandi tubaka diaka ntangu yandi me nuna. Yai zola songa nki ?
(Nzambi me bikala ti yandi bamvula yina yonso.)

Bana sala bageste :



Bana sala geste na diboko bonso bo kele Nzambi ke songa Yozue ntoto mingi ya me bikala.

Bana yimba ti kina :



Nge, Yozue me nuna,
Nzambi tubaka.
Babwala mingi bikala.
Nzambi tubaka.

10.2 Nzambi silaka kulanda kaka kubotula bantu yina. Yozue 13 :6b

Tangila bana :



13 :6b ... « Mono muntu ta kula bantu yai yonso na ntwala na beno bantu ya Israele. »

Yula bana --

Niveau Primaire :



- Nani silaka kukula bantu ya me bikala ?
(Nzambi Yandi mosi.)
- Bantu ikwa ya Kanana Yandi ta kula ?
(Bo yonso.)

Niveau Secondaire :



- Nzambi silaka kukula bantu yina, kansi bantu ya Israele fweti sala nki ?

(Nzambi me songa bo dezia kunwana ti bo, kubotula bo.)

Bana sala bageste :



Bana sala bageste bonso bo ke kula bantu na sika mosi.

Bana yimba ti kina :



Nzambi mene sila
Yandi ta kula bo yonso.

10.3 Yo yina, Nzambi songaka Yozue kukabila makanda ya Israele bantoto na bo. Yozue 13 :6c-7

Tangila bana :



13 :6c « Nge Yozue, nge ta kabisila bo ntoto mutindu Mono songaka nge.

7 Mpidina, nge ta pesa ntoto na makanda ...bayina me baka ntete kima ve. »

Yula bana --

Niveau Primaire :



Nani fweti kabisa ntoto ?
(Yozue, ntwadisi na bo.)

Niveau Secondaire :



- Nzambi me sila kukula bantu ya me bikala na ntwala na bo. Yo yina, Yandi songaka Yozue nde ntangu me lunga kusala nki ?
(Kupesa makanda yonso ntoto na bo, bayina me baka yo ntete ve.)

Bana sala bageste :



Bana sala bageste bonso bo ke songa bantu bantoto na bo.

Bana yimba ti kina :



Kabisila bantu
Bantoto na bo.

10.4 Yozue fweti bambuka mpi bantoto ya Moize me pesa dezia na makanda ya nkaka. Yozue 13 :15,24, 29, 32

Tangila bana :

- 13 :15,24,29 Ntoto ya Moize
kabisilaka bafami ya dikanda ya
Rubeni... ya Gadi... ya Manase...

32 Yai kele mutindu Moize kabisaka ntoto yina
vandaka na ndambu ya este ya Yeriko ti ya
Yordani...

Yula bana --**Niveau Primaire :**

- Nani vandaka muntu ya ntete
kuyantika kukabisa ntoto ?
(Moize, muntu ya twadisaka bo tii na
ntoto yina.)

Niveau Secondaire :

-
- Moize kabisaka ntoto ya vandaka
wapi ?
(Na este ya Yeriko ti ya masa ya
Yordani.)

Bana sala bageste :

- Bana yonso songa geste wapi kele
este.

Bana yimba ti kina :

- Yozue, kubambuka
Ntoto Moize me pesaka dezia.

**10.5 Yozue zikisaka nde makanda yonso
vandaka na kiese na ntoto ya bo me baka.****Yozue 17 :14-18****Tangila bana :**

- 17 :14 Bana ya Yozefi kwisaka
kutubila Yozue nde : « Sambu na nki
nge me kabilia beto kitini mosi
mpamba ya ntoto ? Mfumu Nzambi
me sakumunaka beto, beto me
kumaka bantu mingi-mingi.”

15 Yozue vutudilaka bo nde : « ... beno
kwenda kusakula mfinda...beno tunga bwala.”

16 Bo nde : “Ya kieleka, ntoto ya bangumba
me lunga beto ve, kansi zaba nde bantu ya
Kanana yina ke bikalaka na nseke... na

*bawala yina kele penepene...bo ke na
bapusupusu ya makulu ya bibende.”*

17 Ebuna Yozue tubaka na bana ya Yozefi,
bantu ya Efrayimi ti ya Manase, nde : “Mono
zaba nde beno kele bantu mingi, beno kele
mpi ngolo mingi. Yo yina, beno ta baka ve
kitini mosi ya mpamba ya ntoto,

18 kansi ntoto yonso ya bangumba kele ya
beno, ata yo kele mfinda na mfinda. Beno ta
sukula yo, beno ta tunga kuna kimakulu. Ata
bantu ya Kanana ke na bapusupusu ya
bibende, ata bo kele bantu mosi ya ngolo,
kansi beno ta kuka kukula bo.”

Yula bana --**Niveau Primaire :**

-
- Sambu na nki bana zole ya Yozefi
lombaka ntoto kuluta ?
(Sambu bo vandaka bantu mingi.)
 - Nki pesaka bo boma na ntoto
penepene na bo ?
(Bantu yina vandaka na bapusupusu
ya vandaka na makulu ya bibende.)

Niveau Secondaire :

-
- Sambu na nki Yozue ndimaka
mpila bana ya Yozefi vandaka
kulomba ?
(Sambu kieleka bo vandaka bantu
mingi.)
 - Sambu na nki bo fweti vanda ve
boma ya bantu ya Kanana na
bisika yina, ata bo vandaka na
bapusupusu ya makulu ya
bibende ?
(Sambu Nzambi me sila kukula
bo.)

Bana sala bageste :

- Bana sala bageste bonso kusonga
nde dikanda na bo kele bantu mingi.

Bana yimba ti kina :

- Beto bantu ya Yozefi, beto bantu
mingi

Pesa beto ntoto zole, beto bantu
mingi.

10.6 Na ntwala ya Nzambi, bo bulaka zeke kukabisa bantoto ya nkaka. Yozue 19 :51

Tangila bana :



*19 :51 Nganga-Nzambi Elazare,
Yozue mwana ya Nuni ti bambuta ya
bafami ya makanda ya Israele, bo
bulaka zeke sambu na kuzaba kana
nki ntoto bo fweti pesa na nki
dikanda.*

*Bo salaka yo na meso ya Mfumu
Nzambi na munoko ya Nzo-Nzambi
ya Ntenta kuna na bwala Silo.
Mpidina, bo manisaka na kukabisa
ntoto ya Kanana.*

Yula bana --

Niveau Primaire :



- Nki mutindu bo zengaka nki dikanda ta baka nki ntoto ?
(Bo bulaka zeke.)
- Bo salaka yo na meso ya nani ?
(Ya Mfumu Nzambi)
- Nani sadisaka Yozue na kisalu yina ?
(Nganga Nzambi ti bambuta ya makanda ya Israele)
- Bo salaka yo wapi ?
(Na munoko ya Nzo-Nzambi ya Ntenta).

Niveau Secondaire :



- Sambu na nki nge banza Yozue bulaka zeke yandi mosi ve, kansi nzila mosi ti bantu ya nkaka ?
(Mbala ya nkaka sambu bo ndima mpila yo bwaka.)

Bana sala bageste :



Bana yonso sala geste bonso bo ke samba ngolo, ke lomba Nzambi kutwadisa ntangu bo bula zeke, yo salama na mpila Yandi zola.

Bana yimba ti kina :



Bo bulaka zeke
Na ntwala ya Nzambi.
Bo manisaka kukabisa
Ntoto ya Kanana.
Ntoto ya (*bana boka*) VANDAKA !
Kanana.

>|< Kumanisa lesò :

Nzambi songaka bantu ya Israele kubaka ntoto yonso ya Kanana. Yandi sadisaka bo, ti nwanaka sambu na bo, yantika na bwala ya ntete, Yeriko, tii na bwala Ai, tii na babwala ya nene, ya luyalu, na ndambu ya sude, tii na babwala ya luyalu na ndambu ya norde. Na nsuka ya moyo ya Yozue, bo me baka babwala ya nene na konso ndambu ya ntoto.

Kansi babwala mingi ya fioti me bikala.
Nzambi me sadisa bo na bamvita yonso, konso mbala ya bo lombaka lusadisu na Yandi. Nzambi songaka nde Yandi ta landa kaka kunwana sambu na bo tii bo botula babwala yonso.

Yo yina, Nzambi songaka Yozue nde ntangu me lunga kumanisa kukabisa ntoto na makanda. Ebuna konso dikanda ta vanda na kisalu ya kubotula babwala yonso ti bantu yonso ya Kanana na ntoto na bo.

Yozue salaka mutindu Nzambi songaka Yandi, ti konso dikanda bakaka ntoto na yo. Nzambi yantikaka ti bo ; Yandi vandaka kwikama kumanisa kisalu mpi ti bo. Yandi ta vanda kwikama na beto bubuyai mpi.

Bana tuba verse ya kulonguka :

Bana tuba 1 Tesalonika 5 :24 ndambu-ndambu, na nima na nge, mbala tatu. Na nima, bo yidika ton ti ritime, bo yimba yo mbala tatu to kuluta :

Nzambi yina ke bingaka beno, Yandi ta sala yo, sambu Yandi ke salaka kaka mutindu Yandi ke tubaka.

[Moniteur, parti ya verse ya kele sulinye kele sambu na bana ya fioti (preskolere).]

Devoir sambu na bakristo :

Bana bakristo, devoir mono ke pesa beno bubuyai, yo yai : Nge me yantika ti Yesu. Vanda kwikama na Yandi. Na yonso nge sala to tuba na mposo yai, kudiyula : Keti mono kele kwikama na Yesu na mambu yai mono ke sala to mambu yai mono ke tuba ?

Bana yimba mosi ya bankunga ya kwenda nzila mosi ti lesy yai :

Mono Me Sila Kulanda Yesu --to--
Nani Kele Ngolo ? (Nani ke kwikama ?)

Kubinga bavidi :

Mbala ya nkaka nge bakisa ve nki beto ke tuba ntangu beto tuba nde "beno bana bakristo." Mukristo kele ve keke mwana ya mukristo. Kele ve kaka muntu ya ke kwisa na ecodim, to muntu ya ke kwisa na bisambu. Kele ve kaka muntu ya me baka mbotika, to muntu ya ke tanga zina ya Yesu.

Mukristo kele muntu ya me bakisa nde yandi kele nkwa-masumu, nde masumu na yandi me natila yandi makambu ti Nzambi. Yandi me bakisa nde yandi lenda kota zulu ve sambu na masumu na yandi. Yandi me bakisa nde yandi ke na mfunu ya Yesu sambu na kugulusa yandi.

Mukristo kele muntu ya me kwikila na ntima na yandi yonso nde Yesu ke Mwana ya Nzambi, me bika zulu, me kuma na ntoto yai sambu Yandi kufwa sambu na masumu na beto, me telama na lufwa. Mukristo kele muntu ya me balula ntima, me yamba Yesu bonso Mvulusi na yandi.

Keti nge zaba nde nge kele mukristo ? Kana nge zaba ve mbote mbote, beto zola sadisa nge. Kaka bikala na nima ya ecodim. Nge lenda kuma mukristo bubuyai.

Kana ntangu lunga :

Longa mikanda ya Bible. Tala bangindu na nsuka ya mukanda yai.

=NSUKA YA LESO 10

Leso 11. Bo tulaka babwala ya bantu lenda kudibumba.

I. Preparatio ya moniteur--

Moniteur, lesy yai ke monika na Yozue 20.

Moniteur, bakisa kikuma ya lesy yai :

Beto sala mambu yonso na mpila ya kele juste sambu Nzambi zola justice.

Moniteur, yilama na verse ya kulonguka :

Kubasika 23 :3 (Na kati ya bansiku ya Nzambi)

Tala bantu yonso mutindu mosi, kukotila nsukami ve.

[*Moniteur, verse kele nkufi, yo yina, ata bana ya fioti lenda tuba yo yonso.*]

Moniteur, yilama na bankunga ya kwenda nzila mosi ti lesy yai :

Yesu Zola Bana Yonso

II. Kureviser —

Kulanda devoir ya mposo me luta :

Na mposo me luta, beto lombaka beno bakristo kudiyula na mambu yonso ya nge salaka, keti kusala yo ta vanda kwikama na Yesu.

Nanimekaka kusala yo na mposo me luta ? Nani yindulaka kusala to kutuba mambu mosi, kansi na nima, nge monaka nde ve, yina ta vanda ve kwikama na Yesu ?

Merci na beno ya ke meka kusala badevoir ya beto pesa. Yo ta sadisa beno kuyela na kikristo.

Reviser :

- ↑ Na lesy yai mposo me luta, beto monaka nde Yozue ti bantwadisi ya Israele kabisaka ntoto ya Nzambi pesaka bo. Bo kabisaka yo na kati ya banani ?
(Na kati ya makanda to batribu ya Israele)

III. Kulonga Bana Lesy Yai –

Kuyantika Lesy :

Ntangu me lunga nde bantu ya Israele yantika kuzinga na kati ya ntoto ya Nzambi me pesa bo. Beto me mona nde konso dikanda me bikala na kisalu ya kukula bantu ya nkaka ya Kanana ya me bikala na ntoto yina. Ntangu yai, bo fweti yilama kuzinga na kati ya ntoto yina, na mpila ya Nzambi me songa bo.

Kima mosi ya Moize me songa bo vandaka nde, ntangu bo kota ntoto yina, bo fweti tula babwala ya muntu fweti tinina kana yandi me fwa muntu na luzolo ve (na aksida).

Ndola sambu na muntu ya me fwa muntu ya nkaka na luzolo, yo vandaka lufwa. Kansi Nzambi ya zola justice, Yandi zolaka ve nde muntu kufwa kana yandi fwaka muntu na luzolo ve. Moize songaka bo nde bo fweti tula babwala 6—tatu na este ya Yordani ti tatu na weste ya Yordani.

Ntangu yai, Yozue tulaka ngolo kulanda nsiku yina ya Moize pesaka.

Developpement—Malongi ya nene ya Lesy Yai na Bandambu 4 :

11.1 Nzambi songaka Yozue kutula babwala ya muntu fweti tinina kana yandi me fwa muntu na luzolo ve (na aksidan). Yozue 20 :1-3

Tangila bana :

- 1 Mfumu Nzambi songaka Yozue
- 2 na kutuba na bantu ya Israele nde :
“Beno fweti sola babwala ya muntu fweti tinina, yina ya Mono songaka Moize...

3 Kana muntu kufwa muntu ya nkaka, kansi na luzolo ve, yandi lenda tinina na babwala yai sambu na kutina bampangi ya muntu yina me fwa.

Yula bana --**Niveau Primaire :**

- Ngindu ya babwala ya muntu lenda tinina, Nzambi songaka yo ntete na nani ?
(Na Moize)
- Ebuna, ntangu yai Yandi ke songa nani ?
(Yozue, ya yingaka Moize)

Niveau Secondaire :

- Kana muntu me fwa muntu na luzolo, yo ke monika nde nani ta landa yandi ?
(Bampangi ya muntu ya yandi fwaka)
- Kana muntu me menga muntu ya nkaka, me fwa yandi na luzolo, keti bo lenda yamba yandi na babwala ya muntu lenda tinina ?
(Ikele ve. Babwala yango, yo vandaka kaka sambu na bana ya fwaka muntu na aksidan.)

Bana sala bageste :

- 
- Bana sala bageste bonso bo me fwa muntu na aksidan, bo baka ntinu kukuma na bwala ya kutinina.

Bana yimba ti kina :

- 
- Kana muntu fwaka na aksidan, yandi tina nswalu na babwala ya kutinina.

11.2 Nzambi songaka bo mpila kusadila babwala yina. Yozue 20 :4-6**Tangila bana :**

- 
- 4 Kana muntu yango kukuma na bwala ya yandi me tinina, yandi fweti telama na munoko ya lupangu ya bwala, kisika ya bo ke zengaka makambu ;ebuna yandi songa bambuta ya bwala yina nki me bwila yandi. Bambuta ta pesa yandi nzila

yandi kota na bwala, bo ta songa yandi mpi nzo ya yandi lenda bikala.

5 Kana mpangi ya muntu yina me fwa kulanda muntu yango tii na bwala yina, bantu ya bwala lenda ve kupesa yandi na maboko ya mpangi ya muntu yina me fwa. Bo fweti keba yandi, sambu yandi fwaka muntu na luzolo ve, yandi mengaka yandi mpi ve.

6 Muntu yango yina ta bikala na bwala yina tii kuna bo me sambisa yandi...Na nima, yandi lenda vutuka na bwala na yandi.

Yula bana --**Niveau Primaire :**

- Kana muntu tina na bwala yina, yandi ta songa makambu ya me bwila yandi na nani ?
(Na bambuta ya ke zenga makabu na munoko ya lupangu ya bwala)
- Kana mpangi ya muntu ya yandi me fwa kulanda yandi, keti bambuta ya bwala yina lenda pesa yandi na maboko na bo ?
(Ikele ve. Bo fweti keba yandi.)

Niveau Secondaire :

- Muntu ya me tina na bwala yango, yandi fweti bikala kuna tii nki me salama ?
(Bo me sambisa makambu na yandi. Kana bo me mona yandi fwaka muntu ve na luzolo, yandi lenda vutuka na bwala na yandi.)

Bana sala bageste :

- 
- Bana sala bageste bonso bo ke songa bambuta ya bwala makambu ya me bwila bo.

Bana yimba ti kina :

- 
- Kana muntu me kuma na bwala
Yandi kwenda na munoko ya lupangu.
Yandi songa bambuta ya bwala
Sambu na nki yandi me kwisa.

11.3 Yozue tulaka babwala 3 ya kutinina na weste ya Yordani ti 3 na este ya Yordani, mutindu Nzambi songaka yandi. Yozue 20 :7-8

Tangila bana :



7 Yo yina, na ndambu ya weste ya Yordani,... bwala Kedeshi na ntoto ya Galilea, ... bwala Sikemi na ntoto ya ...Efrayimi, ti bwala ...Ebron, ...na ntoto ...ya Yuda.

8 Na simu ya Yordani... bo solaka bwala Besere ... sambu na dikanda ya Rubeni, bwala Ramoti...sambu na dikanda ya Gadi, ti bwala Golani ...sambu na dikanda ya Manase.

Yula bana --

Niveau Primaire :



- Bo solaka babwala ikwa na weste ya Yordani ?
(Tatu)
- Babwala ikwa na este ya Yordani ?
(Tatu mpi, yonso sambanu)

Bana sala bageste :



Bana songa misapi tatu na diboko mosi, misapi tatu na diboko ya nkaka. Bo tuba nde,
« Babwala 3 na weste ya Yordani, babwala 3 na este ya Yordani, yonso babwala 6 ya muntu lenda kutinina. »

Bana yimba ti kina :



Babwala sambanu ya kutinina
O mawa ya Nzambi !

11 :4 Babwala yai pesaka justice na bantu yonso ya Israele, ti bantu ya banzenza na kati na bo. Yozue 20 :9

Tangila bana :



9 Bo solaka babwala yai sambu bantu ya Israele ti banzenza yina ke zingaka na kati na bo, bo lenda tinina muna. Mpidina, kana muntu me fwa

muntu kansi na luzolo ve, yandi lenda tina mpangi ya muntu yina me fwa ; bo lenda fwa yandi ve kana bo me sambisa yandi ntete ve.

Yula bana --

Niveau Primaire :



Nsiku yai sadisaka nani ?
(Bantu ya Israele ti banzenza ya vandaka kuzinga na kati na bo.)

Niveau Secondaire :



- Inki mutindu nsiku yai pesaka justice ?
(Kana muntu me fwa muntu ya nkaka na luzolo ve, bo lenda fwa yandi ve na ntawala bo me zenga makambu na yandi.)

Bana sala bageste :



Bana sala bageste kusonga bantu yonso. Bo tuba nde, « Sambu na bantu yonso ya Israele, ti banzenza ya ke zinga na kati na bo. »

Bana yimba ti kina :



Justice ! Justice ! Justice !
O mawa ya nene ya Nzambi!

>|< Kumanisa lesò :

Nzambi pesaka nsiku yai na mpila nde bantu yonso baka justice. Mawa na Yandi kele nene sambu na bantu yonso.

Longa verse ya kulonguka :

Kubasika 23 :3 (Na kati ya bansiku ya Nzambi)

Tala bantu yonso mutindu mosi, kukotila nsukami ve.

[Moniteur, kabisa bana na bandambu zole. Bo telama face à face. Ndambu ya ntete nikisa misapi ti songa ndambu ya zole nde, « Tala bantu yonso mutindu mosi. »

Ndambu ya zole vutula nde, « Kukotila nsukami ve. » Bo sala mpidina mbala tatu, na nima bo balula bafraze ya bo ke tuba. Bo yonso manisa na addresse ya verse.

Devoir sambu na bakristo :

 Nki mutindu nge lenda songa justice
ti mawa na bantu ya nkaka na mposo
yai ? Devoir mono ke pesa beno
bakristo kele kusosa kusala na mpila
ya kele juste na bantu yonso na
mposo yai ya mvimba.

Bana yimba nkunga :

Yesu Zola Bana Yonso

Kubinga bavidi :

 Kana nge me yamba Yesu ntete ve,
Yandi zola kuyamba nge. Bonso
bantu tinana na babwala yai, ata nge
kele kupable, nge lenda tina na
Yandi. Yandi me bika nzo na Yandi na
zulu kaka sambu na kwisa kugulusa
nge. Na mawa na Yandi, Yandi futuka
mfuka ya masumu na nge na menga
na Yandi. Yandi fwaka na zulu ya
kulunsi, kansi Yandi telamaka na
lufwa. Bubuyai, Yandi ta vulusa nge
kana nge ta kaka tina na Yandi. Kana
nge me yamba Yandi ntete ve, to
kana nge kele na keti-keti, nge zaba
ve kana nge me sala yo, kansi
bubuyai nge ta zenga sambu na
Yandi, kwisa na nima ya ecodim ti
mono ta sadisa nge.

Kana ntangu lunga :

Longa mikanda ya Bible. Tala bangindu na
nsuka ya mukanda yai.

==NSUKA YA LESO 11

Leso 12. Bo pesaka babwala na dikanda ya Levi.

I. Preparatio ya moniteur--

Moniteur, lesy yai ke monika na Yozue 21.

Moniteur, bakisa kikuma ya lesy yai :

Beto sala yonso ya Nzambi songa beto kusala, sambu beto zaba nde Yandi ta lungisa bansilulu yonso na Yandi.

Moniteur, yilama na verse ya kulonguka :

Yozue 21 :45

Yo yina, mambu yonso ya Mfumu Nzambi zengaka nde Yandi ta sala bantu ya Israele, yo mpi kubwaka kaka mutindu yandi tubaka.

Moniteur, yilama na bankunga ya kwenda nzila mosi ti lesy yai :

Nani Kele Ngolo ? (Nani Ke Kwikama ?)
Nani Ta Lemfuka ? (Ton kiteso mosi na Nani Kele Ngolo ?)

II. Kureviser —

Kulanda devoir ya mposo me luta :

Devoir beno pesaka beno bakristo na mposo me luta kusosa kusala na bantu yonso na mpila ya kele juste. Nani tulaka ngolo kusala yo ? Nani ta songa beto kima mosi yandi salaka ?

Reviser :

- ↑ Na bamposo me luta, beto monaka nde Yozue ti bantwadisi ya Israele, bo kabisaka nki ?
(Bo kabisaka ntoto ya Kanana na kati ya makanda to batribu ya Israele.)
- ↑ Bo tulaka babwala 6 sambu na banani ?
(Babwala ya kutinina sambu na bantu ya me fwa muntu na aksidan, na luzolo ve.)

III. Kulonga Bana Leso Yai –

Kuyantika Leso :

Bo tulaka babwala yina, sambu Nzambi songaka Moize, ti Moize songaka bo kusala yo. Yozue muntu lungisaka yo. Na mposo yai, beto ta mona babwala ya nkaka ya bo tulaka sambu Nzambi songaka Moize, ti Moize songaka bo kutula yo. Beto ta mona nde bo salaka yonso ya Nzambi songaka bo kusala na mambu yina.

Developpement—Malungi ya nene ya Leso Yai na Bandambu 4 :

12.1 Bamfumu ya Dikanda ya Levi kwisaka kubaka babwala ti bamwa ntoto penepene sambu na bambisi na bo. Yozue 21 :1-2

Tangila bana :

 *1 Bambuta ya bafami ya dikanda ya Levi kwisaka kukuta nganga-Nzambi..., Yozue...ti bambuta...ya Israele,*

2 ...Bo tubaka na bo nde : "Mfumu Nzambi songaka Moize nde, bo pesa beto babwala ya kuzingila ti bamwa-ntoto yina kele penepene, sambu na kusansa bambisi na beto. »

Yula bana --

Niveau Primaire :

-  Bambuta ya bafami ya Levi zolaka nki ?
(Yozue pesa bo babwala ti ndambu ntoto penepene sambu na kusansa bambisi na bo.)
-  Keti ngindu yina vandaka ya bo mosi ?
(Ikele ve. Nzambi songaka Moize mambu yina.)

Niveau Secondaire :

-  Keti beno lenda bambuka nki kisalu Nzambi pesaka bantu ya dikanda ya Levi ?
(Kuvanda banganga-Nzambi ti kusala na nzo-Nzambi. Yo yina, bo bakaka ve ntoto ya nene ve bonso batribu ya nkaka, kansi bo bakaka babwala ti ndambu ntoto

na kati ya bantoto ya batribu ya nkaka.)

Bana sala bageste :

 Kabisa bana na bandambu zole. Mosi sala bageste bonso Yozue ti bambuta ya Israele. Ya nkaka sala bonso bambuta ya dikanda ya Levi. Bo kwisa na kimvuka ya ntete, bo songa bo nde, "Pesa beto babwala. Nzambi me tuba yo."

Bana yimba ti kina :

 Pesa beto banganga-Nzambi Babwala ya Nzambi tubaka.

12.2 Bo bulaka zeke ye pesaka BaLevi babwala bonso Nzambi songaka bo.

Yozue 21 :3-4 (Badetayi landa tii na 21 :40, kansi beto tula yo kaka na somere.)

Tangila bana :

 3 Yo yina, na kati ya bantoto na bo, bantu ya Israele solaka babwala ya nkaka ti banseke ya mbote yina me ziunga yo sambu na kupesa na bantu ya dikanda ya Levi, mutindu Mfumu Nzambi tubaka.

4 Bo bulaka zeke, ebuna yo bwilaka...

Somere vs. 5-40. Ebuna bo landaka kubula zeke sambu na kupesa babwala ti bantoto na bafami yonso ya dikanda ya Levi, na mpila mosi ya ordre ti ya mbote, konso fami bwala ti mwa-ntoto na yandi.

Yula bana --

Niveau Primaire :

- Keti Yozue ndimaka kupesa babwala yina ?
(Ee, sambu Nzambi songaka yo na munoko ya Moize)
- Nki mutindu bo zengaka nki fami ta baka nki bwala ?
(Bo bulaka zeke.)

Niveau Secondaire :



- Bo pesaka bafami ya Levi babwala ti nki ya nkaka nzila mosi ti konso bwala ?
(Ndambu ntoto kuziunga bwala sambu na kusansa bambisi na bo.)

Bana sala bageste :



Bana sala bageste bonso bo ke bula zeke, ke songa fami na fami babwala ya bo ta baka.

Bana yimba ti kina :



Bo bulaka zeke
Bo pesaka babwala
Bafami ya Levi
Yonso bakaka sika.

12.3 Na kimvuka, bo pesaka BaLevi babwala 48 ti banseke ya mbote ya vandaka kuziunga bwala sambu na kusansa bambisi na bo.

Yozue 21 :41-42

Tangila bana :

 41-42 Yo yina, na kati ya bantoto yonso ya bantu ya Israele botulaka, bantu ya dikanda ya Levi bakaka na kimvuka babwala makumi iya na nana (48) ; bo bakaka mpi banseke ya mbote yina me ziunga babwala yango, sambu na kusansa bambisi na bo.

Yula bana --

Niveau Primaire :



- Bantu ya Levi (banganga-Nzambi) bakaka babwala ikwa na kimvuka ?
(Babwala 48)
- Bo bakaka nki dikaka ?
(Banseke ya mbote kuziunga babwala, sika ya bo lenda sansa bambisi na bo.)

Bana sala bageste :



Bana tuba na kimvuka : Bantu ya tribu ya Levi, bo bakaka babwala 1,2, 3, 4 etc. [Bo tanga tii na 48.]

Bana yimba ti kina :

Dikanda ya Levi bakaka
babwala ikwa?
Babwala makumi iya
na nana ! Bo bakaka.

12.4 Yo yina, Nzambi manisaka kupesa bantu ya Israele ntoto Yandi silaka bo, ti Yandi pesaka bo ngemba. Yozue 21 :43-45

Tangila bana :

43 Mfumu Nzambi pesaka bantu ya Israele ntoto yonso ya Yandi zengaka nde Yandi ta pesa na bankaka na bo.
Bo botulaka yo, ebuna bo tungaka muna.

44 Mfumu Nzambi pesaka ngemba na ntoto ya mvimba, kaka mutindu Yandi tubaka na bankaka na bo. Yandi nungisaka bo na bitumba yonso ya bo nwanaka, ata mbeni mosi ve kukaka kubedisa bo.

45 Yo yina, mambu yonso ya Mfumu Nzambi zengaka nde Yandi ta sala bantu ya Israele, yo mpi kubwaka kaka mutindu Yandi tubaka.

Yula bana --

Niveau Primaire :

- Keti Nzambi pesaka Israele ntoto yonso ya Yandi silaka bo ?
(Ee, yonso.)
- Na nima, keti bo vandaka na ntangu ya mvita to ya ngemba ?
(Nzambi pesaka bo ngemba.)
- Bambeni ikwa nungisaka bo ?
(Ata mosi ve.)

Niveau Secondaire :

- Na katy ya mambu ya Nzambi zengaka nde Yandi ta sala Israele, ikwa salamaka ?
(Yonso)
- Yo salamaka nki mutindu ?
(Kaka mpila Yandi tubaka)

Bana sala bageste :

Bana sala cercle ya nene na maboko, ebuna bo tuba nde, « Yonso ya Nzambi tubaka, yonso salamaka ! »

Bana yimba ti kina :

Yonso ya Nzambi tubaka,
Yonso salamaka.
Yandi kele kwikama,
Kwikama yonso.

Bana tuba verse ya kulonguka :

45 Yo yina, / mambu yonso ya Mfumu Nzambi zengaka/ nde Yandi ta sala bantu ya Israele, / yo mpi kubwaka/ kaka mutindu Yandi tubaka.

[NB : Moniteur, bana ya fioti (preskolere) lenda tuba kaka bandinga ya beto me sulinye.]

[Bana lenda tuba yo mbala tatu na bageste ya maboko. Na nima, bo tuba yo na ndinga na nsi mingi, ti na bandinga mutindu na mutindu.

Bana yimba nkunga :

Bana yimba bankunga ya ke kwenda nzila mosi ti lesy ya bubuyai.

>|< Kumanisa lesy :

Bo salaka yonso ya Nzambi songaka bo kusala, ye Nzambi lungisaka bansilulu yonso ya Yandi me pesa na bo ti na bambuta na bo. Beto zaba nde Nzambi kele konso ntangu kwikama. Yina ya Yandi sala, yina Yandi fweti sala kaka. Mbote beto bakristo, beto sala yonso ya Nzambi lomba na beto kusala.

Devoir sambu na bakristo :

Nki Nzambi me songa nde kusala ya nge me sala ntete ve ? Mono zaba yai—kana muntu me ndima Yesu Kristo, mambu ya ntete ya Nzambi lomba ikele nde yandi baka mbotika. Mbotika kele kidimbu ya ke songa bantu yonso nde nge me zenga kulanda Yesu. Kana nge kele mukristo, kansi nge me baka mbotika ntete ve, mono lomba nge kusolula ti

pasteur to kukwenda kusonika zina
na nge na kati ya kalasi ya bantu ya
zola baka mbotika.

**Bana yimba bankunga ya kwenda nzila mosi
ti leso yai :**

Nani kele Ngolo? (Nani ke Kwikama ?)

Kubinga bavidi :

 Kansi zaba nde, ata nge baka
mbotika, mbotika ta gulusa nge ve.
Kaka Yesu Kristo lenda gulusa muntu,
ti Yandi me sila nde Yandi ta gulusa
bo yonso ya kwikila Yandi ti binga
zina na Yandi kugulusa bo. Kana nge
me yamba Yandi ntete ve, o, sala yo
bubuyai. Yandi ke kinga nge. Beto
kele kuyilama konso ntangu kusadisa
nge na mambu yina.

Kana ntangu lunga :

Longa mikanda ya Bible. Tala bangindu na
nsuka ya mukanda yai.

==NSUKA YA LESO 12

Leso 13. Makambu basikaka na kati ya batribu ya este ti ya weste.

I. Preparatio ya moniteur--

Moniteur, lesu yai ke monika na Yozue 22.

Moniteur, bakisa kikuma ya lesu yai :

Kana beto kele na makambu ti muntu, beto kwenda kusolula ti yandi ntete, kana Nzambi lenda sadisa beto kumanisa yo na ngemba.

Moniteur, yilama na verse ya kulonguka :

Matayo 18 :15 (Bandinga ya Yesu)

« Kana mpangi na nge/ me sala nge mbi,/ kwenda kusonga yandi/ mbi yina ya yandi me sala nge/...kaka beno zole mpamba/. Kana mpangi na nge me wila nge,/ tuba nde yandi me kuma diaka/ nduku na nge.”/

[NB: Moniteur, bana ya fioti (preskolere) lenda tuba kaka bandinga beto me sulinye.]

Moniteur, yilama na bankunga ya kwenda nzila mosi ti lesu yai :

Beto Zolana

Nsinga ya Bansinga Tatu (baverse yonso 3)
O Luvunu Yambula (O Kunwana Yambula)

II. Kureviser —

Kulanda devoir ya mposo me luta :

Na mposo me luta, beto lombaka beno bakristo ya me baka mbotika ntete ve kukwenda solula yo na pasteur, to na kusonika zina na nge na kalasi ya bantu ya zola yilama kubaka mbotika. Nani salaka yo ? Nani me baka mbotika dezia? Matondo na beno. Sambu na beto bakristo, mbotika kele mpila ya ntete beto ke lemfuka na Yesu.

Reviser :

Beto me mona nde bantu ya Israele me kabisa ntoto na kati ya makanda yonso ya Israele. Bo sosaka Nzambi kutwadisa mambu yina. Bo me pesa babwala sambu na kuvanda babwala ya muntu lenda tinina kana yandi me fwa

muntu na aksida. Bo me pesa babwala na fami ya Levi. Bo vandaka banganga-Nzambi, yo yina, Nzambi songaka nde bo pesa bo ve ntoto na bo mosi, kansi bo pesa babwala ti ndambu nseke sambu bo sansa bambisi na bo. Nzambi pesaka bo ngemba na kati ya ntoto ya Yandi pesaka bo.

III. Kulonga Bana Lesu Yai –

Kuyantika Leso :

Bambuka nde, ndambu bantu ya bakaka ntoto na este ya Yordani, ata bo me baka dezia ntoto na bo, bo kwendaka nzila mosi ti bantu yonso ya Israele sambu na kubotula babwala ya Kanana ya vandaka na simu ya Yordani, na ndambu ya west. Ntangu yai, bo me baka ntoto yonso, ebuna ntangu me lunga nde bantu ya este lenda vutuka na bafami na bo.

Developpement—Malungi ya nene ya Leso Yai na Bandambu 6 :

13.1 Yozue vutulaka bantu ya este na bafami na bo na Iusakumunu ya Nzambi. Yozue 22 :1-9

Tangila bana :

 1 *Ntangu yai, Yozue bingaka bantu ya makanda yai Rubeni ti Gadi, ti ndambu ya bantu ya dikanda ya Manase,...*

3 *Na bilumbu yai mingi-mingi, beno bikisaka ata mbala mosi ve bampangi na beno....*

4 *Ntangu yai, Mfumu Nzambi me pesa bampangi na beno ngemba, mutindu Yandi tubaka. Beno lenda vutuka na ntoto na beno, ...ya Moize...kabisilaka beno kuna na ndambu ya este ya Yordani.*

5 *Kansi beno vila ve na kulanda mbote-mbote bansiku yonso ya Moize pesaka beno...*

6-8 *Ebuna Yozue sakumunaka bo, yandi pesaka bo nzila na kuvutuka na babwala na bo...*

9 *Yo yina, ...bo vutukaka na ntoto na bo....*

Yula bana --**Niveau Primaire :**

- ?**
- Yozue songaka bantu ya makanda ya Rubeni ti Gadi ti ndambu ya makanda ya Manase nde bo lenda sala nki ?
(Bo lenda vutuka na banzo na bo.)

Niveau Secondaire :

- ??**
- Bambuka nde bantu yai vandaka kusala nki ntete ?
(Bo vandaka kusala bitumba nzila mosi ti batribu ya nkaka, ata Moize me pesa bo dezia ntoto na bo na este ya Yordani.)

Bana sala bageste :

- ?**
- Bana sala bageste bonso bo ke tinda bantu kuvutuka na banzo na bo.

Bana yimba ti kina :

Makanda ya este ya Yordani
?
Bo me sadisa bampangi
Ntangu yai, Yozue tubaka,
Bo lenda vutuka.

13.2 Ntangu bo vutukaka, na lupangu ya ntoto na bo, bo tungaka mesa-kimenga ya nene. Yozue 22 :10**Tangila bana :**

- ?**
- 10** Ntangu (bo)... kwisaka kukuma na bwala...bo tungaka mesa-kimenga ya nene mpenza kuna na Iweka ya nzadi.

Yula bana --**Niveau Primaire :**

- ?**
- Ntangu bo kotaka ntoto na bo, bo salaka nki ?
(Bo tungaka mesa-kimenga ya nene na Iweka ya nzadi Yordani.)
 - Yai ta songa nde bo monaka yo mfunu to mfunu ve ?
(Mfunu mingi)

Bana sala bageste :

Bana sala bageste bonso bo ke tunga mesa-kimenga ya nene ya matadi.

Bana yimba ti kina :

Beto me kuma na lupangu na beto
Beto tunga mesa-kimenga.

13.3 Bantu ya west monaka yo makambu, bo zolaka kunwana ti bo sambu na yo. Yozue 22 :11-12**Tangila bana :**

11 Bantu kwisaka kuzabisa bantu ya nkaka ya Israele nde : « Tala, bantu (yina) me tunga mesa-kimenga kuna... ! »

12 Ntangu bantu ya Israele waka mambu yai, bo yonso kwisaka kukutana kisika mosi ...sambu na kwenda kunwanisa bantu ya makanda yina ya nkaka.

Yula bana --**Niveau Primaire :**

Ntangu bantu ya Israele na weste waka nde bantu ya este me tunga mesa-kimenga, bo zolaka kusala nki ?
(Kunwanisa bo. Beto ta mona mabanza na bo ndambu na nima.)

Niveau Secondaire :

- Bantu ya weste zabaka kaka yina ya bantu me mona na meso— bantu ya este me tunga mesa-kimenga. Nki bo zabaka sambu na mabanza ya bantu ya este na mambu yina ?
(Ata kima mosi ntete ve.)
- Bo zolaka kwenda kunwanisa bampangi na bo sambu na mesa-kimenga yina. Yai ke songa nde bo yindulaka nki ?
(Bo monaka yo mbi.)

Bana sala bageste :

Songa mwana mosi kima mosi na dikutu. Yandi baka luse ya makasi,

sala bageste bonso yandi zola kunwana. Yandi songa muntu ya nkaka ti yo landa. Na nsuka, bana yonso zola kwenda kunwana.

[*Moniteur, tala mbote nde yai kuma ve kunwana ya kieleka. Beto zola ve mwana ya kulwala.*]

Bana yimba ti kina :



Bantu ya weste waka mambu yina,
Yo pesaka bo makasi.

13.4 Bo tindaka bantwadisi kusolula mambu yina ti bo, bo tendulaka mabanza ya bantu ya west. Yozue 22 :13-20

Tangila bana :



13 Ebuna bo tindaka Pinasi, mwana ya nganga-Nzambi Elazare, na bantu (yina).

14 Bambuta kumi kwendaka nzila mosi na yandi,...mbuta mosi na konso dikanda ya ndambu ya weste, ya Jordani ;...bamfumu ya bafami ya bantu ya Israele,

15-16 Bo kwisaka kukuma... ebuna bo tubaka na (bo) nde : « Beno wa, bantu yonso ya Israele ke tubila beno nde : Sambu na nki beno me sala mbi yai ya nene na meso ya Nzambi ya Israele ? Sambu na nki beno me kuma kubuya kulanda Mfumu Nzambi ? Beno me tunga mesa-kimenga sambu na beno mosi, yo ke songa nde beno me sala mubulu na Mfumu Nzambi ! ...

18 Tala ntangu yai, beno me bika kulemfuka na Mfumu Nzambi ! Kana beno kusala Yandi diaka mubulu bubu yai, mbasi Yandi ta wila bantu yonso ya Israele makasi.....”

Yula bana --

Niveau Primaire :



- Bantu ya weste tindaka mwana ya nganga-Nzambi ti bambuta ya nkaka kusolula ti nani ?
(Bantu ya este)
- Bo vandaka na kiese na bo ve sambu na nki ?

(Sambu bo tungaka mesa-kimenga. Bo monaka bo nde, yo songaka nde bo zolaka kusala mubulu ya Nzambi.)

Niveau Secondaire :



- Nki mutindu mabanza na bo vandaka kukwelana ve ?
(Bantu ya este monaka yo mbote kutunga mesa-kimenga, kansi bantu ya weste monaka yo masumu.)
- Nki mambu ya mbote me salama awa ?
(Bo me vukana kusolula mambu yina.)

Bana sala bageste :



Tula bandambu zole ya bana. Bo telama face à face. Bo yonso sala bageste bonso bo ke solula, ke meka kusonga bantu ya nkaka mabanza na bo.

Bana yimba ti kina :



Bo solulaka mambu yina
'Sambu na nki beno me sala yai?'

13.5 Bantu ya este tendulaka mabanza na bo. Yozue 22 :21-29

Tangila bana :



21 Bantu (yina) vutudilaka bambuta ya makanda yina ya nkaka ya Israele nde :

22 “Mfumu Nzambi kele Nzambi ya nene, ya kieleka Yandi kele Mfumu.

24 Ve, ngindu na beto vandaka...ve (kusala Nzambi mubulu). Beto salaka mpidina sambu beto monaka boma nde, na bilumbu ke kwisa na ntwala, bana na beno ta yulaka bana na beto nde : ‘Nki kinduku kele na beno ti Mfumu Nzambi, Nzambi ya Israele ?

25Ebuna bana na beno lenda pusa bana na beto na kubuya kusamba Mfumu Nzambi.

26 Yo yina, beto zengaka na kusala mesa-kimenga yai. Yo kele ve sambu na kuplesila makabu...,

27 kansi ... kidimbu ...yina ke songa nde ya kieleka beto mpi ke na nswya ya kusamba Mfumu Nzambi....

29Beto fweti pesa makabu kaka na mesa-kimenga ya Mfumu Nzambi, Nzambi na beto, yina ke vandaka na ntwala ya Nzo-Nzambi ya ntenta."

Yula bana --

Niveau Primaire :

-  Keti bantu ya este tungaka mesa-kimenga yina sambu bo zolaka kubika Nzambi ?
(Ikele ve.)
- Sambu na nki bo tungaka yo ?
(Sambu bana na bo kuzaba nde bo mpi kele kusamba Nzambi.)

Niveau Secondaire :

-  Sambu na nki bantu ya este vandaka ve kupesa bankailu na mesa-kimenga bo me tula ?
(Nzambi me tuba nde bankailu yonso, bo fweti pesa yo na mesa-kimenga na Yandi na Nzo ya Bisambu ya ntenta.)

Bana sala bageste :

 Beto banza nde bantu ya weste vandaka na surprise ntangu bo waka sambu na nki bantu ya este me tunga mesa-kimenga yina. Bana yonso songa ekspresio ya surprise.

Bana yimba ti kina :

 Mbote bo waka mabanza ya bampangi
Ebuna bo bakisaka.

13.6 . Bo yonso bakisana. Yo yina, ngemba vutukaka. Yozue 22 :30-34

Tangila bana :

 30 Nganga-Nzambi Pinasi ti bambuta kumi ya bantu ya Israel yina vandaka ti yandi ndimaka mambu ya (bo) tubaka.

31 Pinasi... tubilaka bo nde : "...Beno me sala mubulu ve na meso ya Mfumu Nzambi, mpidina Mfumu Nzambi ta pesa bantu ya Israele ndola ve."

32 Ntangu yai, Pinasi ti bambuta bikisaka (bo), bo simbaka nzila na kuvutuka na nsi ya Kanana sambu na kusonga bantu ya Israele mambu ya bo monaka.

33 Bantu ya Israele mpi ndimaka yo, bo kumisaka Nzambi. Bo bikaka ngindu ya kwenda kunwanisa bantu ya Rubeni ti ya Gadi...

34 Bantu ya Rubeni ti ya Gadi monaka kiese ...

Yula bana --

Niveau Primaire :

-  Pinasi ti bantu ya weste kwisaka na mabanza nde bantu ya este me sala mbi. Na nima kuwa bo, Pinasi tubaka nki ?
(Beno me sala mubulu ve na meso ya Mfumu Nzambi.)
- Sambu na nki bo changaka mabanza na bo ?
(Sambu bo waka ntendula ya bampangi.)

Niveau Secondaire :

-  Inki shanzema kotaka na mpila na bo kusala bo na bo ?
(Bo zolaka kunwana diaka ve.)

Bana sala bageste :

 Bana yambana bo na bo na kiese.

Bana yimba ti kina :

 Nzala ya kunwana manaka Bu bo solulaka bo na bo.

>|< Kumanisa leso :

Bampangi yai zolaka kunwana sambu bo
bakisaka ve. Ntangu bo solulaka, ntangu bo
waka mabanza ya bampangi ya nkaka, bo
monaka mfunu ya kunwana diaka ve.

Yindula nki zolaka kusalama kana bo
kwendaka kaka kunwana, kukonda kuvanda
sikamosi kusolula ti bampangi ya nkaka.
Bantu ya este zolaka kubakisa ve sambu na nki
bantu ya weste vandaka kunwana ti bo.
Mambu mingi, beto lenda manisa yo kana
beto ta kaka kwenda kusolula ti bampangi.
Beto songa bo mabanza na beto, beto kuwa
mabanza na bo.

Bana tuba verse ya kulonguka :

Bible ke songa beto kusala mpidina. Tangila
bana Matayo 18 :15 *ndambu-ndambu. Bo*
tuba na nima na nge. Na nima, bo tala este ti
tuba verse, bo tala weste ti tuba yo diaka.

« Kana mpangi na nge/ me sala nge mbi,/
kwenda kusonga yandi/ mbi yina ya yandi me
sala nge/...kaka beno zole mpamba/. Kana
mpangi na nge me wila nge,/ tuba nde yandi
me kuma diaka/ nduku na nge.”/

**Bana yimba bankunga ke kwenda nzila mosi
ti leso yai.**

Devoir sambu na bakristo :

 Devoir mono ke pesa beno bakristo, yo
yai : Na mposo ke kwisa, kana nge kele na
makambo ti muntu, sala bonso Bible tuba.
Kwenda na yandi, kusolula mambu yina. Tula
ngolo kumanisa yo na ngemba.

Kubinga bavidi :

 Kansi mbala ya nkaka nge kele mukristo
ntete ve. Nge me yamba Yesu ntete ve na
ntima na nge. Keti nge ta yamba Yandi
bubuyai, sambu Yandi lenda lolula nge ti pesa
nge ngemba ti Nzambi ? Konso ntangu, zaba
nde nge lenda kwisa na beto bantwadisi kana
nge ke sosa lusadisu na mambu yina.

Leso 14. Ntangu lungaka nde Yozue fweti kufwa ; yandi bamzikisa bo mambote yonso ti kwikama yonso ya Nzambi

I. Preparatio ya moniteur--

Moniteur, lesy yai ke monika na Yozue 23.

Moniteur, bakisa kikuma ya lesy yai :

Beto vanda kwikama kulanda Yesu bubuyai tii kuna, sambu beto zaba nde Yandi kele kwikama na beto.

Moniteur, yilama na verse ya kulonguka :

Yozue 23 :15-16a (Yozue ke tuba)

*Ya kieleka, mutindu Mfumu Nzambi me sala
mambu yonso ya mbote ya Yandi tubaka,
Yandi mpi ta pesa beno ndola kana beno
kufwa kuwakana ya beno wakanaka na
Yandi...*

[*Moniteur, bandinga sulinye kele sambu na
bana ya fioti (preskolere).*]

**Moniteur, yilama na bankunga ya kwenda
nzila mosi ti lesy yai :**

Mono Me Sila Kulanda Yesu
Nani kele Ngolo ? (Nani ke kwikama ?) ti ton
mosi ti yo—Nani Ta Lemfuka ?

II. Kureviser —

Kulanda devoir ya mposo me luta :

Na mposo me luta, beto pesaka beno bakristo
devoir nde, kana nge vandaka na makambo ti
muntu, nge kwenda solula mbote ti muntu
yina, nge meka kumanisa yo. Nani salaka yo ?
Nani ta songa beto nki mutindu yo lutaka ?

Reviser :

Beto me mona nde Nzambi ya silaka bantu ya
Israele ntoto na bo ntama, Yandi me lungisa
nsilulu na Yandi. Yandi me pesa bo nsi ya
Kanana. Yandi me nwana sambu na bo ; bo
me baka yo yonso. Yozue me kuma ntawadisi
kuyinga Moize. Yandi me twadisa bantu ya
Israele na kubaka ntoto na bo.

III. Kulonga Bana Lesy Yai –

Kuyantika Leso :

Ntangu yai, Yozue me nuna. Bambuka nde
yandi ti Kalebi vandaka kaka bantu zole ya
kwikilaka nde Nzambi lenda pesa bo ntoto
yina. Yandi vandaka age ya kiteso ya bamvula
20 ntangu yina. Nzambi pesaka bantu ya
nkaka ya Israele ndola sambu bo kwikilaka
Yandi ve. Bo yonso tambulaka mpamba na
nseke bamvula makumi iya, tii bo yonso
fwaka. Kaka Kalebi ti Yozue me bikala.
Ntangu yina, yandi me kuma bamvula ikwa ?
(20+40=60)

Yandi vandaka kiteso ya bamvula 60 ntangu
yandi yantikaka kutwadisa bantu ya Israele
kubaka ntoto na bo. Bo nwanaka na bantu ya
Kanana bwala na bwala bamvula 7. Ntangu
yai, Yozue me kuma na bamvula ikwa ? (67)

Na luyantiku ya kapu 23, beto tanga nde
ntangu me luta mingi diaka. Yozue me nuna.
Beto landa histoire na beto.

**Developpement—Malongi ya nene ya Lesy
Yai na Bandambu 4 :**

**14.1 Bu Yozue me nuna, yandi bambukisaka
bantu ya Israele mpila ya kwikama ya
Nzambi me sala sambu na bo. Yozue 23 :1-5**

Tangila bana :

 1 *Bamvula mingi lutaka ...Yozue mpi
vandaka me nuna mpenza.*

2 *Yandi bingaka bantu yonso ya Israele,
bambuta, bamfumu yonso ti bazuzi, ebuna
yandi tubaka na bo nde : « Tala, mono me
nuna.*

3 *Beno me mona mambu yonso ya Mfumu
Nzambi... me sala sambu na beno... Yandi
mosi vandaka kunwana bitumba nzila mosi ti
beno.*

4 *Beno me mona mpi mutindu mono me bula
zeke sambu na kukabisa bantoto na makanda
na beno...*

5 *Mfumu Nzambi, Nzambi na beno, ta kula
(bantu ya bikala) Yandi mosi na ntawala na*

beno ; Yandi ta sala na mpila nde bo tina ntangu beno ke kuma penepene. Ebuna beno ta baka ntoto na bo mutindu Mfumu Nzambi tubaka.

Yula bana --

Niveau Primaire :

- **?** Yozue bingaka banani, bo kuvukana ?
(Bambuta, bamfumu ti bazuzi yonso ya Israele)
- Yandi tubaka nde Nzambi ta sala nki na bantu ya Kanana ya me bikala na ntoto yina ?
(Yandi ta kula bo yonso.)
- Kana bantu ya Israele kaka kuma penepene na bo, bo ta sala nki ?
(Bo ta tina.)

Niveau Secondaire :

- **??** Nki mutindu bantu ya Israele lenda zaba nde Nzambi ta sadisa bo kukula bantu ya me bikala ?
(Sambu Yandi me dezia nwana sambu na bo.)

Bana sala bageste :

- **?** Tula bana na bandambu zole :
Israele ti bantu ya Kanana ya me bikala na ntoto. Bantu ya Israele kaka nangula maboko na bo, ebuna bantu ya Kanana tina na boma.

Bana yimba ti kina :

- **?** Nzambi me nwana sambu na beno,
Yandi ta landa kusala yo.

Bana yimba nkunga, Nani Kele Ngolo? Verse ya kuyimba, Nani Ke Kwikama?

14.2 Yandi bambukisaka bo kulanda kaka kuvanda kwikama na Nzambi. Yozue 23 :6-10

Tangila bana :

- **?** 6 Kansi beno keba, beno fweti landa mbote-mbote mambu yonso ya bo me sonika na Mukanda ya Bansiku ya

Moize, beno fweti bikisa yo ve ata fioti.

7 Beno lenda vukana ve na banzenza yina me bikala na kati na beno ; beno kusamba ve banzambi na bo, beno tanga mpi ve bazina ya banzambi na bo ntangu beno ke zenga kieleka, beno fukama ve na ntawala na bo sambu na kusambil bo.

8 Beno kudipesa kaka na Mfumu Nzambi, ...mutindu beno vandaka kusala katuka bilumbu me luta tii bubu yai.

9 Mfumu Nzambi me kula na ntawala na beno bantu ya ngolo ti ya nene, ata muntu mosi ve me kuka kutelama na meso na beno....

Yula bana --

Niveau Primaire :

- **?** Bo fweti landa nki mbote-mbote ?
(Yonso ya bo sonikaka na Mukanda ya Bansiku to Bible)
- Keti Nzambi zolaka bo kulanda mpila ya bantu ya Kanana ya me bikala na kati na bo ?
(Ikele ve ata fioti.)

Niveau Secondaire :

- **??** Nki mutindu bo fweti keba na bantu ya Kanana ?
(Bo kuwakana ti bo ve, bo kwelana ve ti bo, bo samba banzambi na bo ve.)

Bana sala bageste :

- **?** Mwana mosi simba Bible ti nangula yo. Bana yonso landa yandi. Bo songa bageste kusonga nde bo ke landa Bible, bo ke buya konso nzila ya nkaka.

Bana yimba ti kina :

- **?** Bana yimba nkunga, "Mono Me Sila Kulanda Yesu".

14.3 Bo sala atasio na mambu yai : Bo landa Nzambi mbote-mbote, ti bo wakana ve na

**mumpani ya Kanana ya me bikala na ntoto,
bo landa ve bampila na bo. Yozue 23 :11-13**

Tangila bana :

 11 Yo yina beno keba, beno fweti zola Mfumu Nzambi, Nzambi na beno.

12 Kana beno kubuya Mfumu Nzambi, beno kwenda kuvukana na banzenza yina me bikala na kati na beno, kana beno bala bana na bo ya bankento ti kuwakana ti bo,

13 beno zaba mbote nde Mfumu Nzambi na beno ta kula bo diaka ve na ntwala na beno. Bo ta kumina beno bonso mitambu to mabulu, bo ta pesa-pesa beno mpasi bonso fimbu ya bo ke bulaka muntu na mukongo, to bonso bansende me kota na meso. Bampasi yai mpi ta mana ve, tii kuna beno yonso me fwa-fwa na ntoto yai ya mbote ya Mfumu Nzambi na beno me pesa beno.

Yula bana --

Niveau Primaire :

- Nki kingonsa na kubala bantu ya Kanana ?
(Bo ta mina bo bonso mitambo to mabulu.)

Niveau Secondaire :

- ?? ○ Kana bo bala bana ya Kanana, mpasi ya ta kwisila bo ta vanda bonso nki ?
(Bonso fimbu muntu ke bula na mukongo, to bonso bansende na meso. Aii! Mpasi!)
- Keti bampasi yai ta mana nswalu ?
(Ikele ve. Yo ta salama tii kuna bo ta fwa-fwa na ntoto Nzambi me pesa bo.)

Bana sala bageste :

 Bana sala bageste bonso muntu ke bula bo fimbu, na nima bonso bansende me kota na meso. Bo tuba nde, Mpasi ! Mpasi ! Mpasi !

Bana yimba ti kina :

 Kubala bantu ya Kanana
Na natila beno mpasi, o...

14.4 Bonso Nzambi me vanda kwikama na bo, bo mpi kuvanda kwikama kulanda Yandi tii kuna. Yozue 23 :14-16

Tangila bana :

14 « Mono, mono ke fwa ka mono. Beno me zaba mbote-mbote na ntima na beno yonso nde Mfumu Nzambi, Nzambi na beno, me sala mambu yonso ya Yandi tubaka ; ata kima mosi bikalaka ve, Yandi me lungisa mambu yonso mpenza.

15-16 Ya kieleka, mutindu Mfumu Nzambi me sala mambu yonso ya mbote ya Yandi tubaka, Yandi mpi ta pesa beno ndola kana beno kufwa kuwakana na beno wakana ti Yandi, to kana beno kwenda kufukama na ntwala ya banzambi ya banzenza ti kusambila bo....”

Yula bana --

Niveau Primaire :

- Bansilulu ya Nzambi silaka bo, Yandi lungisaka ikwa ?
(Yonso)

Niveau Secondaire :

- ?? ○ Nki kele mambu zole ya lenda natila bo ndola ?
(Bo kufwa kuwakana na bo ti Nzambi, to bo kwenda kusamba banzambi ya nkaka.)

Bana sala bageste :

 Bana sala bageste ya ke songa « tii kuna. »

Bana yimba ti kina :

 Bana yimba nkunga, Mono Me Sila Kulanda Yesu”.

Bana tuba verse ya kulonguka :

[Moniteur, bana tuba yo na nima na nge fraze par fraze mbala tatu. Na nima, kabisa bana na bandambu 5. Pesa konso ndambu ya bana

phrase mosi. Bo tuba yo fraze par fraze, konso ndambu na fraze na bo. Bana yonso tuba addresse. Na nsuka, bo yonso tuba yo.]

Ya kieleka,/ mutindu Mfumu Nzambi me sala/mambu yonso ya mbote ya Yandi tubaka,/ Yandi mpi ta pesa beno ndola/kana beno kufwa kuwakana ya beno/wakanaka na Yandi... Yozue 23 :5-6a

>|< Kumanisa lesò :

Yozue zabaka nde yandi vandaka penepene na kufwa, ebuna yandi zolaka kusonga bantu ya Israele nki mutindu bo fweti sala na nima na yandi. Yandi bambukisaka bo nde Nzambi me vanda kwikama na bo, ti Yandi ta landa kusala bo mbote kana bo landa kulemfuka na Yandi.

Yandi zabaka nde bantu ya Kanana ya me bikala na ntoto lenda natila bo kusala mbi na meso ya Nzambi. Yandi bendaka bo nde bo landa bantu ya Kanana ve ; bo landa Nzambi tii kuna. Bo bika ve kuvanda kwikama na Yandi.

Devoir sambu na bakristo :



Devoir ya mono ke pesa beno bakristo, yo yai : Lomba Nzambi konso lumbu kusadisa nge kuvanda kwikama na Yandi tii na nsuka ya moyo na nge.

Kubinga bavidi :



Keti nge me wakana ti Nzambi ?
Muntu lenda wakana ti Yandi kaka na nzila ya Mwana na Yandi, Yesu Kristo.
Yesu fwaka na zulu ya kulunsi sambu beto lenda vutuka na Nzambi. Keti nge me ndima Yandi na ntima na nge ?

Nge lenda binga zina na Yandi konso sika ya nge ikele, kulomba Yandi pardo ya masumu na nge. Kana nge ke na mfunu ya lusadisu na mambu yina, kwisa solula ti beto na nima ya ecodim.

Kana ntangu lunga :

Longa mikanda ya Bible. Tala bangindu na nsuka ya mukanda yai.

==NSUKA YA LESO 14

Leso 15. Yozue bendaka bo kusola Nzambi, kukatula banzambi yonso ya nkaka.

I. Preparatio ya moniteur--

Moniteur, lesy yai ke monika na Yozue 24 :1-28.

Moniteur, yidika na ntwala :

Kutanga ya 15.1 kele nda. Sola mutangi ya mbote, yandi sala pratike na ntwala na sythese ya kele na mukanda yai (tala 15.1). Yidika bacarte ya ke tuba : Abrahami, Izaki, Yakobi ti bana-bakala 12 na yandi, Moize, Ezipte, Nzadi ya Mbwaki, Bitumba ya Ba-Amore, Balami, Yeriko, Ntoto.

Moniteur, bakisa kikuma ya lesy yai :

Beto zenga nani beto ta sadila—kana Mfumu Nzambi ya salaka bima yonso, to banzambi ya fioti ya bantu me sala, sambu beto bakisa nde beto lenda sadila banzambi zole ve kaka mbala mosi.

Moniteur, yilama na verse ya kulonguka :

Yozue 24 :15...beno sola bubu yai kana nani nzambi beno zola kusambila, banzambi yina ya bankaka na beno vandaka kusambila...to banzambi ya bantu ya Amore... Kansi mono ti fami na mono, beto ta sadilaka Mfumu Nzambi.

[*Moniteur, NB : Bandinga sambu na bana ya fioti (preskolere) kele sulinye.*]

Moniteur, yilama na bankunga ya kwenda nzila mosi ti lesy yai :

Banzambi ya Nkaka
Landa, Mo' ta Landa Nge, Mfumu
Vutuka, Afrika, Vutuka !

II. Kureviser —

Kulanda devoir ya mposo me luta :

Na mposo me luta, beto pesaka beno bakristo devoir nde, konso muntu kusamba Nzambi konso lumbu nde Yandi sadisa nge kuvanda kwikama na Yandi tii na nsuka ya moyo na

nge. Nani tulaka ngolo kusala yo ? Nanimekaka ?

Reviser :

Beto me kuma na nsuka ya moyo ya Yozue. Nzambi me lungisa yonso ya Yandi silaka bankaka na bo. Yandi me pesa bo ntoto ya Kanana. Yandi me nwana sambu na bo, ebuna bo me nunga. Bo me kabisa ntoto na kati ya makanda na bo, Israele.

III. Kulonga Bana Lesy Yai –

Kuyantika Leso :

Na bilumbu ya nsuka ya moyo ya Yozue, yandi vukisaka bantwadisi yonso sambu na kulonga bo mambu ya nsuka.

Developpement—Malongi ya nene ya Lesy Yai na Bandambu 6 :

15.1 Yozue bingaka bantwadisi diaka sambu na kubambukisa bo mambu yonso ya mbote ya Nzambi me sala bo. Yozue 24 :1-13

Tangila bana :

 1 *Yozue bingaka makanda yonso ya Israele na kwisa kukutana ...ebuna bo kwisaka kutelama na meso ya Nzambi.*

2 *Yozue tubaka na bo yonso nde : "Mambu ya Mfumu Nzambi, Nzambi ya Israele, ke tuba, yo yai : 'Ntete bankaka na beno vandaka kuzinga kuna na simu ya nzadi ya Efrate, bo vandaka kusamba banzambi ya banzenza.*

3 *Mono Mfumu Nzambi basisaka nkaka na beno Abrahami na ntoto yango..., [*Mwana mosi songa carte « Abrahami », ti yandi bikala na ntwala ya bana.] Ebuna Mono nataka yandi na nsi yonso ya Kanana, Mono pesaka yandi mpi bana mingi. Mono pesaka yandi Izaki, [*Mwana songa carte, « Izaki ».]*

4 *ebuna Izaki Mono pesaka yandi Yakobi ...nkaka na beno Yakobi ti bana na yandi, [*Mwana songa carte, « Yakobi ti bana-bakala 12 na yandi. »] Bo kwendaka na nsi ya Ezipte. [*Mwana songa carte, « Ezipte ».]*

5 Na nima, Mono tindaka Moize ti Aroni, [Mwana songa carte, « Moize ».] Mono pesaka bantu ya Ezipte bampasi ya mutindu na mutindu, ebuna Mono zabaka kubasisa beno na Ezipte. [*Mwana songa carte, « Ezipte ».]

6 ...bankaka na beno ...kwisaka kukuma na nzadi ya Mbwaki. Kansi bantu ya Ezipte landaka bo na bapusupusu ti bampunda na bo ya bitumba.

7 Ebuna bankaka na beno didilaka Mono sambu Mono sadisa bo ; yo yina, Mono bwisaka mpimpa na kati na bo ti bantu ya Ezipte...Mono salaka mpi na mpila nde masa kufika bantu ya Ezipte, bo fwa. Beno me zaba mbote nki Mono salaka bantu ya Ezipte. [*Mwana songa carte, “Nzadi ya Mbwaki”]

Bankaka na beno bikalaka bamvula mingi na ntoto ya zelo na zelo.

8 Ebuna Mono nataka beno na ntoto ya bantu ya Amore.... Bantu yango nwanisaka beno bitumba, kansi Mono pesaka bo na maboko na beno ; beno botulaka ntoto na bo....[*Mwana songa carte, “Bitumba ya Ba-Amore”.]

9 Ntangu yai, ntotila ya nsi ya Moabi, Balaki... bingaka ...Balami mwana ya Beore sambu na kwisa kusinga beno.

10 Kansi Mono buyaka na kuwila Balami, yo yina, yandi sakumunaka beno, ebuna Mono gulusaka beno na maboko ya Balaki. [*Mwana songa carte, “Balami”.]

11 Beno sabukaka nzadi ya Yordani, beno kwisaka kukuma na Yeriko.... Mono pesaka bo yonso na maboko na beno. [*Mwana songa carte, “Yeriko”]....

13 Mono pesaka beno bantoto ya beno salaka bilanga ve, ti babwala ya beno tungaka ve. ...ntangu yai, beno me tungaka na bantoto yango....”[*Mwana songa carte, “Ntoto”.]

Yula bana –

Niveau Primaire :

- ?** • Yai yonso vandaka bampila Nzambi me sadisa bo, to bampila Yandi me pesa bo mpasi ?
(Bampila Yandi me sadisa bo.)

Niveau Secondaire :

- Sambu na nki nge banza Nzambi songaka Yozue kubambukisa bantu ya Israel bampila ya Yandi me sadisa bo na histoire na bo ? [Moniteur, kuwa mabanza ya Nzambi.]

Bana yimba ti kina :

-  Bana yimba nkunga :
‘Landa, Mo’ Ta Lange Nge, Mfumu.’

15.2 Muntu na muntu fweti zenga kana yandi ta sadila Mfumu Nzambi. Yozue kuzengaka nde yandi ti fami na yandi me sola Nzambi. Yozue 24 :14-15

Tangila bana :

-  14 Yozue tubaka diaka nde :
« Ntangu yai, beno zitisa Mfumu Nzambi, beno sadila Yandi na ntima mosi ya mbote. Beno lemfuka na Yandi. Beno katula-katula banzambi zina ya bankaka na beno vandaka kusambila ...beno samba kaka Mfumu Nzambi.

15 ...beno sola bubu yai kana nani nzambi beno me zola kusambila...Kansi mono ti fami na mono, beto ta sadilaka Mfumu Nzambi.”

Yula bana –

Niveau Primaire :

- ?** • Yozue lombaka bo kusala nki ?
(Kuzenga bo ta sambila nani, ti kukatula banzambi yonso ya nkaka.)

Niveau Secondaire :

- Nani muntu ya ntete na kati na bo kutuba nde yandi ta sadila Nzambi ?
(Yozue)

Bana sala bageste :

 Bana sala bageste bonso bo ke
Indula banzila zole. Na nima, bo
sola nzila mosi, bo yamba yo na kiese
yonso.

Bana yimba ti kina :

 Bana yimba nkunga:
'Banzambi ya Nkaka'.

Bana tuba verse ya kulonguka :

[Moniteur, bana tuba Yozue 24 :15 fraze na fraze na nima ya nge. Bo tuba yo mbala tatu. Ntangu bo kuma na bafraze zole ya nsuka, bo boka ngolo, bo tula milolo. Na nima, bana bakala tuba yo, bana bankento, ti bana ya fioti tuba fraze ya nkufi na bo.

...beno sola bubu yai/ kana nani nzambi beno zola kusambila,/ banzambi yina ya bankaka na beno vandaka kusambila/...to banzambi ya bantu ya Amore.../ Kansi mono ti fami na mono,/ beto ta sadilaka Mfumu Nzambi.

15.3 Bantu ya Israele zengaka nde bo ta sadila Yandi sambu na bampila Yandi me sadisa bo. Yozue 24 :16-18**Tangila bana :**

 16 Bantu ya Israele tubaka nde :
"Beto ke na ngindu ata fioti ve na kubikisa Mfumu Nzambi na kwenda kusamba banzambi ya nkaka.

17 Sambu Mfumu Nzambi, Nzambi na beto, Yandi muntu katulaka beto ti bankaka na beto na kimpika na nsi ya Ezipte...

18 Mfumu Nzambi muntu kulaka bambeni yonso na ntwala na beto...Mpidina beto mpi, beto fweti sadila Mfumu Nzambi... na beto. »

Yula bana --**Niveau Primaire :**

-  • Keti bantu ya Israele vandaka na ngindu kubika Mfumu Nzambi ? (Ikele ve.)

Niveau Secondaire :

-  o Sambu na nki bo yindulaka kulanda Nzambi ?
(Bo me bambuka bampila yonso Yandi me sadisa bo.)

Bana sala bageste :

 Bana nangula maboko kusonga nde bantu ya Israele ndimaka kulanda Nzambi.

Bana yimba ti kina :

 Bana yimba nkunga :
'Landa, Mo' Ta Landa Nge, Mfumu'.

15.4 Yozue songaka bo nde, kuzenga kusadila Nzambi kele mambu ya kusakana ve, kansi bo ndimaka kaka. Yozue 24 :19-22**Tangila bana :**

 19 Ebuna Yozue tubaka na bantu nde : « Beno ta kuka ve kusadila Mfumu Nzambi. Yandi kele Nzambi mpenza, Yandi ta ndima ve mubulu ti masumu na beno. Yandi kele Nzambi mosi ya zwa, ke zolaka banzambi ya nkaka ve ;

20 ebuna kana beno kubikisa Yandi na kwenda kusambila banzambi ya banzenza, Yandi ta balukila beno ti kupesa beno ndola.... »

21 Bantu tubaka na Yozue nde : « Ikele ve, kaka Mfumu Nzambi muntu ya beto fweti sadila ! »

22 Yozue nde : « Beno mosi kele batemwe nde beno mosi me sola na kusadila Mfumu Nzambi. » Bantu nde : « E, beto mosi kele batemwe. »

Yula bana --**Niveau Primaire :**

-  • Keti Yozue yindulaka nde bo ta sadila Nzambi mutindu bo me sila ? (Ikele ve.)
- Keti na nsuka bantu ya Israele ndimaka nde bo ta landa Nzambi, to

bo ta landa Yandi ve ?
(Bo ta landa Yandi.)

Niveau Secondaire :

- Zwa kele mbi sambu na beto bantu.
Kansi Nzambi kele Nzambi ya zwa, ti
?? yo kele masumu ve. Sambu na nki ?
(Sambu Yandi kele Nzambi ya salaka
beto ti bima yonso. Yandi lenda
ndima banzambi ya nkaka ve,
sambu bo salaka kima ve.)

Bana sala bageste :

 Kabisa bana na bandambu zole. Mosi
sala bonso Yozue. Bo songa ndambu
ya nkaka nde, « Beno lenda landa
Nzambi ve ! »

Ndambu ya zole ya bana sala bonso bantu ya
Israele. Bo vutula nde, « Beto ta landa
Yandi ! »

Bana yimba ti kina :

 Bana yimba nkunga:
'Banzambi ya Nkaka'.

15.5 Mpidina, bo fweti katula banzambi yonso ya nkaka. Yozue 24 :23-24

Tangila bana :

23 Yozue tubaka na bo diaka nde :

 "Kana mpidina, beno katula
banzambi ya banzenza yina kele na
kati na beno, ebuna beno kudipesa
beno yonso ya mvimba na Mfumu
Nzambi... »

24 Bantu tubilaka Yozue nde : « Ya kieleka,
beto me zola kusadila kaka Mfumu Nzambi na
beto, beto ta lemuka na mambu yonso ya
Yandi ta tuba.

Yula bana --

Niveau Primaire :

- Bo fweti sala nki sambu na
kusonga nde kieleka bo zolaka
kulanda Nzambi ?
(Katula banzambi to biteki yonso
ya nkaka na kati na bo.)

Bana sala bageste :

 Bana yonso sala bageste bonso bo ke
katula biteki ya vandaka na banzo na
bo, bo ke tula yo tiya.

Bana yimba ti kina :

 Bana yimba mosi ya bankunga:
'Banzambi ya Nkaka' to 'Vutuka,
Afrika, Vutuka'.

15.6 Bo tedimisaka ditadi sambu na kusonga kuwakana na bo, mpila bo me zenga kusadila Nzambi. Yozue 24 :25-28

Tangila bana :

 25 Kilumbu yo yina, ... Yozue
wakanaka na bantu ya Israele...

26 Yandi ...bakaka ditadi ya nene, yandi
tedimisaka yo ...penepene na Nzo-Nzambi ya
ntenta.

27 Yandi tubilaka bantu yonso nde : « Beno
tala mbote ditadi yai. Yo ta vandaka temwe
...na beno, yo ta kangaka beno nzila na kusala
Nzambi na beno mubulu. »

28 Ebuna Yozue songaka bantu na kuvutuka
konso muntu na ntoto na yandi.

Yula bana --

Niveau Primaire :

- Yozue salaka nki kusadisa bantu
kubambuka mpila bo me sila kusadila
Nzambi ?
(Yandi tulaka ditadi ya nene.)

Niveau Secondaire :

- Ditadi yina vandaka bonso nki ?
(Bonso ntemwe ya mpila bo me
wakana ti Nzambi.)

Bana sala bageste :

 Bana yonso sala bageste bonso bo ke
benda ditadi ya nene.

Bana yimba ti kina :

 Ditadi yai kele ntemwe
Beto me sila kusadila Nzambi.

>|< Kumanisa leso :

Bantu ya Israele zengaka mambu mosi ya nene. Bo bakisaka nde bo lenda ve sambila biteki to banzambi ya nkaka ti Nzambi. Bo fweti sola nki nzila bo ta landa. Kiese mingi, bo solaka nzila ya Nzambi.

Beto mpi, muntu na muntu, beto fweti sola kana beto ta landa Nzambi, to mabanza ya beto mosi. Kana beto me zenga kulanda Nzambi, beto katula banzambi yonso ya nkaka.

Devoir sambu na bakristo :

Devoir mono ke pesa beno bakristo,
yo yai :
Yindula mbote kana nge kele na bima
ya biteki to ya kindoki to ya magie.
Kana yo kele bima ya nge mosi,
mbote kuyoka yo tiya. Lomba
lusadisu ya beto to pasteur, kana nge
ke na yo mfunu.

Kubinga bavidi :

Na kati na beno lenda vanda bana
mpi ya me zenga ve mbote-mbote
beno ta landa nani. Kana nge ke zaba
ve nde nge me zenga kuyamba Yesu
Kristo bonso Mvulusi na nge, mbote
kubalula ntima, kuyamba Yandi bubu.
Yandi ta pesa nge moyo ya mpa.

==NSUKA YA LESO 15

Leso 16. Bantwadisi fwaka, ti Israele sadilaka Nzambi bilumbu na bo yonso.

I. Preparatio ya moniteur--

Moniteur, lesy yai ke monika na Yozue 24 :29-33.

Moniteur, bakisa kikuma ya lesy yai :

Beto sadila Nzambi tii nsuka ya moyo na beto, sambu Nzambi me pesa beto mpi kitini mosi ya histoire, to ntangu mosi ya fioti kusadila Yandi awa na nsi-ntoto.

Moniteur, yilama na verse ya kulonguka :

Yakobo 4 :14 Beno zaba ve nki mutindu luzingu na beno ta kuma mbasi ! Ya kieleka, beno kele bonso lubungi yina ke monikaka na zulu na mbala mosi, ebuna yo vila mpi na mbala mosi.

Moniteur, yilama na bankunga ya kwenda nzila mosi ti lesy yai :

Mfumu Zaba Nzila na Mono Mono Me Sila Kulanda Yesu

II. Kureviser —

Kulanda devoir ya mposo me luta :

Na mposo me luta, beto lombaka beno bakristo, kana beno vandaka na bima ya biteki, kindoki to magie, kukatula yo ti kuyoka yo tiya. Nani na kati na beno salaka yo ? Nani ta songa beto mutindu yo lutaka ?

Reviser :

Beto me mona bandinga ya nsuka ya Nzambi pesaka na Yozue sambu na bantu ya Israele. Yandi songaka bo nde bo fweti zenga kana bo ta sadila Mfumu Nzambi, to banzambi ya nkaka, biteki ya bantu me sala-sala. Bo yonso zengaka nde bo ta landa Nzambi, ti bo me tula ditadi mosi sambu na kubambukisa bo mpila bo me wakana ti Nzambi.

III. Kulonga Bana Lesy Yai –

Kuyantika Lesy :

Ntangu yai, Yozue me manisa bisalu yonso ya Nzambi me pesa yandi. Yandi me kuma na nsuka ya moyo na yandi.

Developpement—Malongi ya nene ya Lesy Yai na Bandambu 4 :

16.1 Yozue kufwaka na bamvula 110, ebuna bo zikaka yandi. Yozue 24 :29-30

Tangila bana :

29 *Na nima ya mambu yai, Yozue, ...muntu ya Mfumu Nzambi, kufwaka ntangu yandi me lungisa bamvula nkama mosi na kumi (110).*

30 Bo zikaka yandi na ntoto ya bo pesaka yandi kuna na bwala Timnati-Sera...

Yula bana --

Niveau Primaire :

? • Yozue me lungisa bamvula ikwa ntangu yandi fwaka ?
(Bamvula 110)

Niveau Secondaire :

?? ○ Bo bingaka Yozue nki ?
(Muntu ya Nzambi)

Bana sala bageste :

 Tula bana na bandambu ya 6 to 7. Konso ndambu pona mwana mosi kusala bageste bonso Yozue. Yozue sala bonso yandi ke fwa.

Bana ya nkaka na konso ndambu, bo sala bonso bo ke dima dibulu kuzika yandi.

Bana yimba ti kina :

 Yozue kufwaka,
Muntu ya Nzambi
Ntangu na yandi lungaka,
Muntu ya Nzambi.

16.2 Israele sadilaka Nzambi bilumbu yonso ya ndonga yina ya bantu. Yozue 24 :31

Tangila bana :

 31 Bantu ya Israele vandaka kusadila Mfumu Nzambi ntangu Yozue vandaka na moyo ; bo landaka na kusadila Yandi mpi ntangu Yozue me fwa imene, ti ntangu bambuta yina monaka bo mosi mambu yonso ya Mfumu Nzambi sadilaka bantu ya Israele vandaka kaka na moyo.

Yula bana --**Niveau Primaire :**

-  • Keti bantu ya Israele landaka kusadila Nzambi na nima ya lufwa ya Yozue ?
(Ee, bambuta landaka kusadila Nzambi.)

Niveau Secondaire :

-  ○ Na nima ya lufwa ya Yozue, nani landaka kusadila Nzambi ?
(Bambuta ya me mona bo mosi mambu ya Nzambi salaka bo ntangu bo kotaka Kanana.)

Bana sala bageste :

 Bana yonso simba maboko muntu na muntu, bo tuba nde, "Yozue me fwaka, kansi beto ta landa kusadila Nzambi."

Bana yimba ti kina :

 Bana yimba nkunga: 'Mono me sila kulanda Yesu'.

16.3 Bo zikaka mikwa ya Yozefi na ntoto ya Nzambi silaka kupesa bo. Yozue 24 :32**Tangila bana :**

 32 Mikwa ya Yozefi ya bantu ya Israele nataka na nsi ya Ezipite, bo zikaka yo...na ntoto yina ya Yakobi sumbaka na bana ya Amore na ntalu ya bibende nkama mosi.... ntoto yango mpi kumaka ya bana ya Yozefi.

Yula bana --**Niveau Primaire :**

-  • Bo zikaka mpi nki ya nkaka ?
(Mikwa ya Yozefi ya me fwaka ntama na Ezipite.)

Niveau Secondaire :

- Nani bambuka sambu na nki bo zikaka mikwa ya Yozefi ?
 (Yandi fwaka ntama na Ezipite, kansi yandi kwikilaka nsilulu nde Nzambi ta pesa bo ntoto ya Kanana, yo yina yandi songaka bo nde, bo nata mikwa na yandi nzila mosi ti bo, ntangu bo kota ntoto na bo, bo zika mikwa na yandi kuna. Tala Kuyantika 50 :24-25.)

Bana sala bageste :

 Bana sala bonso bo ke tima dibulu, bo ke kotisa mikwa ya Yozefi, bo ke kanga dibulu.

Bana yimba ti kina :

 Yozefi kwilaka ntama Nzambi ta pesa bo ntoto.
Ntangu yai, mikwa na yandi Bo me zika yo kuna.

16.4 Elazare mwana ya Aroni kufwaka, ebuna bo zikaka yandi. Yozue 24 :33**Tangila bana :**

 33 Elazare mwana ya Aroni, yandi mpi kufwaka, ebuna bo zikaka yandi na zulu ya mwa-ngumba... kuna na ntoto ya bangumba ya Efrayimi.

Yula bana --**Niveau Primaire :**

-  • Nani mpi ntwadisi ya nkaka kufwaka ?
(Elazare, mwana ya Aroni)

Niveau Secondaire :

- Nani lenda bambuka ? Aroni,
 Elazare, ti fami na yandi, bo salaka

nki kisalu ?
 (Bo vandaka banganga Nzambi.
 Aroni ti Elazare vandaka Mfumu ya
 banganga-Nzambi, bantwadisi
 spirituel.)

Bana sala bageste :



Bana yonso sala bageste bonso bo ke
 dila sambu Elazare, Mfumu ya
 banganga-Nzambi me fwaka.)

Bana yimba ti kina :



Mfumu ya Banganga-Nzambi, yandi
 mpi fwaka. Mawa, mawa.

>|< Kumanisa lesò :

Bantwadisi fwaka—Yozue ti Elazare. Bo me
 vanda kwikama na Nzambi tii na lufwa na
 bo. Beto yonso mpi, lumbu mosi beto ta
 fwa. Nzambi pesa beto mosi kitini mosi ya
 histoire, ntangu mosi ya fioti sambu na
 kusadila Yandi.

Bana tuba verse ya kulonguka :

[Moniteur, bo tuba Yakobo 4 :14 fraze na
 fraze na nima ya nge, mbala tatu. Na nima,
 yula bo nki disongidila ya verse yina. Sukisa
 na kuyika bageste ti tuba yo mbala tatu
 diaka.

Beno zaba ve/ nki mutindu luzingu na beno
ta kuma mbasi !/ Ya kieleka,/ beno kele
bonso lubungi/ yina ke monikaka na zulu na
mbala mosi/, ebuna yo vila mpi/ na mbala
mosi.

[Moniteur, bana ya fioti (prescolere) lenda
 tuba kaka bandinga ya kele sulinye.]

Devoir sambu na bakristo :



Devoir mono ke pesa beno bakristo,
 yo yai :kusosa lumbu na lumbu,
 konso lumbu kusadila Nzambi na
 kwikama. Mpidina, kana beno landa
 kusala yo, beno mpi ta vanda
 kwikama tii na lufwa.

Kubinga bavidi :



Kansi na ntwala muntu lenda vanda
 kwikama na Yesu, yandi fweti yantika
 na Yesu. Keti nge me yantika ti
 Yesu ? Keti nge me bakisa nde nge
 kele nkwa-masumu, nge ke na mfunu
 ya Mvulusi ? Keti nge me yamba
 Yesu, Mwana-Nzambi, na ntima ti na
 luzingu na nge ? Kana tii bubu, nge
 zaba ve mbote-imbote, kukingga diaka
 ve. Kwisa solula ti beto na nima ya
 ecodim. Beto ta sadisa nge kuyantika
 ti Yesu bubuyai.

Kana ntangu lunga :

Longa mikanda ya Bible. Tala bangindu na
 nsuka ya mukanda yai.

==NSUKA YA LESO 16

17. LESO YA REVISIO

Moniteur, beto me manisa mukanda ya Yozue. Sosa na kati ya bangindu yai sambu na kusala revisio ya Yozue, ti ya Bible ya mvimba Kuyantika tii na Yozue.

Linya ya Ntangu—

Sadila linya ya ntangu kureviser mambu ya nene ya salamaka na kati ya mukanda ya Yozue.

Sadila yo diaka kusonga mpila mambu ya salamaka na mukanda ya Yozue ke tadila baevenement ya Bible ya mvimba Kuyantika tii na Yozue. Tala bantu, mambu ya salamaka, badate. Tala nki salamaka ntete, nki na nima.

Bana yimba nkunga ti songa histoire :

‘Yozue Nwanaka na Yeriko’

Yula bana nki mutindu bibaka ya Yeriko kubwaka. Mwana mosi tuba fraze mosi. Mwana ya nkaka yika fraze ya nkaka, etc.

Ntoto ya Kanana :

Moniteur, songa karte geografika to foto ya ntoto ya Kanana kana yo ikele, to dessiner yo. Yula bana :

- Nani muntu ya ntete ya Nzambi silaka ntoto ya Kanana ?
(Abrahami)
- Nsilulu yina, beto mona yo na nki mukanda ya Bible ?
(Kuyantika, mukanda ya ntete ya Bible)
- Na ntwala kubaka ntoto yina, Israele fweti sala bamvula 400 wapi?
(Na Ezipte bonso bampika)
- Nani fwaka na Ezipte, kansi yandi songaka bo nde bo zika mikwa na nsi ya Kanana ntangu Nzambi pesa yo na bo?
(Yozefi)
- Nani twadisaka bo kubika Ezipte, kuluta na kisika ya zelo na zelo ?
(Moize)

- Nani twadisaka bo kukota ntoto ya Kanana kubaka yo ?
(Yozue)
- Na mukanda ya Yozue, beto mona nde bantu ya Israele salaka nki ?
(Bo kotaka ntoto ya Kanana, ntoto ya Nzambi pesaka bo.)

Kubambuka bamvita --

Moniteur, sonika bazina ya babwala yai na bacarte to na tableau, to na ntoto kana nge ke longa na nganda: Yeriko, Ai, Gibeon.

Kabisa bana na bandambu zole sambu na competisio. Ndambu ya ntete yantika. Bo tuba bima yonso ya bo lenda bambuka sambu na kunwana ya Israele na bwala yina. Bo baka 100 points na konso kima bo tuba. Kana bo lenda tuba kima diaka ve, ndambu ya zole lenda tuba bima ya nkaka sambu na sika yina. Bo baka 200 points na konso kima bo lenda tuba. Na nima, bo sola bwala mosi ya nkaka ti bo tuba yonso bo lenda sambu na yo. Bo baka 100 points na yonso bo lenda tuba. Kana bo lenda tuba diaka ve, ndambu ya nkaka ya bana lenda tuba bima ya nkaka sambu na 200 points na konso kima. Ndambu ya nunga kele shampio.

Kutunga bwala --

Bana yonso meka kutunga bwala ya nene. Bo sola mwana mosi kudessiner banzo ya babriki. Yandi lenda dessiner briki mosi sambu na konso kimpa ya bana lenda bambuka ya Nzambi salaka na mukanda ya Yozue.

Kulonguka bafoto—

Kana bafoto me kwisa ti baleso, songa mosi na bana. Pesa bo minutes zole kutala yo mbote-mbote. Na nima, balula yo ti yula bo bakestio na zulu na yo. Bo baka 100 points na konso kestio ya bo pesa mvutu ya mbote. Bo tala bapoint ikwa bo lenda baka. Kana bo baka 1,000, bo kwenda na ngonda. Kana 2,000, bo kwenda na mars, etc.

Kumanisa baverse—

Yai kele baverse beto me longuka na baleso ya
Yozue :

Yozue 1 :8, Baebreo 11 :21, Bankunga 119:4-5,
Baebreo 11 :31, Bankunga 120 :3-4, Kulonga
28 :2 &6, 2 Yoane 1 :7, 1 Yoane 4 :4, Roma
12 :19, 1 Tesalonika 5 :24, Kubasika 23 :3,
Yozue 21 :45, Matayo 18 :15, Yozue 23 :15-
16a, Yozue 24 :15, Yakobo 4 :14.

Sola baverse tatu na kati na yo, ti sonika
baverse yina na bakarte tatu. Bana tuba
konso verse mbala 3. Na nima, pesa mwana
mosi sizo. Yandi zenga konso verse bitini zole,
luyantiku ti nsuka. (Atasio! Zenga ve bakarte
ya me kwisa na koli ya materiels, sambu bantu
ya nkaka zola sadila yo na nima ya nge.)
Balula bakarte yina yonso. Bana meka
kuvutula bitini sambu luyantiku ya konso
verse kwenda ti nsuka na yo. Na nima, bo
tuba baverse yina diaka.

BANGINDU SAMBU NA KULONGA MIKANDA YA BIBLE

- Yozue kele mukanda ya sambanu na kati ya Bible. Yo kele mukanda ya ntete ya mikanda beto binga ‘Mikanda ya Histoire.’ Mikanda tanu ya Moize ke monika na ntwala na yo.
- Mikanda beto me longuka tii ntangu yai:
Mikanda ya Moize--
 Kuyantika
 Kubasika
 Levi
 Kutanga
 Kulonga
Mikanda ya Histoire--
 Yozue
- Tuba mosi ya mikanda yai, ebuna songa mwana mosi. Pesa yandi coin, yandi losa yo na zulu ya mesa. Kana coin kubwa face na zulu, yandi tuba mukanda ya kwisa na nima ya mukanda nge me tuba. Kana coin kubwa face na nsi, yandi tuba mukanda ya kwisa na ntwala ya mukanda nge me tuba.
 Mwana yina pesa coin na mwana ya nkaka, ti yandi sala yo, etc.
- Bana tuba mikanda yonso na ordre, bo tuba yo na reverse.
- Songa mukanda mosi, ti songa misapi mosi, zole, tatu, iya, to tanu. Bana yonso na kimvuka yantika na mukanda nge me tuba, bo tuba mikanda ya landa na nombre ya nge me songa.
- Nge tuba zina ya muntu to kisika, bo tuba mukanda ya ke tuba yo mingi :
 Moize Kubasika
 Yozue Yozue
 Tour ya Babel Kuyantika
 Noe Kuyantika etc.

- Nge tuba zina ya mukanda, bana tuba yo na nima ya nge. Nge tuba bisono na yo mosi-mosi. Nge balula sambu nge ke tala na direksio mosi ti bana. Nge ‘sonika’ konso kisono na mupepe bonso nge kele kusonika zina ya mukanda yina, ti bana landa nge.
- Nge sonika mikanda na papier to tableau, kansi nge katula bavoyelle K____y____nt____k_____. Mwana mosi fweti sonika bisono ya ke konda. Bana ya nkaka tuba kana yo kele mbote, bo tuba zina ya mukanda yina.
- Sambu na Nki ?
 Bana meka kusonga na fraze mosi sambu na nki konso mukanda me baka zina na yo. Mbandu :
 Kuyantika. Yo ke songa kuyantika ya bima yonso.
 Kubasika. Yo ke songa mpila bantu ya Israele basikaka na Ezipte.
 Levi. Yo ke songa bansiku ya bisambu sambu na Balevi.
 Kutanga. Na luyantiku, Nzambi songaka bo kutanga nombre ya bafami.
 Kulonga. Moize ke longa bo diaka ndinga ya Nzambi na ntwala kukota nsi na bo.
 Yozue. Yozue twadisaka bo kukota nsi ya Yandi silaka bo.

Atasio, moniteur! Nge me defa mukanda yai na bibliothèque ya materiels ya Ministères pour Chaque Enfant. Na nima ya nge, MCE zola defa yo diaka na dibundu ya nkaka, sambu bo mpi sadila yo.

Sambu na dibundu na nge, beto zola kudefa nge mukanda ya ke landa na nima na yai, mukanda ya Bazuzi ti Ruti. Vutula mukanda yai sambu nge landa diaka na mukanda ya Bazuzi ti Ruti. Merci mingi ti Nzambi sakumuna malongi na nge.